

TNÚHU NÍ CHÍDÓ TNÙNÍ TÉ JUÀÁ

Déhe Yá Ndiöxí ní cuu-gá ñá yiu

¹ Cùmání-gă ngáva ñuyíú, te sa ndècu ndihi Yá Ndiöxí Déhe-gá. Te ñá-ni xícuu-gá. Te Déhe-gá-án ñá cuu-gá dàtná ñá tnúhu, chi ní cachí tnúhu-gá nàcuáa càa Tátá-gă Dútú Ndiöxí. ² Te sa ndècu-gá ndihi Dútú Ndiöxí te ní ngáva ñuyíú. ³ Te ñá-ni tnúhu mee Dútú Ndiöxí ní cuu ní cadúha Déhe-gá nchaa sá ío ñuyíú. Te núu ñá túú Dèhe-gá ñá, te ñá túú nă coo ñuyíú-a ni cùu. ⁴ Te ñá-ni Déhe-gá quídé-gă ndécú-ó, te ní dáyèhé-gá iní-ó nàcuáa cundecu-o. ⁵ Te tnúhu-gá ní xité nuu-xi núú ndécú nchaa ñá yiu ñùhu ichi cuehé ichi duha. Te ñá yiu-án cúy-yu dàtná cue ñá yiu ndècu ñá núú néé, te ñá-ni-yu cachí iní-yu xocàní-yu tnúhu-gá dico vá ndácŭ-yu.

⁶⁻⁷ Te ní xíndecu ñá té ní xínani-dě Juàá, te té-án ñá táuchíúⁿ Yá Ndiöxí sá càháⁿ-dé tnúhu-gá núú ñá yiu. Te ní xáhaⁿ-dě xí-yu sá vèxi Déhe-gá ñuyíú-a, te dandixi túu-gá iní-yu cuendá cutnùní iní-yu nàcuáa ndùu cuendá Yá Ndiöxí cuendá quíndáá iní-yu tnúhu-gá. ⁸ Te ñá díú mèe té Juàá ní dandixi túu-dé iní-yu cuendá cutnùní iní-yu nàcuáa ndùu cuendá Yá Ndiöxí, chi cuendá-ni ní xica cuu-dé ní càháⁿ-dé sá Dèhe Yá Ndiöxí véxi-gá dandixi túu-gá iní-yu. ⁹ Te ndáá ndisa sá méé-gă dándixi túu-gá iní ñá yiu ñuyíú-a cuendá cutnùní iní-yu nàcuáa ndùu cuendá Yá Ndiöxí.

¹⁰ Te ní xíndecu-gá ñuyíú-a, te ñáyiú ñuyíú-a ñá ní cùtnuní iní-yu yoo cùu-gá, te ñu-ni mee-gă ní cadúha-gá ñuyíú-a ní quide-gá chiúⁿ ní táhú Dütú Ndiöxí. ¹¹ Te ní quixi-gá ñuyíú ñi cadúha mee-gă, dico cue ñáyiú ñuyíú-a ñá ní cùu váha iní-yu núú-gă. ¹² Dico davá-yu ní sándáá iní ñáhă-yu xii-gá, te ní nduu táhú-yu ní nduu déhe ñaha Yă Ndiöxí xií-yu. ¹³ Te ñá túú ní nduu déhe ñaha-gă xií-yu sá cúu-yu déhe ñáyiú ñuyíú-a, àdi sá ndécú tătă-yu, ñănă-yu chi mee Yă Ndiöxí ducaⁿ ñi cuiní-gá cunduu sá ndúú dēhe ñaha-gă xií-yu.

¹⁴ Te Déhe-gá ní quixi túu-gá ñuyíú-a, te ní cuu-gá ñⁿ yiqui cùñú ní xíndecu ndihí ñaha-gă xii nchoo cuè ñáyiú ní xica cuu túu ndihí-gá. Te ní xiní-ó să ïo càhnu cuu-gá cuendá sá ñⁿ dîi díi-ni-gă cúu-gă Déhe Yá Ndiöxí, te ío cùndahú iní ñáhă-gă chíndèe ñaha-gá xii nchoo ñăyiú ndècu ñuyíú-a, te ío ndáá càháⁿ-gá. ¹⁵ Te duha ní cáháⁿ té Juáa cuendá Déhe Yá Ndiöxí ní xáhaⁿ-dē xii ñáyiú:

—Cuendá tée iha ni cáháⁿ-í ndéé cãni-gá ní cachí-í sá quíxí ñⁿ tée quixi. Te tée-áⁿ cùnùu-gá-dé, chi díhna-gá-dé sa ndècu-dé dàcúxí yǔhú —duha ní xáhaⁿ-dē xií-yu.

¹⁶ Te ío váha iní Yaá-áⁿ chi xito ñaha-gá xii-o nchàa-o ñⁿ nduu ñⁿ nduu. ¹⁷ Te ndíi Moisés ní cachí tnúhu ndíi tnúhu Yá Ndiöxí tnúhu sá sánú ìchi ñaha xii-o nacúaa cundecu-o, dico Déhe-gá Xítohó Jesucristú ní cachí-gá sá ïo cùu iní ñáhă Yă Ndiöxí xii-o. Te ní cáháⁿ-gá nchaa dava-gá tnúhu ndáá. ¹⁸ Te ñá ñⁿ ñăyiú xiní túu-yu Yá Ndiöxí. Dico ñⁿ dîi díi-ni Déhe-gá Yaá ndécú ndihí-gá càchí tnúhu-gá nàcuáa càa-gá.

*Té Juàá tée dàcuandute ñaha xii ñáyiú càháⁿ váha-dé
cuèndá Xítóhó Jesucrìstú*

(Mt. 3:11-12; Mr. 1:7-8; Lc. 3:15-17)

19 Te cue tée isràél ndécú ñúú Jerusalén ní tendaha-güedě cue dútú ndihí cue tée cùu levítá cuáháⁿ-güedé núú ndécú tẽ Juàá ndúcú tñũhu-güedé núú-dě ñũ ná tée cùu-dé. 20 Te ní cáháⁿ ndáá-dé ní xáhaⁿ-dě xii-güedé:

—Yúhú, ñá díú Crìstú Yaá ní tendaha Yă Ndiõxí véxi ñuyíú-a cùu-í —càchí-dé xáhaⁿ-dě.

21 Te ní xáhaⁿ tùcu-güedé:

—¿Te yoo cùu yohó váíⁿ? ¿Á yòhó cúú-n tẽ Èliás? —càchí-güedé xáhaⁿ-güedě xii-dé.

Te ní xáhaⁿ tẽ Juàá:

—Yúhú, ñá díú tẽ Èliás cúu-í —càchí-dé xáhaⁿ-dě.

Te xáhaⁿ tùcu-güedé:

—¿Te yòhó cúú-n tẽ ní cachí cue tée ndéé sanaha quèxi cáháⁿ tñúhu Yá Ndiõxí-ãⁿ? —càchí-güedé xáhaⁿ-güedě xii-dé.

Te ní xáhaⁿ-dě:

—Ni ñà díú tẽ-áⁿ cúu-í —càchí-dé xáhaⁿ-dě xii-güedé.

22 Te ní xáhaⁿ tùcu-güedé:

—¿Te ná tée cùu yohó váíⁿ?, cuèndá ducaⁿ nàcani tñúhu-ndí núú cuè tée ní tendaha ñaha xii-ndí véxi-ndí, te cáháⁿ duuⁿ-n ñũ ná tée cùu-n —cachí-güedé xáhaⁿ-güedě xii-dé.

23 Te ní xáhaⁿ tẽ Juàá:

—Yúhú cúu-í tée xìca cáháⁿ xití yucu nàcuáa ní cáháⁿ ndí Chàíá, chí ndí-áⁿ ñí cachí ndí: “Chí dáñá ìchi cuehé ichi duha ndècu-ndo te tñũ-ndo ìchi váha, chí véxi Yaá ío cùnũ”, duha ní cachí ndí —càchí tẽ Juàá xáhaⁿ-dě xii-güedé.

24 Te cue tée ndùcu tnúhu núú tẽ Juàá nõu ná tée cùu-dé, cue tée-áⁿ nõ tendaha ñàha cue tée cùu fariséú xii-güedé. 25 Te ní xáhaⁿ tùcu-güedé xii té Juàá:

—¿Ná cuendá dácuañdute-n ñáyiú te núu ñá díú Crìstú cúu-n, te ni ñà díú tẽ Èliás, te ni ñà díú tẽ véxi cáháⁿ tnúhu Yá Ndiõxí cúu-n vàiⁿ? — cächí-güedé xáhaⁿ-güedé xii-dé.

26-27 Te ní xáhaⁿ tẽ Juàá:

—Yúhú ní ngódó núu-í dácuañdute-í ñáyiú. Dico nchícúⁿ ñⁿ tée véxi, te tée-áⁿ cúnùu-gá-dé dàcúúxí yǔhú, chi yúhú cúu-í ñⁿ tée duuⁿ duuⁿ ñá túú tàú nandaxi cuèdicó ñⁿ chàú-dé dico quide-í chiuⁿ-dé. Te tée-áⁿ sa ñùhu tnahá-dé tnuú-ndó dicó-ni sá ñá túú xini-ndó-dẽ —cächí-dé xáhaⁿ-dẽ.

28 Duha ní cuu ñuú Bètábará ñuú cáá ndàa ingá xio yúte Jòrdán, yàcáⁿ ní xindecu té Juàá ní dácuañdute-dé ñáyiú.

Jèsús quidé càhnu iní-gá nchaa yíca cuèchi ñáyiú

29 Te nduu tnéé ní xini té Juàá Jèsús véxi yatni-gá núú ndécú-dẽ ndihi ñáyiú. Te ní xáhaⁿ-dẽ xií-yu:

—Chí cündèhe tée-ãⁿ, chi tée-ãⁿ cúu-dẽ Crìstú Yaá ní tendaha Yã Ndiõxí véxi ñuyíú-a, te véxi-dé cada càhnu iní-dé nchaa yíca cuèchi ñáyiú ñuyíú. Te cùu-dé dàtná ñⁿ mbéé quiti ío váha iní-xi.

30 Te díu tée-ãⁿ ní cachí-í sá cãchícúⁿ-dé quixi. Te cùuu-gá-dé dàcúúxí yǔhú, chi díhna-gá-dé sa ndècu ní cachí-í xii-ndo. 31 Te ni yǔhú ñá túú xini-í-dé ní cùu, dico xica cuu-í dácuañdute-í ñáyiú cuendá nchaa ñáyiú isràél quini ñáhã-yu xii-dé —cächí-dé xáhaⁿ-dẽ xií-yu.

32 Te ní xáhaⁿ tùcu-dé:

—Ní xiní-í Espíritú Yă Ndiõxí ní quee-xi andiũ vëxi cuuⁿ-xi ngúndecu ndihí ñaha-xi xli-dé, te dàtná cáá lõmá cáá Espíritú-áⁿ vëxi cuuⁿ-xi. ³³ Te yúhú ñá túú xiní-í-dé ní cùu, dico Yá Ndiõxí Yaá ní tendaha ñaha xii-í xicá cùu-í dácuañdute-í ñáyiũ, Yaá-áⁿ ñí cachí tnúhu-gá sá tõe na quini-í ngúndecu ndihí Espíritú-gá sá vëxi cuuⁿ andiũ, te tée-áⁿ taxi-dé Espíritú-gá cundecu ndihí-o. ³⁴ Te yúhú ní xiní-í-dé te xiní ndáá-í sá Dëhe Dútú Ndiõxí cúú-dě. Te xiáⁿ cächí tnúhu-í xii-ndo —cächí té Juàá xăhaⁿ-dě xii-yu.

Cue tée dîhna nuu xica cuu ndihí Jesús

³⁵ Te nduu tněé-áⁿ diu-ni xiáⁿ ndécú tẽ Juàá ndihí úú cue tée xica cuu ndihí-dé. ³⁶ Te ní xiní-dé Jësús ñúhú-gă ichi, te ní xăhaⁿ-dě xii cue tée xica cuu ndihí-dé-áⁿ:

—Chí cundèhe tée-ăⁿ, chi tée-ăⁿ cúú-dě Crìstú Yaá ní tendaha Yă Ndiõxí véxi ñuyíú-a. Te cùu-dé dàtná ìⁿ mběé quiti ío váha iní-xi —cächí-dé xăhaⁿ-dě.

³⁷ Te sá dúcáⁿ ñí cáháⁿ té Juàá núú cuè tée úú ndihí-dé-áⁿ nõu ní chinchícúⁿ-güedé Jësús. ³⁸ Te ní nchócótó-gă ndàa sátá-gă, te ní xiní-gá sá nchícúⁿ ñáhá-güedě xii-gá. Te ní xăhaⁿ-gă xii-güedé:

—¿Ná nánducu-ndo? —cachí-gá xăhaⁿ-gă xii-güedé.

Te ní xăhaⁿ-güedě:

—¿Ndèé ndécú-n, Ràbíí? —cächí-güedé xăhaⁿ-güedě xii-gá.

Te Ràbíí-áⁿ quée-xí Mèstrú tnúhu mee-güedě.

³⁹ Te ní xăhaⁿ Jësús xii-güedé:

—Chí nèhé te quini-ndó —cächí-gá xăhaⁿ-gă.

Te ní xica-güedé cuáháⁿ-güedé, te ní quexìo-güedé núú quidé vèhe-gá. Te ndècu-nì-güedé ndìhi-gá ní cuaa, chi dàtná òré caa cùmí sacuaa ní sáá-güedé.

⁴⁰ Te úú cue téé-áⁿ nǐ tñi-güedé tnúhu ní cáháⁿ té Juáá, te ní chinchícúⁿ-güedé Jèsús. Te núú úú cue téé-áⁿ, ñⁿ-dé nání-dě Ndrìxí, te ñaní-dé cúú tě Xímú, àdi Pelú chi úú òu-dé. ⁴¹ Te té Ndrìxí-áⁿ nǐ nanducu-nì-dě ñaní-dé te ní xáhaⁿ-dè:

—Ní naníhí-ndǐ téé cùu Mesiás —càchí-dé xáhaⁿ-dè.

Te Mesiás-áⁿ quée-xí Crìstú tnúhu mee-güedě, Yaá ní tendaha Yá Ndiòxí véxi ñuyíú-a. ⁴² Te ndèca té Ndrìxí ñaní-dé cuáháⁿ núú ndécú Jèsús. Te òré ní xiní ñáhá Jèsús xii té Xímú, te ní xáhaⁿ-gǎ:

—Yòhó cúú-n tě Xímú déhe té Jónás, te vitna danàni ñaha-í Céfás xii-n —càchí-gá xáhaⁿ-gǎ.

Te Céfás-ǎⁿ quée-xí Pèlú tnúhu mee-güedě.

Jèsús ní cáháⁿ-gá té Lìpé ndìhi té Natanàél

⁴³ Te nduu tnée ní sani iní-gá quíhíⁿ-gá distritú Galileá. Te ní naníhí-gǎ ñⁿ téé nàni Lìpé, te ní xáhaⁿ-gǎ xii-dé:

—Néhe ná quíhíⁿ-ó núú quíhíⁿ-í-a —càchí-gá xáhaⁿ-gǎ.

⁴⁴ Te té Lìpé-áⁿ cúú-dě téé ñuú Bètsaidá. Te òu-ni ñuú yàcáⁿ cúú ñuú té Ndrìxí ndìhi té Pèlú. ⁴⁵ Te té Lìpé ní naníhí tnáhá-dě ndìhi té Natanàél, te ní xáhaⁿ-dè:

—Ní naníhí-ndǐ téé dii cuèndú-xi ní chídó tnùnì ndíi Moisés ndìhi dava-gá cue téé ní xóo cáháⁿ tnúhu Yá Ndiòxí ndée sanaha. Te téé-áⁿ nání-dě Jèsús déhe té Chèé, téé ñuú Nazàrét —càchí-dé xáhaⁿ-dè.

46 Te ní xáhaⁿ tẽ Natanàél xii té Lìpé:

—¿Te náa ío váha càa ñuú Nazàrét nũu da yàcáⁿ quee tée cáháⁿ tnúhu Yá Ndiõxí? —càchí-dé xǎhaⁿ-dě.

Te ní xáhaⁿ tẽ Lìpé:

—Néhé ná quíhíⁿ-ó te quini-n —càchí-dé xǎhaⁿ-dě.

47 Te òré ní xiní Jèsús té Natanàél tá cùyatni-dé cuáháⁿ, te ní cáháⁿ-gá cuendá-dé te ní cachí-gá:

—Tée véxi-ǎⁿ cúú-dě mei tẽe isràél, te ñá ńⁿ ndùu dandahú-dé ñáyiú —càchí-gá xáhaⁿ-gǎ.

48 Te ní xáhaⁿ tẽ Natanàél xii Jèsús:

—¿Te nása náquini ñáhá-n? —càchí-dé xǎhaⁿ-dě.

Te ní xáhaⁿ Jèsús:

—Yúhú sa ní xiní ñáhà-í xii-n òré ndécú-gǎ-n càha yutnu ngúxí-ǎⁿ te ni tẽ Lìpé vátá cáná ñàha-gá-dé xii-n òré-áⁿ —càchí-gá xáhaⁿ-gǎ xii-dé.

49 Te sá dúcáⁿ ñí cáháⁿ-gá, núu ní xáhaⁿ tẽ Natanàél xii-gá:

—Mèstrú, yòhó cúú-n Dẽhe Dútú Ndiõxí yíndàha-n ñáyiú isràél —càchí-dé xǎhaⁿ-dě xii-gá.

50 Te Jèsús ní xáhaⁿ-gǎ:

—Cuendá sá ñí xiní ñáhà-í xii-n càha yutnu ngúxí xíǎⁿ iní ñáhá-n, dico cuéhé-gǎ núú sǎ quini-n —càchí-gá xáhaⁿ-gǎ xii-dé.

51 Te ní xáhaⁿ tùcu-gá:

—Na càchí tnúhu ndáá-í sá sàá nduu, te quini-ndó nàcaáⁿ andiú. Te quini-ndó cuè espíritú xínú cuèchi núú Yá Ndiõxí sá ndàa nuu-xi quide-xi núú cùndècu yúhú Tée cùu ñaní tnáhá-ndó nchàa-ndo —cachí-gá xáhaⁿ-gǎ xii-güedé.

2

Vico tnǎndaha íó ñuú Cànaá

¹ Te nduu úní sá dúcáⁿ ñǎ cuu te ní xóo ñⁿ vico tnǎndaha ñuú Cànaá, ñⁿ ñuú yíndèhu distritú Galileá. Te yàcáⁿ ní xíndecu nǎná Jèsús. ² Te tnàhá Jèsús ndìhi cue tée xica cuu ndìhi-gá ní cáháⁿ-yu cuáháⁿ-gá ndìhi-güedé vico-áⁿ. ³ Te òré ní ndìhi vínú, te ní xáhaⁿ nǎná Jèsús xii-gá:

—Ñá túú-gǎ vínú ndécú ndìhí-yu —càchí-aⁿ xǎhaⁿ-aⁿ.

⁴ Te ní xáhaⁿ Jèsús xii-aⁿ:

—Nǎá, ñá túú xìni ñuhu-xi da yúhú cúñaha-n cuendá vínú-áⁿ, chi vátá tnàhá-gá òré quiní-yu yoo cùu yúhú —càchí-gá xáhaⁿ-gǎ xii-aⁿ.

⁵ Te ní xáhaⁿ-aⁿ xì ñáiyu xìnu cuechi:

—Cada-ndo nchàa nacuáa na càháⁿ Jèsús —càchí-aⁿ xǎhaⁿ-aⁿ.

⁶ Te yàcáⁿ nútñǎ íñú quídi yúu te quée dàtná ñⁿ ciendú lítrú ndute ñⁿ ñⁿ quídi-áⁿ. Te ndute-áⁿ nándìhi ñáiyu isràél ndáhǎ-yu te nàqueté-yu cóhǒ-yu chí ducaⁿ tnàhí quidé-yu nàcuáa sàndáá iní-yu Yá Ndiǒxí. ⁷ Te ní xáhaⁿ Jèsús xii nchaa cue tée xìnu cuechi:

—Nadachítú-ndó ndùte ndi nchaa quídi-áⁿ —càchí-gá xáhaⁿ-gǎ xii-güedé.

Te ní nadachítú-güedé. ⁸ Te ní xáhaⁿ-gǎ:

—Vitna te tava-ndo lùha, te canehe-ndo quǎhíⁿ cuáha-ndo tée quide vico —cachí-gá xáhaⁿ-gǎ xii-güedé.

Te ducaⁿ ñǎ quide-güedé ní tava-güedé luha nèhe-güedé cuáháⁿ ní sáha-güedé tée quide vico.

⁹ Te ní xito ndéé tée quide vico-áⁿ, te sa ní nduu-xi

vínú, te ñá túú ní xíní-dé ndèé véxi-xi, dico mee cue téé xínu cuechi sa naha-güedé núú ñ tava-güedé. Ducaⁿ te téé quide vico-áⁿ ñ cana-dé téé tnãndaha.

¹⁰ Te ní xáhaⁿ-dë:

—Nchaa ñáyiú quide vico queñuhú-yu díhna-gá vínú váha. Te sa vâi vínú váha xihí-yu, te dâtnùní queñuhú-yu vínú ndàhú. Te yòhó díhna-gá vínú ndàhú ní queñuhu-n, te ndéé núú ñ ndihí-ná ní queñuhu-n vínú váha —càchí téé quide vico-áⁿ xãhaⁿ-dë xii téé tnãndaha-áⁿ.

¹¹ Te sá ñ nadatiú Jesús ndute-áⁿ ñ nduu-xi vínú cúú-xí ìⁿ chiuⁿ díhna nuu sã vã yõo tnàhí ndàcu cada ní quide-gá ñuú Cànaá, ìⁿ ñuú yíndèhu distritú Galileá, te chiuⁿ ní quide-gá-áⁿ cúú-xí ìⁿ chiuⁿ cahnu vihi, núu xíáⁿ ní cutnùní iní-yu sá ïo càhnu cuu-gá, te ní sándáá iní ñáhá nchàa cue téé xìca cuu ndihí-gá.

¹² Te sátá ñ yáha vico, te ní xica Jèsús ndihí náná-gã, ndihí cue ñaní-gá, ndihí nchaa cue téé xìca cuu ndihí-gá cuáháⁿ-yu ñuú Capèrnaúm. Te yàcáⁿ ní xíndecú-yu ìⁿ úú nduu ndihí-gá.

Jèsús ñá túú tnàhá iní-gá nàcuáa quide ñáyiú xití veñúhu

(Mt. 21:12-13; Mr. 11:15-18; Lc. 19:45-46)

¹³ Te ta cùyatni cada ñáyiú isràél vico pàscuá, te ní xica Jèsús cuáháⁿ-gá ñuú Jerusàlén. ¹⁴ Te sátá ñ sáá-gá yàcáⁿ, te ní xica-gá cuáháⁿ-gá veñúhu càhnu sá ïo cùnuyu, te xití veñúhu-áⁿ ñ xíní-gá ndécú ñáyiú dicó-yu ndicutu, mbéé ndihí lõmá, te tnàhá ñáyiú dàma díhúⁿ núcõo-yu ní xíní-gá. ¹⁵ Te ní queheⁿ-gá ìⁿ úú yoho, te ní cáunuu tnàha-gá, te ní dáyùhu-gá ñáyiú ní queé-yu quehé veñúhu, ndihí

ndicutú-yu ndihì mběě-yu. Te cue ñáyiù dàma dǐhúⁿ-ǎⁿ ní dǎngǒyo-gá dǐhǔⁿ-yu, te ní dǎndùá-gá mèsá-yu. ¹⁶ Te ní xáhaⁿ-gǎ xii cue ñáyiù dìco lómá:

—¡Queñuhu-ndo nchàa quitì-a xitì veñúhu-a! ¡Vá cáda-ndó vèhe núú yǎhu núú cúú vèhe Tǎtà-í Dútú Ndiǒxí! —càchí-gá xáhaⁿ-gǎ xii-yu.

¹⁷ Te xǐǎⁿ ní ndacu iní cue téé xìca cuu ndihì-gá sá dúcáⁿ yòdo tnuní núú tütú-gá, te càchí-xi: “Ío cùyica iní-í chi ñá cuení-yu canehe ñ-yu vehe Tǎtà-í”, duha càchí-xi núú tütú-gá.

¹⁸ Te ní xáhaⁿ cuè téé isràél xii-gá:

—¿Ná cúú sǎ vǎ yǒo tnàhí ndàcu cada, cada-n cuendá cutnùnì iní-ndí sá cúú dùha taxi tnuní ñáhá-n xii-ndí-i? —càchí-güedé xǎhaⁿ-güedě xii-gá.

¹⁹ Te ní xáhaⁿ Jèsús:

—Chí dǎngǒyo veñúhu-a, te není xitì úní nduu te sa nadaxínu-í —càchí-gá xáhaⁿ-gǎ xii-güedé.

²⁰ Te ní xáhaⁿ tùcu cue téé isràél:

—Údico ñnú cuíá ñǐ xíndecuu-güedé ní sáá veñúhu-a, te yòhó cuení-n nàdaxínu-n xitì úní-ni nduu —càchí-güedé xǎhaⁿ-güedě xii-gá.

²¹ Dico sá ñǐ cáháⁿ-gá chi ñá díú cuendá veñúhu ñǐ cáháⁿ-gá chi cuendá yiqui cùñú-gá ní cáháⁿ-gá.

²² Núu sátá ñǐ xihí-gá, te ní ndoto-gá, te òré-án ñǐ ndacu iní cue téé ní xica cuu ndihì-gá nàcuáa ní cáháⁿ-gá, núu xǐǎⁿ ní sándáá iní-güedé tnúhu yòdo tnuní núú tütú-gá. Te ducaⁿ te ní sándáá iní-güedé tnúhu ní cáháⁿ-gá.

Jèsús xini-gá nàcuáa càa iní nchaa ñáyiù

²³ Te òré ndécú Jèsús vico pàscuá, te ío vai ñáyiù ní sándáá iní ñáhá xii-gá cuendá ío titní sá vǎ yǒo

tnàhí ndàcu cada ní quide-gá ní xiní-yu. ²⁴ Dico Jèsús ñá ní cǎháⁿ-gá nchaa tnúhu ñùhu iní-gá, chi sa ní cutnùní iní-gá sá ñà túú cùu váha iní-yu. ²⁵ Te ñá túú xini ñuhu-gá ìⁿ ñáyiú cùñaha nàcuáa càa iní nchaa tnàha ñáyiú-yu, chi mee-gǎ sa nàha ndáá-gá nàcuáa càa iní-yu ncháá-yu.

3

Jèsús ndihí té Nicòdemú

¹ Ní xindecu ìⁿ tée cùu fariséú ní xínani-dě Nicòdemú, te ní cuu-dé ìⁿ tée cùnūu núú ñáyiú isràél. ² Te tée-áⁿ ñí sáháⁿ-dé niú ní cǎháⁿ ndihí-dé Jèsús, te ní xáhaⁿ-dě:

—Mèstrú, yúhú ndihí dava-gá-güedé sa nàha-ndí sá Yǎ Ndiǒxí ní tendaha ñàha-gá xii-n vëxi-n dànehé ñáhá-n xii-ndí, chi núu ñá túú Yǎ Ndiǒxí ndécú ndihí-n, te vá ndácú-n càda-n nchaa sá vǎ yǒo tnàhí ndàcu cada quide-n —cachí-dé xáhaⁿ-dě.

³ Te ní xáhaⁿ Jèsús:

—Na càchí tnúhu ndáá-í xii-n sǎ ncháá ñáyiú vá ná càcu saa tucu, te vá ndǐhu ndaha ñàha Yǎ Ndiǒxí xii-yu —càchí-gá xáhaⁿ-gǎ xii-dé.

⁴ Te ní xáhaⁿ tǎ Nicòdemú:

—¿Te nása cada ìⁿ ñáyiú sa ní yì te cacu-ni tucú-yu? ¿Náa ndǐhu tucú-yu xití nǎnǎ-yu te cacu tucú-yu xito cùu uú-ǎⁿ? —càchí-dé xáhaⁿ-dě xii-gá.

⁵ Te ní xáhaⁿ Jèsús:

—Na càchí tnúhu ndáá-í xii-n sǎ nchàa ñáyiú na ndùu ndoo nduu nine iní-xi cuú-yu ñáyiú ní na càcu saa ndihí ndute ndihí Espíritú Yǎ Ndiǒxí, ñáyiú-áⁿ ndǐhu ndaha ñàha-gá xii-yu. ⁶ Te nchaa ñáyiú càcu ñuyíú-a, chi déhe ñáyiú ñuyíú-a cùú-yu.

Te ñáyiú ní nduu ndoo ní nduu nine iní-xi, ñáyiú-áⁿ ñí nduu táhũ-yu Espíritú Yă Ndiõxí te tàxi tnuní ñáhá-ñă Espíritú-gá xii-yu. ⁷ Te vá cúñũhu-n tnũhu ní cáháⁿ-í-a, chi nchaa ñáyiú ní sándáá iní ñáhá xii-í ní nduu ndoo ní nduu nine iní-yu, te ñáyiú-áⁿ cúũ-yu dàtná ñáyiú ní nacacu saa. ⁸ Táchí ndèni xíáⁿ tècú dóho-o xico-xi, dico ñá túú xini-ó ndèè ichi véxi-xi, te ni ñà túú xini-ó ndèè ichi cuáháⁿ-xi. Ducaⁿ sãtnahá-xi cùu Espíritú-gá ndécú ndĩhi ñáyiú ní nduu ndoo ní nduu nine iní-xi — càchí-gá xáhaⁿ-gă xii-dé.

⁹ Te dàtnuní ní xicáⁿ tnúhú tùcu té Nicòdemú núú-gă, te xăhaⁿ-dĕ xii-gá:

—¿Te nása ndùu tnúhu càháⁿ-n dùcaⁿ caháⁿ-n? — càchí-dĕ xăhaⁿ-dĕ xii-gá.

¹⁰ Te ní xáhaⁿ Jèsús:

—Yòhó cúú-n ìⁿ tée cùtnuní iní-xi, chi dàcuaha-n ñáyiú isrâél, ¿te ñá tècú tnùní-n tnũhu càháⁿ-í-u?

¹¹ Te na càchí tnúhu ndáá-í xii-n sã nchũhú càháⁿ-ndí ìⁿ sá ñí tecú tnùní-ndí, te càháⁿ ndáá-ndí cuèndá ìⁿ sá ñí xiní-ndí. Dico nchòhó ñá tècú tnùní-ndó tnũhu càháⁿ-ndí. ¹² Te ñá sándáá iní-ndó tnũhu càháⁿ-í cuèndá nchaa nàcuáa cùu ñuyiú-a, te uuⁿ-gá cada-ndo ñũ cáháⁿ-í cuèndá nchaa nàcuáa cùu andiú.

¹³ Vá yõo ìⁿ sàá andiú, te cani-xi cuèndú nàcuáa càa. Chi ìⁿ dđi díi-ni yúhú véxi cuuⁿ-í andiú, te cùu-í ñaní tnáhá-ndó nchàa-ndo. Te diu-ni yàcáⁿ ndaa-í cundecu-í. ¹⁴ Te dàtná ní ndanehe ndíi Moisés cóo ñí sata caa ndíi-dđi xití yucu, ducaⁿ càda ñaha-güedé cata caa ñaha-güedĕ núú cùrúxí xii yúhú Tée cùu ñaní tnáhá-ndó nchàa-ndo ìⁿ nduu, ¹⁵ te ducaⁿ yăha-í cuèndá nchaa ñáyiú na quìndáá iní ñáhá xii-í

te nduu táhǔ-yu cundecú-yu ndihí Yá Ndiǒxí ni caa ni quíhíⁿ —càchí-gá xáhaⁿ-gǎ xii-dé.

Yá Ndiǒxí ío cùu iní-gá ñáyíu ñuyíú-a

¹⁶ Te Yá Ndiǒxí ío cùu iní-gá ñáyíu ñuyíú-a. Te ñⁿdii-ni Déhe-gá ndécú, te ní tendaha ñàha-gá ní quixi-gá ñuyíú-a, te núu na quìndáá iní ñáhá ñáyíu, te vá cuíta nihnú-yu, chi nduu táhǔ-yu cundecú-yu ndihí-gá ni caa ni quíhíⁿ. ¹⁷ Te Yá Ndiǒxí ñá túú ní tendaha-gá Déhe-gá quixi-gá ñuyíú-a dacuíta nihnu-gá ñáyíu, chi ní tendaha-gǎ Déhe-gá ní quixi-gá sá dácácu nihnu-gá ñáyíu ñuyíú-a núú ùhú núú ndàhú.

¹⁸ Nchaa ñáyíu sàndáá iní ñáhá xì Déhe-gá, te vá cuíta nihnú-yu. Te nchaa ñáyíu ñá túú sàndáá iní ñáhá xì Déhe-gá ñùhú-yu ichi cuáháⁿ-yu núú ùhú núú ndàhú, chi ñá túú sàndáá iní-yu Déhe Dútú Ndiǒxí. ¹⁹ Chi ní quixi Déhe-gá ñuyíú-a ní dándíxí tǔu-gá iní-yu cuèndá cutnùní iní-yu nàcuáa ndùu cuendá Yá Ndiǒxí te tníⁿ-yu ñⁿ ichi váha ni cùu, te ñá ní tnàhá iní-yu, chi ní cudíí-gǎ iní-yu nchaa sá cuèhé sá dúhá dácúúxí sǎ vǎha, núú xíǎⁿ tá xíta nihnú-yu cuáháⁿ. ²⁰ Te nchaa ñáyíu quide nchaa sá cuèhé sá dúhá ñǎ tnàhá iní-yu cutnùní iní-yu nàcuáa ndùu cuendá Yá Ndiǒxí, te ñá tníⁿ-yu tnúhu-gá cuèndá yùhú-yu nduu tnùní nchaa sá quídě-yu. ²¹ Te nchaa ñáyíu ñùhu ichi ndáá cuíní-yu cutnùní iní-yu nàcuáa ndùu cuendá Yá Ndiǒxí, te cùtnuní sá chíndèe ñàha-gá xií-yu, chi quide váha-yu.

Té Juáá tée dàcuandute ñàha xii ñáyíu càháⁿ váha tucu-dé cuèndá Jèsús

22 Te sáta dúcáⁿ ñí cuu, te ní quee Jèsús cuáháⁿ-gá ndihí cue tée xica cuu ndihí-gá distritú Jùdeá. Te yàcáⁿ ní xíndecu tnaa-gá ndihí-güedé ní xóo dacuàndute-güedé ñáyiu. 23 Te ndècu té Juàá ìⁿ xi-chi núú nání Ènón yatni ñúú Sàlém dácuañdute-dé ñáyiu, chi yàcáⁿ ío váha ñùhu ndute, núú xíáⁿ ní xóo quíhíⁿ ñáyiu yàcáⁿ ní xóo cuanduté-yu. 24 Duha ní cuu cútnàhá vátá ngává-gă té Juàá vecaá.

25 Te ní cacu ìⁿ cuèndú ní cáháⁿ cue tée xica cuu ndihí té Juàá ndihí ìⁿ úú cue tée israél, núú ndèdacàa sá vâha-gá cada ñáyiu cuèndá nduu ìⁿ-yu. 26 Te ní sáháⁿ-güedé núú ndécú tē Juàá ní xáhaⁿ-güedě:

—Mèstrú, tée ní quixi núú ñí xíndecu-n ndàa ingá xio yúte Jòrdán, tée dii cuèndú-xi ní cáháⁿ-n, tée-áⁿ dácuañdute-dé tnàhá-dé ñáyiu. Te ío vai ñáyiu ní chinchícúⁿ ñáhá xii-dé —càchí-güedé xáhaⁿ-güedě xii-dé.

27 Te ní xáhaⁿ tē Juàá:

—Te vá yõo ìⁿ ndàcu cada ìⁿ chiuⁿ nacuáa cuu váha iní Yă Ndiõxí, te núú ñá túú mèe-gá chíndèe ñaha-gá xii-yu. 28 Te nchòhó sa nàha-ndo sá yùhú ní cáháⁿ ndáá-í sá ñà díú Crìstú cúu-í, dico mee Yă Ndiõxí ní tendaha ñàha-gá yódó nùu-í véxi núú Yàá-áⁿ. 29 Te nchòhó xini-ndó sã ìⁿ tée tnãndaha te xichí tnãndaha ndihí-ná-dé cúndihí-dé. Te tée ní xica ndáhú ìo cùdíí ìní-dé ndèdóho-dé nchaa tnúhu càháⁿ tée tnãndaha-áⁿ. Te ducaⁿ sãtnahá-xi cùu yúhú, chi ío cùdíí ìní-í sá váí ñáyiu ta chinchícúⁿ ñáhá xii Jesús cuáháⁿ. 30 Te uuⁿ-gá cuita cuu vai ñáyiu cutnùní ìní-xi sá ìo cùnuu-gá, te yúhú cuita ndóo ndee-í quíhíⁿ —càchí-dé xáhaⁿ-dě xii-güedé.

Crìstú véxi cuuⁿ-gá andïu

³¹ Te ìⁿdìi díi-ni Crìstú Yaá véxi cuuⁿ andïu cùn^{uu}-gá núú ñùyíú-a. Te nchaa ñáyi^u ndècu ñuyíú-a cùú-yu ñáyi^u ñuyíú iha, te càháⁿ-yu sá cúú-xí ñùyíú-a. Dico Crìstú Yaá véxi cuuⁿ andïu ³² càháⁿ-gá ìⁿ sá ñǎ xini-gá, te càháⁿ-gá ìⁿ sá ñǎ tecú dóho-gá. Te ñá túú cuini-yu quindáá iní-yu tnúhu càháⁿ-gá. ³³ Te nchaa ñáyi^u tnì tnúhu càháⁿ Yaá véxi cuuⁿ andïu-áⁿ càháⁿ-yu sá tnúhu Yá Ndiòxí cúú-xí ìⁿ sá ndàá. ³⁴ Te Déhe-gá Yaá véxi cuuⁿ andïu càháⁿ-gá mee-ni tnúhu-gá. Te ñá ùhú iní-gá ní sáñaha-gǎ Espiritú-gá ndécú ndìhi Déhe-gá. ³⁵ Te Dútú Ndiòxí ío cùu iní-gá Déhe-gá, núu ní xáhaⁿ-gǎ sá méé-gǎ taxi tnùní-gá nchaandi túhú sá ío. ³⁶ Te nchaa ñáyi^u na quindáá iní ñáhá xì Déhe-gá, ñáyi^u-áⁿ cundecú-yu ndìhi-gá ni caa ni quíhíⁿ. Te nchaa ñáyi^u vá quindáá iní ñáhá xì Déhe Yá Ndiòxí ío dandòho ñaha-gá xí-yu.

4

Jèsús ndìhi ìⁿ ñaha Sàmariá

¹ Te ní níhí cue téé cùu fariséú tnúhu sá vài-gá ñáyi^u ta chinchícuⁿ ñáhá xì Jesús. Te ducaⁿ vài-gá-yu ta dàcuandute-gá cuáháⁿ dàcúxí tǎ Juáá. ² Te cuèi ñá díú mèe-gá dácuaⁿndute ñaha-gá xí-yu, dico cue téé xica cuu ndìhi-gá dácuaⁿndute ñaha-güedé xí-yu. ³ Te ní níhí Jèsús tnúhu nàcuáa càháⁿ cue téé cùu fariséú, núu ní ndee-gá distritú Jüdeá cuánuhú tucu-gá distritú Galileá.

⁴ Te ichi ñùhu-gá ní nayáha-gá distritú Sàmariá.

⁵ Te ní sáá-gá ìⁿ ñuú nání Sìcár te ñuú-áⁿ yíndèhu-xi

distritú Sàmariá. Te xíaⁿ cáá yàtni ñuhu núú nǎ sáha táhú ndíi Jàcób déhe ndíi ndíi Chèé. ⁶ Te yàcáⁿ cáá dòco ní cuu cuendá ndíi Jàcób. Te cùu-xi datná cuádava nduu ñuhu Jesús ichi, te ío ní xàú-gá nǎ ní sáá-gá yuhu dòco-áⁿ nǎ ngóo-gá ndétátú-gá. ⁷⁻⁸ Te ní xica cue téé xica cuu ndihí-gá cuáháⁿ-güedé xití ñúú Sìcár cuánguaaⁿ-güedé sá cáxí-güedé. Te yuhu dòco-áⁿ núcõo-gá ní sáá ñⁿ ñadìhí ñaha distritú Sàmariá véxi quèhnu-aⁿ ndute, te ní xáhaⁿ Jèsús:

—Taxi táhú luha ndute na còho-í —càchí-gá xáhaⁿ-gǎ.

⁹ Te ní xáhaⁿ ñadìhí-áⁿ:

—¿Ná cuendá da núú-í xicáⁿ-n ndute coho-n? Te yòhó cúú-n tée isràél, te yúhú cúú-í ñaha Sàmariá —càchí-aⁿ xǎhaⁿ-aⁿ xì-gá.

Te ducaⁿ nǎ xáhaⁿ-aⁿ, chi ñá túú ndècu váha ñáyiu isràél ndihí ñáyiu distritú Sàmariá. ¹⁰ Te ní xáhaⁿ Jèsús xii-aⁿ:

—Ñá cútnùní iní-n nǎ taxi Yá Ndiõxí xii-n, te ni ñǎ cútnùní iní-n yòo xicáⁿ ndute núú-n. Te núú dícó xìní-n yòo cuu yúhú á, te da mee-n cǎcáⁿ-n ndute núú-í coho-n, te yúhú taxi-í ndute cundecu ndihí-n núú cuáháⁿ núú véxi —càchí-gá xáhaⁿ-gǎ.

¹¹ Te ní xáhaⁿ tùcu ñadìhí-áⁿ:

—Tátá, nǎ sá quèhnu-n ndute ñá túú nèhe-n, te doco-a cùnú víhí, te ñá túú ndèé quíngueheⁿ-n ndute taxi-n coho-í. ¹² Ndíi Jàcób ñani tnáhá-ndí ní xíndecu ndèé sanaha nǎ cadúha ndíi doco-a nǎ tóo ndute ní xihí ndíi, ndihí nchaa déhe ndíi, ndihí nchaa quití ndíi, te ní ndóo cùu cuendá-ndí. ¿Te násai, te yòhó cùnùu-gá-n dàcúxí ndíi-ǎⁿ? —càchí-aⁿ xǎhaⁿ-aⁿ xì-gá.

13 Te ní xáhaⁿ Jèsús:

—Nchaa ñáyiu xìhi ndute doco-a, te vá cúú větú dúcáⁿ iní-yu chi dayìchí ñáhá-ní tùcu-xi ndute-a.

14 Dico nchaa ñáyiu na còho ndute na cuáñaha-ĩ, te vá ííⁿ ndùu-gá dayìchí ñáhá-xí ndùte-áⁿ xií-yu, chi ndute cuáñaha-ĩ cúú-xí ndùte váha-gá. Te dàtná quée nìhni ndute xití doco-a, nchaa-ni nduu ñùhu ñá túú yìchí, ducaⁿ sàtnahá-xi cada-xi chi can-deca-xi iní-yu ni caa ni quíhíⁿ, te núu na còhó-yu ndute cuáñaha yùhú —càchí-gá xáhaⁿ-gã xii-aⁿ.

15 Te ní xáhaⁿ-aⁿ:

—Tátá, taxi ndute-áⁿ ná còho-í cuendá sá vǎ dáyìchí ñáhá tnàhí-gá-xi ndute. Te vá quíxí-gǎ-í quixi quéhnu-í ndute doco-a —càchí-aⁿ xǎhaⁿ-aⁿ xii-gá.

16 Te ní xáhaⁿ Jèsús:

—Cuàháⁿ cuángàna yìi-n, te quixi-ndo ìha —cachí-gá xáhaⁿ-gã xii-aⁿ.

17 Te ní xáhaⁿ-aⁿ:

—Ñá túú yì-í —càchí-aⁿ xǎhaⁿ-aⁿ xii-gá.

Te ní xáhaⁿ tùcu Jesús:

—Ndáá càháⁿ-n sǎ ñà túú yìi-n. 18 Dico ní cuu úhúⁿ tée cǎndeca-n, te tée ndèca-n vitna chi ñá díú yìi-n cuu-dé, te ndáá càháⁿ-n sǎ ñà túú yìi-n —cachí-gá xáhaⁿ-gã xii-aⁿ.

19 Te sá dúcáⁿ ñí xáhaⁿ-gã ñùu ní xáhaⁿ tùcu-aⁿ:

—Tátá, yúhú sání iní-í sá yòhó cúú-n ìíⁿ tée càháⁿ tnúhu Yá Ndiǒxí. 20 Te cue ññaní tnáhá-ndí ní xindecu ndée sanaha ñí xóo cada càhnú-yu Yá Ndiǒxí tìndúú-a, dico nchòhó ñáyiu isràél càchí-ndó sǎ ndée ñúú Jerusàlén cada càhnu-o-gá —càchí-aⁿ xǎhaⁿ-aⁿ xii-gá.

21 Te ní xáhaⁿ Jèsús xii-aⁿ:

—Ïⁿ tnúhu na càháⁿ-í-a, te quindáá iní-n. Sa ta cùyatni sáá nduu sá ñà díú-gǎ mee-ni tìndúú-a, te ni ñà díú-gǎ mee-ni ñùú Jerusàlén cada càhnu-ndo Tátá-ó Dǔtú Ndiǒxí, chi nděni ní cuu cada càhnu-ndo-gá. 22 Te nchòhó cue ñáyiu Sàmariá chi ñá cútnùní iní-ndó ñă cúú sǎ quidé càhnu-ndo, dico nchúhú ñáyiu isràél, chi cùtnuní iní-ndí ná cúú sǎ quidé càhnu-ndí. Chi ïⁿ téé isràél véxi-dé dàcácu nihnu-dé ñáyiu cuendá vá quihíⁿ-yu núú ùhú núú ndàhú. 23 Te neni vitna ngúíta-yu cada càhnu ndisá-yu Tátá-ó Dǔtú Ndiǒxí, te cadá-yu ni yùhu ni iní-yu sá cúú-xí-gǎ, chi mee-gǎ ducaⁿ cuíní-gá cadá-yu cada càhnú-yu-gá. 24 Te Yá Ndiǒxí chi ïⁿ espíritú cúú-gǎ. Te nchaa ñáyiu na càda cahnu ñaha, te cadá-yu ni yùhu ni iní-yu sá cúú-xí-gǎ te cadá-yu dàtná càháⁿ tnúhu-gá —càchí-gá xáhaⁿ-gǎ xii-aⁿ.

25 Te ní xáhaⁿ ñàdihí-áⁿ:

—Xìní-í sá quíxí tēe cùu Mesiás, téé càchí-güedé nání Crístú. Te téé-ǎⁿ ná sàá-dé, te cachí tnúhu ndáá-dé nàcuáa cuu —càchí-aⁿ xǎhaⁿ-aⁿ xii-gá.

26 Te ní xáhaⁿ Jèsús:

—Diu téé-áⁿ cúú yǔhú téé ndàtnúhu ndihí-n —càchí-gá xáhaⁿ-gǎ xii-aⁿ.

27 Te òré-áⁿ ñí ndexìo cue téé xìca cuu ndihí-gá, te ní cuñúhu-güedé sá ndátnúhu-gá ndihí ñàdihí-áⁿ. Dico ni ïⁿ-güedé ñá ní xìcáⁿ tnúhú-güedě núú-gǎ nǔu ná cuendú ndátnúhu-gá ndihí ñàdihí-áⁿ.

28 Ducaⁿ te ní dándöo ñàdihí-áⁿ yoó ndute-aⁿ xíáⁿ, te

ní xica-aⁿ cuánuhú-aⁿ ñuú cútnũhu-aⁿ ñáyu cuendá Jèsús. ²⁹ Te ní xáhaⁿ-aⁿ:

—Chí nèhé ná quihíⁿ-ó, chí quiní-ndó nă cúú ìⁿ téé núcóo yuhu dòco-áⁿ nũ ñá díú Crístú Yaá ní tendaha Yă Ndiõxí véxi ñuyíú-a cùu-dé nũ ní cáháⁿ ndáá-dé nàcuáa cùu ndecu-í —càchí-aⁿ xăhaⁿ-aⁿ xii-yu.

³⁰ Te sá ñí níhí ñăyu ñuú-áⁿ tnũhu, xiăⁿ ní xicá-yu cuáháⁿ-yu. ³¹ Te òré vátá sàá-gá-yu xiáⁿ ñí xáhaⁿ cuè téé xica cuu ndihi-gá xii-gá:

—Mèstrú, cudèhñu na cudehñu-o —cachí-güedé xăhaⁿ-güedé xii-gá.

³² Te ní xáhaⁿ-gă:

—Ndècu ìⁿ sá cáxì-í, ìⁿ sá ñà túú xìní nchòhó —càchí-gá xáhaⁿ-gă xii-güedé.

³³ Te cue téé xica cuu ndihi-gá xitnàha-güedé:

—Váa ió ñăyu ní quixi nehe sá ñí xexi-gá nũ duha càháⁿ-gá —càchí-güedé xitnàha-güedé.

³⁴ Te ní xáhaⁿ-gă:

—Dàtná cuiní-ndó cùu vétú iní-ó òré xéxí-ó, ducaⁿ cùu vétú iní-í quidè-í nchaa nàcuáa ní cáháⁿ Yă Ndiõxí Yaá ní tendaha ñàha xii-í véxi-í ñuyíú-a, te chiùⁿ-gá ío cùdí iní-í dandihí-í. ³⁵ Te nchòhó càchí-ndó să cùmání cǔmí-gă yóó te cuu itú. Dico yúhú càchí-í sá cundehe-ndo ñăyu-ăⁿ, chí sa ndècu túha-yu, dàtná cúú-nă itú sá sà ní cuu-ná natahu-o cùú-yu, chí sa ndècu túha-ná-yu cundedóho-yu tnúhu-í. ³⁶ Te dàtná cúú ñăyu nàtahu itú chí sa cúhuⁿ yáhu-yu, ducaⁿ sãtnahá-xi cùu ñăyu na càháⁿ tnúhu-í, chí cuãñaha-ï sá ndúú tãhũ-yu na sàá nduu. Te nchaa ñăyu na tñi tnúhu-í te nduu táhũ-yu cundecu-í ndihí-yu ni caa

ni quíhíⁿ. Te dàtná cúú ñǎyiu ní chihi tatá-xi, ndíhi ñáyiu ní natahu ítú-xi cùdíí-nǎ iní-yu. Ducaⁿ sǎtnahá-xi cùu ñáyiu na càháⁿ tnúhu-í. ³⁷ Chi ndáá quée-xí nàcuáa cuáháⁿ ìⁿ cuèndú sá càchí-xi: “Tucu téé ní chihi tatá, te tucu téé ní natahu”, duha cuáháⁿ cuèndú-áⁿ. ³⁸ Te yúhú tendaha ñaha-í xii-ndo quíhíⁿ-ndó cǎháⁿ-ndó tnúhu-í núú sà ní yáha-güedé ní cǎháⁿ-güedé tnúhu-í. Te nchòhó quíhíⁿ-ndó dìcò-nǎ nduu cuèndá-ndó chiúⁿ-áⁿ — càchí-gá xáhaⁿ-gǎ xii-güedé.

³⁹ Te ío cuéhé ñáyiu ñuú-áⁿ ñí xíndedóho-yu cuèndú ní cani ñadìhí-áⁿ nǔú-yu sá Jèsús ní xáhaⁿ-gǎ nchaa nàcuáa quide-aⁿ, te xiǎⁿ ío vǎi-yu ní sándáá iní-yu Jèsús. ⁴⁰ Te ní quexió-yu núú ndécú-gǎ, te ní cǎháⁿ ndàhú-yu núú-gǎ sá quéndõ-gǎ ñuú-yu, núu xiǎⁿ ní xíndecu-gǎ ndíhí-yu úú nduu. ⁴¹ Te ío cuéhé-gǎ-yu ní sándáá iní-yu tnúhu ní cǎháⁿ mée-gǎ. ⁴² Te ní xáhǎⁿ-yu xii ñadìhí-áⁿ:

—Vitna te ñá díú mèe-ni tnúhu ní cǎháⁿ-n ní sándáá iní-ndí-gǎ, chi ní cǎháⁿ mée-gǎ ní xíndedóho-ndí vitna núu ní sándáá ndisa iní-ndí sá díú-gǎ cúú-gǎ Crìstú Yaá ní tendaha Yǎ Ndiõxí véxi ñuyíú-a dàcácu nihnu-gǎ ñáyiu núú ùhú núú ndàhú —càchí-yu xǎhǎⁿ-yu xii-aⁿ.

Jèsús quidé tǎtna-gǎ déhe ìⁿ téé ndèé chíúⁿ nǔú gobièrnú

⁴³ Te nduu úní ní nucúhuⁿ Jèsús ichi cuáháⁿ-gǎ distritú Galileá. ⁴⁴ Te cuáháⁿ-gǎ yàcáⁿ, chi mee-gǎ ní cachí-gǎ sá nǔu ìⁿ téé na càháⁿ-dé tnúhu Yá Ndiõxí ñuú núú ñí cacu-dé, te ñá túú nèhé-yu

sá yĩñùhu núú-dě. ⁴⁵ Te òré ní sáá-gá distritú Galileá, te ío váha ní cuu iní ñáhă-yu xii-gá, chi cuendá tnàhá-yu ní xíndecu ndihî-gá vico pàscuá ñuú Jerusàlén. Te yàcáⁿ ní xinî-yu nchaa sá nĩ quide-gá.

⁴⁶ Te ní sáháⁿ tucu-gá ñuú Cànaá ìⁿ ñuú yíndèhu distritú Galileá, núú nĩ nadatù-gá ndute ní nduu-xi vìnú. Te ñuú Capèrnaúm ndécú ìⁿ téé ndèé chíúⁿ nũú tēe cùu gobiernú, te téé-áⁿ cùhú ìⁿ déhe-dé. ⁴⁷ Te ní níhî-dě tnúhu sá nĩ ndee Jèsús distritú Jùdeá ní ndexìo-gá distritú Galileá, núú ní sáháⁿ-dé núú ndécú-gá, te ní cáháⁿ ndàhú-dé núú-gă sá quìhîⁿ-gá cada tátna-gá déhe-dé, chi sa ndècu-na-dé sá cùú-dé. ⁴⁸ Te ní xáhaⁿ Jèsús xii-dé:

—Nchòhó, chi vá quíndáá iní ñáhá-ndó xii-í te núu vá cádà-í ìⁿ sá vă yõo tnàhî ndàcu cada quinî-ndó —càchî-gá xáhaⁿ-gă xii-dé.

⁴⁹ Te ní xáhaⁿ tucu téé cùhú déhe-xi-áⁿ xii-gá:

—Tátá, cundee inî-n ná quìhîⁿ-ni-o càda tátna-n dēhe-í ná cuu-dé, chi càhú víhî tnàhá-dé —càchî-dé xáhaⁿ-dē xii-gá.

⁵⁰ Te ní xáhaⁿ Jèsús:

—Cuanùhú te quinî-n nă ní ndúha déhe-n —càchî-gá xáhaⁿ-gă xii-dé.

Te ní sándáá inî-dé tnúhu ní cáháⁿ Jèsús, te cuánuhú-dé. ⁵¹ Te ñùhu-dé ichi cuánuhú-dé ní sánú tnàhá ñáhá cuè téé xìnu cuechi núú-dě. Te ní xáhaⁿ-güedě sá sà ta ndúha déhe-dé cuáháⁿ.

⁵² Te ní xícáⁿ tnúhú-dě núú-güedě ná òré cúú-xí nĩ ngüíta-xi ta quètaú cuéhé-dě. Te ní xáhaⁿ-güedě:

—Icu dàtná òré caá ìⁿ sacuaa ní nchíco-dé cahni —càchî-güedě xáhaⁿ-güedě xii-dé.

53 Te tătă tēe cùhú-áⁿ nǐ ndacu iní-dé sá díú òré ní quétaú cuéhé-dě ní cáháⁿ ndihi-dé Jèsús ní xáhaⁿ-gǎ sá ndũha déhe-dé. Te xíǎⁿ nũu ndi nchàa tée-áⁿ vehe-dé ní sándáá iní-yu Jèsús.

54 Te sá nǐ quide-gá-áⁿ cúú ùú xito quide-gá sá vǎ yõo tnàhí ndàcu cada. Te sá nǐ quide-gá xito cùu uú-áⁿ cúú-xí sǎ nǐ quide-gá cútnàhá ní ndee-gá distritú Jùdeá cuánuhú-gá distritú Galileá.

5

Jèsús quidé tǎtna-gá ìⁿ tée cùhú ìⁿ xichi núú nání Bètesdá

1 Te sátá dúcáⁿ nǐ cuu, te ní tnahá nduu nǐ quide ñáyiu isráél ìⁿ vico. Te ní sáhán Jèsús ñuú Jerusalén. 2 Te ni càa xico yuhu ñuú-áⁿ ñúhú dòco, te titní yèhe-xi ndecu. Te ìⁿ yèhe-xi-áⁿ nání Yùyehe Mbéé, te yatni xíáⁿ cáá ìⁿ tanquí ndute dàna-ní-yu Bètesdá tnúhu mée-yu tnúhu hèbreú, te yuhu tànquí-áⁿ cáá ùhúⁿ corrèdór. 3 Te xití corrèdór-áⁿ xĩndecu cuéhé ñáyiu cùhú, ñáyiu cuáá, ñáyiu yacua, ñáyiu ñá cúú-gǎ candá nihnu, ndètú-yu candá ndute-áⁿ. 4 Chi nihí-yu tnúhu sá ǎma nihnu cùuⁿ ìⁿ espíritú xínú cuèchi núú Yǎ Ndiõxí, te dàcandá-xi ndute ñùhu tanquí-áⁿ. Te ñáyiu díhna nuu nà quée xití ndute-áⁿ, te òré-ni ndúha-yu. 5 Te yàcáⁿ ñútnàhá ìⁿ tée ní cuu ócò sáhúⁿ úní cuíá sǎ cùhú-dé. 6 Te ní xiní Jèsús cáá-dě, te ní cutnùní iní-gá sá nǐ cuu cuéhé cuíá cùhú-dé, te ní xáhaⁿ-gǎ:

—¿Cuìní-n ndũha-n-ǎⁿ? —càchí-gá xáhaⁿ-gǎ xii-dé.

7 Te ní xáhaⁿ tēe cùhú-áⁿ:

—Tăta, vá yõo nihí-í dàquée ñaha xì-í xití tànquí-a òré càndá ndute, chi òré cuìní-í quée-í, te ingá-ni tucú-yu quènduú-yu núu-í cuángueé-yu —càchí-dé xăhaⁿ-dě xii-gá.

⁸ Te ní xáhaⁿ Jèsús:

—Ndacuíñí, te ndaca-ni-n yùu-n, te caca-n —càchí-gá xáhaⁿ-gă xii-dé.

⁹ Te òré-ni-án nǐ ndúha tée cùhú-án, te ní ndaca-ni-dé yuu-dé, te ní xica-dé cuáháⁿ-dé. Te nduu-ăⁿ cúu-xí ndùu ndetatú ñáyi^u, ¹⁰ núu ní xáhaⁿ cuè tée isràél xii tée ní cuhu-án:

—Vitna cùu-xi nduu ndetatú-ó nǔ^u vá cúu cuìdo-n yuu-n —cachí-güedé xăhaⁿ-güedě xii-dé.

¹¹ Te ní xáhaⁿ-dě:

—Mee tée ní quide tátna ñaha xì-í ní cachí-dé sá ndácàni-í yuu-í, te caca-í —càchí-dé xăhaⁿ-dě xii-güedé.

¹² Te ní xáhaⁿ-güedě:

—¿Te ná cúu tée ducaⁿ nǐ cachí sá ndácàni-n yuu-n te caca-n-i? —càchí-güedé xăhaⁿ-güedě xii-dé.

¹³ Dico tée ní cuhú-án ñà túú ní cùtnuní iní-dé ná cúu tée ní quide tátna ñaha xì-dé, chi Jèsús òré-ni ní xica-gá cuáháⁿ-gá tnuú nchaa ñáyi^u chitu xĩndecu xíaⁿ. ¹⁴ Te sáta dúcáⁿ te ní naníhí tnáhá Jèsús ndihí tée ní quide tátna-gá-án xití veñúhu càhnu sá ïo cùn^{uu}, te ní xáhaⁿ-gă xii-dé:

—Ní xiní-n nă ní ndúha-n-va. Te vitna vá cádá-gă-n năndi sá cuèhé sá dúhá, chi núu na càda-ni-n ña, te quixi ingá cuèhé, te vîhi-gá ndoho-n —càchí-gá xáhaⁿ-gă xii-dé.

¹⁵ Ducaⁿ te ní xica tée ní cuhú-án cuăngúñaha-dě xii cue tée isràél sá Jèsús ní quide tátna ñaha-gă

xii-dé. ¹⁶ Núu sátá nǐ níhí cue tée isràél tnúhu, te ní cuu úhú iní-güedé Jèsús. Te ní cuiní-güedé cahni ñaha-güedě xii-gá cuèndá sá dúcáⁿ nǐ quíde tátna-gá nduu ndètatú-güedé. ¹⁷ Te ní xáhaⁿ Jèsús xii-güedé:

—Tàtá-í Dútú Ndiöxí quidé chùⁿ-ní-gá nǔu xiǎⁿ quidé chùⁿ-í tnàhá-í —càchí-gá xáhaⁿ-gá xii-güedé.

¹⁸ Te ní cudééⁿ-güedě sá ñǎ ní cǎnehe íí-gǎ nduu ndètatú-güedé, te ní cuiní-güedé cahni ñaha-güedě, te uuⁿ-gá ní cuiní-güedé cahni ñaha-güedě xii-gá sá nǐ cachí-gá sá Tàtá-gǎ cúú Dútú Ndiöxí, chi ní sani iní-güedé sá cuiní-gá nútnahá-gá Yǎ Ndiöxí nǔu xiǎⁿ ío ní cudééⁿ-güedé.

Jèsús Déhe Yá Ndiöxí táxí tnùní-gá

¹⁹ Te ní xáhaⁿ tùcu Jèsús xii-güedé:

—Na càchí tnúhu ndáá-í xii-ndo sǎ yǔhú chi ni ìⁿ sá ñǎ ndácù-í cada mee-í nǔu ñǎ túú mèe Tàtá-í dánèhé ñàhá-gǎ xii-í nàcuáa cada-í, chi nchaa sá quidé Tàtá-í quídè-í tnàhá-í. ²⁰ Te Tàtá-í ío cùu iní ñàhá-gǎ xii-í nǔu dànèhé ñàhá-gǎ nchaa nàcuáa quíde-gá. Te vitna ndècu vai-gǎ chùⁿ tahu-gá cada-í, chùⁿ sá vǎtá quìní-gá-ndó càda-í nàcuáa cuñúhu vìhi-ndo. ²¹ Chi Tàtá-í dandòto-gá ñáyíu ní xíhí. Te yúhú cada-í te nduu táhú nchaa ñáyíu càchí iní-í cundecu ndihí ñàhá-yu xii-í ni caa ni quíhíⁿ.

²² Te na sàá nduu te ñǎ díú Tàtá-í cada ndáá-gá cuéchi ñáyíu, chi ní cachí-gá sá yǔhú cada ndáá-í

²³ cuèndá nchaa ñáyíu canehé-yu sá yíñùhu núu-í dàtná nèhě-yu sá yíñùhu núú Tàtá-í Yá ní tendaha ñaha xii-í véxi-í ñuyíú-a. Te nchaa ñáyíu ñǎ túú nèhe sá yíñùhu núú yǔhú, te ni núú Tàtá-í ñǎ túú nèhé-yu sá yíñùhu.

24 "Te na càchí tnúhu ndáá-í xii-ndo sã nchàa ñáyiu na cùndedóho tnúhu na càháⁿ-í, te núu na quìndáá iní-yu Dútú Ndiöxí Yaá ní tendaha ñaha xii-í véxi-í ñuyú-a ña, te vá cuíta nihnú-yu chi nduu táhũ-yu cundecú-yu ndihi-gá ni caa ni quíhíⁿ. 25 Te vitna na càchí tnúhu ndáá-í xii-ndo sã nchàa ñáyiu ndècu ichi cuehé ichi duha cùú-yu dàtná ìⁿ ñáyiu ní xíhí, te vitna ní sáá nduu cùndedóho-yu tnúhu càháⁿ yúhú Déhe Dútú Ndiöxí, te nchaa ñáyiu na quìndáá iní-xi, te naníhí tàhú-yu. 26 Te dàtná quidé mèe Tàtá-í dácácu nihnu-gá ñáyiu, ducaⁿ ñí cachí-gá cada-í dácácu nihnu-í-yu. 27 Te ní cachí tucu-gá sá sáá ìⁿ nduu, te cada ndáá-í cuéchi nchaa ñáyiu ñá túú quide ndáá, chi yúhú táxí tnùn-í, te cùu-í ñaní tnáhá-ndó nchàa-ndo. 28 Te ni vã cúñũhu-ndo tnũhu càháⁿ-í, chi sáá nduu te nchaa ñáyiu ní xíhí tecú dóho-yu tnúhu càháⁿ-í. 29 Te ndoto nchaa ñáyiu ní quide váha cundecu ndihi-í-yu ni caa ni quíhíⁿ, te ndoto tnàhá nchaa ñáyiu ní quide cuèhé ní quide duha, te ñáyiu-áⁿ quíhíⁿ-yu núu ùhú núu ndàhú.

Yá Ndiöxí chíndèe tnúhu-gá Jèsús

30 "Te yúhú, chi ni ìⁿ sá ñã ndácù-í cada mee-í núu ñã díú mèe Yá Ndiöxí táuchìuⁿ-gá nàcuáa cada-í. Te quide ndáá-í cuéchi ñáyiu nàcuáa tàxi tnuní-gá cada-í, te yúhú ñá túú quide-í sá cúú ìní mèe-í chi Tàtá-í ní táuchíúⁿ-gã nàcuáa cada-í. 31 Te núu na càháⁿ-í sá mèe-í táxí tnùn-í, te vá quìndáá iní-ndó. 32 Chi Yá Ndiöxí chíndèe tnúhu ñaha-gã xii-í, te yúhú xìn-í sá tnũhu càháⁿ-gá cuèndá-í cúú-xí ìⁿ sá ndáá. 33 Te nchòhó ní téchíúⁿ-ndó cuè téé ní

sáháⁿ ní ndúcu tñhu-güedé núú tẽ Juàá nõu ná tñuhu cáháⁿ-dé cuendá-í, te tée-ãⁿ ní cáháⁿ ndáá-dé nàcuáa ndùu cuendá-í. ³⁴ Dico yúhú, chi ñá túú xìni ñuhu-í ìⁿ ñáyiũ ñuyíú-a chindee tñhu ñàhá-yu xii-í, dico té Juàá ní cáháⁿ váha-dé cuendá-í, te xĩãⁿ càchí tñuhu tucu-í cuendá quíndáá iní-ndó, te naníhí tàhú-ndó. ³⁵ Te dàtná cuìní-ndó cùu ìⁿ itì ndéñuhú te dáyehé-xi, ducaⁿ sãtnahá-xi ní cuu té Juàá, chi sacú-ni nduu ío ní cudíí ìní-ndó tñhu ní cáháⁿ-dé. ³⁶ Te váha-ni ní cáháⁿ té Juàá, dico yúhú chi ndècu nchaa sá tá quide-í véxi nàcuáa ní táuchíúⁿ Yã Ndiõxí cada-í, te nchaa xĩãⁿ cúu-xí ìⁿ sá cútnùní iní-ndó sã méé Yã Ndiõxí ní tendaha ñàha-gá xii-í véxi-í ñuyíú-a. ³⁷ Te ðiu-ni-gá chíndèe tñhu ñàha-gã xii-í, ðicó-ni sá méé-ndó ñà túú cuìní-ndó càda cuendá-ndó tñhu càháⁿ-gá, te ni ñà túú xìní-ndó nàcuáa càa-gá. ³⁸ Te ñá túú quẽe iní nchòhó tñhu càháⁿ-gá, chi ñá túú sàndáá iní ñàhá-ndó xii yúhú Déhe-gá. ³⁹ Te dàcuaha vihi-ndo tutú ndéé tñhu-gá, chi sàni iní-ndó sã xĩãⁿ-ni dacuàha-ndo te naníhí tàhú-ndó. Te váha-ni quide-ndo, chi ðiu tutú-áⁿ càháⁿ-xi cuendá-í. ⁴⁰ Te nchòhó ñá túú cuìní-ndó quíndáá iní ñàhá-ndó xì-í cuendá naníhí tàhú-ndó.

⁴¹ Te yúhú, ñá túú xìni ñuhu-í sá cáda càhnu ñàha-ndo xii-í. ⁴² Dico sa xìní-í nàcuáa sàni iní-ndó chí ñá túú cùu iní-ndó Yã Ndiõxí. ⁴³ Te yúhú véxi-í ñuyíú-a chi Tãtà-í ní tendaha ñàha-gá, te nchòhó ñá túú cuìní-ndó tñhè-ndo tñhu càháⁿ-í, dico núu quixi ìⁿ tée cáháⁿ cuendá méé-xí, chí quíndáá iní-ndó. ⁴⁴ Te ná váha nchòhó ná tñhè-ndó tñhu càháⁿ-í, te xio xio-ni quide cahnu tnaha-ndo, te ñá túú quide cuendá-ndó sã tñhu váha càháⁿ

Yă Ndiöxí cuu xii-ndo. ⁴⁵ Te vá cání ìní-ndó sǎ yǔhú ndàcáⁿ cuéchi-í núú Tǎtà-í nàcuáa quide-ndo, chi ndíi Moisés ní chídó tnùní ndíi núú tǔtú Yă Ndiöxí nàcuáa quide-ndo sá ñà túú quide váha-ndo, te mee-ndo sàni iní-ndó sǎ nánìhí tàhú-ndó cuendá tnúhu ní cáháⁿ ndíi. ⁴⁶ Chi núu nchòhó sàndáá ndisa iní-ndó tnúhu ní cáháⁿ ndíi Moisés ñá, te ducaⁿ te quindáá iní-ndó yǔhú ní cùu, chi ndíi-ǎⁿ ní chídó tnùní ndíi nàcuáa cada-í ñuyú-a vitna. ⁴⁷ Te núu ñá túú sàndáá iní-ndó tnúhu ní chídó tnùní ndíi, te diu-ni ducaⁿ càda ñaha-ndo xii-í vá quindáá iní-ndó tnúhu càháⁿ-í —càchí-gá xáhaⁿ-gǎ xii-güedé.

6

Jèsús dácàxi-gá úhúⁿ mǐ ñáyiu

(Mt. 14:13-21; Mr. 6:30-44; Lc. 9:10-17)

¹ Te sátá dúcáⁿ ñí cuu, te ní quee Jèsús cuáháⁿ-gá ingá xio yuhu làgúná Galiléa, àdi Tiberiás chi úú diù-xi. ² Te ío cuéhé ñáyiu nchìcúⁿ ñáhá xì-gá cuáháⁿ cuendá sá ñí xiní-yu nchaa sá vǎ yǒo tnàhí ndàcu cada ní quide-gá, chi ní quide tátna-gá nchaa ñáyiu cùhú. ³ Te ní sáá Jèsús ndihì cue téé xica cuu ndihì-gá ñí núú tǐndúú, te xíáⁿ ñí ngóo-gá ndihì-güedé. ⁴ Te ta cùyatni coo vico pascuá, vico quide ñáyiu israél. ⁵ Te ní xiní-gá sá ìo vǎi ñáyiu nchìcúⁿ ñáhá xì-gá cuáháⁿ, te ní xáhaⁿ-gǎ xii té Lìpé:

—¿Ndèé quíhìⁿ-ó quǐnguaaⁿ-o sǎ cáxí nchàa ñáyiu-a? —càchí-gá xáhaⁿ-gǎ xii-dé.

⁶ Te ducaⁿ ñí xáhaⁿ-gǎ xii-dé cuendá sá cuìní-gá quini-gá nása cunduu tnúhu cáháⁿ-dé, dico mee-gǎ sa xìní-gá nàcuáa cada-gá. ⁷ Te ní xáhaⁿ tǎ Lìpé xii-gá:

—Te cuëi úú ciëndú díhúⁿ denàriú ná dàndoñuhu-o cuaaⁿ-o paá, te ni vǎ tnahá caxí-yu luha luha —càchí-dé xǎhaⁿ-dě xii-gá.

⁸ Te té Ndríxí ingá téé xìca cuu ndíhi-gá, ñaní té Xímú, àdi Pelú chi úú diù-dé, ní xáhaⁿ-dě:

⁹ —Iha ndècu ìⁿ té líhli nèhe-dé úhúⁿ pàá cebàdá te úú chácá, dico nděé tnahá xéhé, te cuéhé víhí ñǎyiu —càchí-dé xǎhaⁿ-dě xii-gá.

¹⁰ Te ní xáhaⁿ Jèsús xii-güedé:

—Chí cǔñaha nà ngóo-yu nchaá-yu —càchí-gá xáhaⁿ-gǎ.

Te ñáyiu-áⁿ ñǎ ngóo-yu, te càa vihi ité núú ñǎ ngóo-yu-áⁿ, te xínu dàtná úhúⁿ mǐl mee-ni cuè téé, te diⁿ ñáyiu diⁿ ndíhi landú. ¹¹ Te ní queheⁿ Jèsús pàá, te ní ndacáⁿ táhú-gǎ núú Yǎ Ndiöxí, te ní sǎñaha-gǎ pàá-áⁿ xii cue téé xìca cuu ndíhi-gá, te cue téé-áⁿ ñǎ dácǎhñu-güedé ní xexi nchaa ñáyiu xǐxúcu-áⁿ. Te diu-ni ducaⁿ ñǎ quide-gá chácá, te ní dácǎhñu tucu-güedé-di ní xexi ñáyiu ní ndahá xití-yu. ¹² Te òré ní túhú cóhǒ-yu, te ní xáhaⁿ Jèsús xii cue téé xìca cuu ndíhi-gá sá ná nàqueheⁿ-güedé nchaa sá ñǎ quendóo cuendá sá vǎ quíhíⁿ-xi núú míhí.

¹³ Te cue téé-ǎⁿ ní naqueheⁿ-güedé nchaa sá ñǎ quendóo, te ní chítú ùxúú tídihi núú ùhúⁿ-ni pàá cebàdá. ¹⁴ Te sá ñǎ xiní-yu ní nadacàyá-gá sá ñǎ xexí-yu, xǐǎⁿ ní ngüíta-yu ní xítnàhá-yu:

—Ndáá sá tǎe-a sa ló cuëndú sá quíxí-dě ñuyíú-a cáháⁿ-dé tnúhu Yá Ndiöxí —càchí-yu xǐtnàhá-yu.

¹⁵ Te ní cutnùní iní Jèsús sá cádá yìcá-yu can-deca ñàhá-yu xii-gá quíhíⁿ cuendá cundecu-gá

quindaha ñaha-gá xii-yu ni cùu, núu xiǎⁿ ní xica tucu-gá cuáháⁿ-gá xití yucu mee dìi chícuú-gá.

Jèsús xicá-gǎ núú ndute
(Mt. 14:22-27; Mr. 6:45-52)

¹⁶ Te òré ní cuu ndiquiⁿ, te cuáháⁿ cue téé xica cuu ndihi-gá yuhu làgúná. ¹⁷ Te ní quée-güedé bàrcú cuáháⁿ-güedé ñúú Capèrnaúm cáá ndaa ingá xio yuhu làgúná, te sa ní cuu ndiquiⁿ, te ñá túú Jèsús quexìo quée-gá bàrcú ñúhú-güedě-áⁿ. ¹⁸ Te ní ngüita-xi quène táchí ñíhi, te níhi dàcandau ndéé tnáhá ndüte làgúná-áⁿ. ¹⁹ Te sa ní cuu dàtná úhúⁿ kilómetrú cuáháⁿ-güedé, te ní xiní-güedé Jèsús tá cùyatni-gá bàrcú ñúhú-güedě véxi-gá núú nduté, te ní yùhú-güedé. ²⁰ Te ní xáhaⁿ Jèsús xii-güedé:

—Yúhú véxi-í, vá yùhú-ndó —càchí-gá xáhaⁿ-gǎ xii-güedé.

²¹ Te ío ní cudíí ìní-güedé sá ñí quexìo-gá cuánguee-gá bàrcú, te òré-ni ní quexìo-güedé ndihi-gá ndéé ingá xio yuhu làgúná núú cuáháⁿ-güedé.

Ñáyiú nànducu ñaha xii Jèsús

²² Te ingá nduu-ǎⁿ xíndecu-ni nchaa ñáyiú ní quendóo yuhu làgúná. Te ní quide cuendá-yu sá ñíⁿ dìi-ná bàrcú nútñí-áⁿ ní cùu ñá túú-gǎ, chi cue téé xica cuu ndihi Jèsús ní quée-güedé bàrcú-áⁿ cuáháⁿ-güedé. Te ní níhí-yu tnúhu sá ñà túú ní quée tnáhá Jèsús. ²³ Te ñíu-ni nduu-ǎⁿ ñí quee ñíⁿ úú bàrcú ñúú Tìberíás ní sáá-xi yatni núú ñí xexí-yu pàá sá ñí ndacáⁿ táhú Jèsús núú Yǎ Ndiǒxí. ²⁴ Te ní xiní-yu sá ñà túú Jèsús ndihi cue téé xica cuu

ndihí-gá, núu ní quée-yu bàrcú-án cuäháⁿ-yu ñuú Capèrnaúm cuánúndúcú ñàhá-yu xii-gá.

Jèsús cúú-gă dàtná #ⁿ sá nchító-ó

²⁵ Te ní sáá-yu ingá xio yuhu làgúná, xíaⁿ ñí naníhí-yu Jèsús, te ní xáhăⁿ-yu xii-gá:

—Mèstrú, ¿ná òré ní sáá-n ìha? —cachí-yu xăhăⁿ-yu xii-gá.

²⁶ Te ní xáhaⁿ Jèsús:

—Na cächí tnúhu ndáá-í sá nchòhó nándücu ñaha-ndo xii-í cuendá-ni sá ñí xexi-ndo ñí ndahá xití-ndó, dico ñá díú cuendá sá ñí quide-í sá vă yõo tnàhí ndàcu cada nanducu ñaha-ndo. ²⁷ Te vă cádá cuendá-ndó să mée-ní să caxí-ndó càda chiuⁿ-ndo chi xíaⁿ vă cúdĩ-xi. Chi ío-gá xíní ñùhu-xi cada cuendá-ndó tnùhu Yá Ndiõxí te tñi-ndo, te naníhí tàhú-ndó. Te tnúhu-áⁿ cachí tnúhu yúhú Tée cùu ñaní tnáhá-ndó nchàa-ndo, te xíaⁿ candeca-xi iní-ndó ñí caa ñí quíhíⁿ, chi mee Dütú Ndiõxí ní cachí-gá sá dúcáⁿ càda-í —cächí-gá xáhaⁿ-gă xií-yu.

²⁸ Te ní xáhăⁿ-yu:

—¿Nása cada-ndí cuendá ngúnu ichi-ndí nàcuáa cuíní Yă Ndiõxí cunduu-i? —cächí-yu xăhăⁿ-yu xii-gá.

²⁹ Te ní xáhaⁿ Jèsús xií-yu:

—Yá Ndiõxí cuíní-gá sá quíndáá iní ñáhá-ndó xì yúhú, tée ní tendaha-gă véxi ñuyíú-a —cächí-gá xáhaⁿ-gă xií-yu.

³⁰ Te ní xáhaⁿ tùcú-yu xii-gá:

—¿Ná cúú să vă yõo tnàhí ndàcu cada, cada-n cùndehe-ndí cuendá quíndáá iní ñáhá-ndí xii-n-i? ¿Àdi nágá cúú să cádá-n cuendá cutnùní iní-ndí sá ndàá càháⁿ-n-í? ³¹ Chi cue ñaní tnáhá-ó ñí xíndecu

ndée sanaha nǐ xexí-yu pàá nání mànáá xití yucu dàtná yódó tnùnì nùú tütú Yă Ndiöxí nùú cächí-xi: “Yă Ndiöxí ní sãñaha-gă sá nǐ xexí-yu, te ní cuuⁿ túu-xi andïu”, duha cächí-xi nùú tütú-gá –cächí-yu xăhăⁿ-yu xii-gá.

³² Te ní xáhaⁿ Jèsús:

–Na cächí tnúhu ndáá-í xii-ndo sã ñà díú ndïi Moisés ní sãñaha ndïi pàá ní cuuⁿ andïu nǐ xexí-yu, chi mee Tătà-í ní sãñaha-gă sá nǐ xexí-yu. Te sá táxi-gă vitna cùu-xi ³³ datná pàá véxi cuuⁿ andïu càndeca-xi iní-ndó nì caa nì quíhíⁿ –cächí-gá xáhaⁿ-gă xií-yu.

³⁴ Te ní xáhăⁿ-yu xii-gá:

–Tătá, mee-ni pàá-áⁿ taxi-n caxi-ndí –cächí-yu xăhăⁿ-yu xii-gá.

³⁵ Te ní xáhaⁿ Jèsús:

–Yúhú cùú-í dàtná ìⁿ sá xéxi-ndó càndeca-xi iní-ndó. Te duha ndùu tnúhu cãháⁿ-í, chi nchaa ñáyiu na quindáá iní ñáhá xii-í, te vá ndóhó-gă-yu docó te vá ndóhó-gă-yu ndute. ³⁶ Dìcò-ni sá nchòhó ñá túú sàndáá iní ñáhá-ndó cuëi xìní ñáhá-ndó xii-í. ³⁷ Te nchaa ñáyiu na cächí Tătà-í nduu cuendá-í nasaá-yu núù-í, te ñáyiu-áⁿ vă dáquèe tíhù-í-yu. ³⁸ Te ñá díú yǔhú sá véxi cuuⁿ-í andïu te quide-í nchaa sá cúú iní mée-í, chi véxi cuuⁿ-í sá cáda-í nchaa nàcuáa ní táuchíúⁿ mée Tătà-í Dútú Ndiöxí Yaá ní tendaha ñàha xii-í véxi-í ñuyíú-a. ³⁹ Te cuení-gá sá ncháá ñáyiu ní cachí-gá nduu cuendá-í vá dáñà-í-yu cuíta nihnú-yu, te na sáa nduu te diu-ni-í dandòto-í-yu. ⁴⁰ Chi ducaⁿ nǐ cachí Dútú Ndiöxí cunduu sá ncháá ñáyiu na tnèi tnúhu cãháⁿ-í, te quindáá ndisa iní ñáhă-yu xii

yúhú Déhe-gá, te nduu táhŭ-yu cundecú-yu ndihi Yá Ndiöxí ni caa ni quíhíⁿ, te yúhú dandòto-í-yu na sàá nduu —càchí-gá xáhaⁿ-gă xií-yu.

⁴¹ Te ñá ní tnàhá iní ñáyiú isràél tnúhu ní cáháⁿ Jèsús nŭu ní ngüíta-yu ní cáháⁿ cuèhé-yu cuèndá-gá cuèndá sá ñí xáhaⁿ-gă sá méé-gă cúú-gă dàtná sá xéxí-ó vëxi cuuⁿ andiú. ⁴² Te ní xitnàhá-yu:

—¿Náa ñá díú tēe-a cùu-dé Jèsús déhe té Chèé? Nchoo xìní-ó tātá-dě, te xìní-ó năná-dě, ñá cachí-tu tēe-a sá andiú vëxi cuuⁿ-dé! —càchí-yu xitnàhá-yu.

⁴³ Te ní xáhaⁿ Jèsús xií-yu:

—Vá càháⁿ cuèhé-gá-ndó cuèndá-í, chí dáñá.

⁴⁴ Vá yõ quindáá iní ñáhá xii yúhú nŭu ñá túú mèe Tátà-í táxi cuèndá ñáhá-gă xií-yu. Te ñiú-gá ní tendaha ñàha-gá xii-í véxi-í, te yúhú dandòto-í-yu na sàá nduu. ⁴⁵ Te núú tùtú cue tēe ní xóo cáháⁿ tnúhu Yá Ndiöxí ndéé sanaha càchí-xi: “Yá Ndiöxí danèhé ñáhá-gă xií-yu tnúhu-gá”, duha càchí-xi. Te nchaa ñáyiú na cùndedóho nchaa tnúhu càháⁿ Dútú Ndiöxí, te cutúha-yu nàcuáa càháⁿ-gá, te ñáyiú-áⁿ quindáá iní ñáhă-yu xii yúhú.

⁴⁶ Te vá yõ xìní ñáhá xii Dútú Ndiöxí chi ñndi-ni yúhú xìní-í-gá, chí núú ndécú-gă ní quee-í véxi cuuⁿ-í —càchí-gá xáhaⁿ-gă xií-yu.

⁴⁷ Te xăhaⁿ tùcu-gá:

—Na càchí tnúhu ndáá-í xii-ndo sã nchaa ñáyiú na quindáá iní ñáhá xii-í, te naníhí tàhú-yu. ⁴⁸ Te yúhú cúu-í dàtná ñí sá xéxí-ndó cãndeca-xi iní-ndó, te ducaⁿ sãtnahá-xi cùu-í chí yúhú cada-í te nduu táhú-ndó cùndecu-ndo ndihi Yá Ndiöxí ni caa ni quíhíⁿ. ⁴⁹ Te cue ñaní tnáhá-ó ñí xíndecu ndéé sanaha ñí xexí-yu pàá nání mànáá xití yucu, dico

ní sáá nduu te dacuítí ní xíhí-yu. ⁵⁰⁻⁵¹ Te yúhú càháⁿ-í cuendá mée-í, chí véxi cuuⁿ-í andiú. Te cùu-í dàtná ìⁿ sá nchító-ndó, te nchaa ñáyiú na càxi te candeca-xi iní-yu ni caa ni quíhíⁿ te vá cuíta nihnu-gá-yu. Te sá táxi-í xii-ndo xiáⁿ cúu-xí yìqui cuñú-í, te cùu-xi cuendá nchaa ñáyiú niñi ñuyíú cuendá nduu táhú-yu cundecú-yu ndihí Yá Ndióxi ni caa ni quíhíⁿ —càchí-gá xáhaⁿ-gã xií-yu.

⁵² Te ní ngúíta ñáyiú isràél xítnàhá-yu:

—¿Nása cada-tu téa-a núu càchí-tu-dé sá yìqui cuñú-dé taxi-dé caxi-o-i? —càchí-yu xítnàhá-yu.

⁵³ Te ní xáhaⁿ Jèsús:

—Na càchí tnúhu ndáá-í xii-ndo sã núu na càda iní-ndó sã dàtná sá cáxi-ndó yìqui cuñú yúhú Téa cùu ñaní tnàhá-ndó nchàa-ndo, te cada tucu iní-ndó sã dàtná sá cóhó-ndó níñi-í ñá, te xiáⁿ quée-xí sã quindáá iní ñáhá-ndó ni yuhu ni iní-ndó te naníhí tàhú-ndó, te núu ñáhá te cuíta nihnu-ndo.

⁵⁴ Nchaa ñáyiú na càda iní-xi sá dàtná sá cáxi-yu yìqui cùñú-í te cohó-yu níñi-í, ñáyiú-áⁿ naníhí tàhú-yu te yúhú dandòto-í-yu na sáá nduu. ⁵⁵ Chí yìqui cùñú-í ndihí níñi-í cúu-xí mée-í. ⁵⁶ Te nchaa ñáyiú na càda iní-xi sá dàtná sá cáxi-yu yìqui cùñú-í te cohó-yu níñi-í, te ñáyiú-áⁿ ìⁿ-nã cuu-í ndihí-yu chí cundecu ndihí-í-yu. ⁵⁷ Te yúhú nchìto-í chí ducaⁿ nchìto Tàtá-í Yáá ní tendaha ñàha xii-í véxi-í ñuyíú-a. Te diu-ni ducaⁿ nchàa ñáyiú na quindáá iní ñáhá xii-í te cundecu ndihí-í-yu ni caa ni quíhíⁿ.

⁵⁸ Te yúhú cùu-í dàtná ìⁿ sá nchító-ndó véxi cuuⁿ andiú, dico ñá díú pàá sá nání mànáá ní xèxi cue ñaní tnàhá-ó ní xíndecu ndéé sanaha, chí ní

xexí-yu pàá te dacuési ní xíhí-yu. Te nchaa ñáyi
na quíndáá iní ñáhá xìi yúhú Yaá véxi cuuⁿ andi,ú,
te cundecu ndíhi-í-yu ni caa ni quíhíⁿ —càchí-gá
xáhaⁿ-gă xií-yu.

⁵⁹ Nchaa tnúhu-a ní cáháⁿ-gá xití veñúhu ñáyi
ñúú Capèrnaúm.

Jèsús càchí tnúhu-gá nàcuáa naníhí tàhú-ó

⁶⁰ Te sá dúcáⁿ nǐ cáháⁿ-gá nǔu vài ñáyi nchìcúⁿ
ñáhá xìi-gá ní xítàhá-yu:

—Vá tnǐ cuítì-o tnúhu càháⁿ-dé chi ñá díú tnúhu
sá cúú vǎha iní-ó càháⁿ-dé —càchí-yu xítàhá-yu.

⁶¹ Te ní cutnùnì iní Jèsús sá ñà túú càháⁿ váha-yu
cuendá tnúhu ní cáháⁿ-gá, núu ní xáhaⁿ-gă xií-yu:

—¿Náa ñá tnàhá iní-ndó nàcuáa càháⁿ-í-a? ⁶² Te
uuⁿ-gá cada nchòhó nǔu quínì-ndó yúhú Tée cùu
ñaní tnáhá-ndó nchàa-ndo ndaa-í núú nǐ xíndecu-í
díhna. ⁶³ Te espíritú ndécú ndíhi yiqui cuñú-ó, xǎⁿ
ndécá ñàha-xi xii-o, te núu ñá túú xǎⁿ, te yiqui
cùñú-ó ñà túú nàndíhi-xi. Dico núu nchaa tnúhu
càháⁿ-í-a quée-xi iní-ndó ñá, te quínì-ndó nǎ xéhé
candeca ñàha-xi xii-ndo núú cuáháⁿ núú vèxi. ⁶⁴ Te
dava nchòhó chi ñá túú sàndáá iní-ndó —càchí-gá
xáhaⁿ-gă xií-yu.

Te ducaⁿ nǐ xáhaⁿ-gă chi sa nàha-gá nándi cùu
ñáyi vá quíndáá iní ñáhá xìi-gá. Te ducaⁿ sà
naha-gá ndédacàa téé cuáha cuendá ñáhá xìi-gá
núú cuè téé cùu úhú iní ñáhá. ⁶⁵ Te ní xáhaⁿ tùcu
Jesús xií-yu:

—Te duha càháⁿ-í chi sa ní cachí tnúhu-í xii-ndo
sǎ vǎ yóo ñⁿ cuínì tnǐ tnúhu-í te núu ñá túú Tàtá-í
Dútú Ndiǒxí sánú ìchi ñàha-gá xií-yu —càchí-gá
xáhaⁿ-gă xií-yu.

66 Te òré-áⁿ ïo vâi ñáyiú nchìcúⁿ ñáhá xii-gá ní xócõo-yu ñá ní xica cuu-gá-yu ndihì-gá. 67 Te xiãⁿ ní xáhaⁿ Jèsús xii ndi ùxúú cue téé xica cuu ndihì-gá:

—¿Cuèní-ndó dândóo ñaha-ndo tnàhá-ndó-ãⁿ? —
càchí-gá xáhaⁿ-gã xii-güedé.

68 Te ní xáhaⁿ tẽ Xĩmú, àdi Pelú chi úú diu-dé:

—Mèstrú, ñá túú-gã ndèé quíhíⁿ-ndí, chi nchúhú nánhá-ndí sá tnúhu mee-n cùu-xi sá vãha candeca-xi iní-ndí ni caa ni quíhíⁿ. 69 Chi nchúhú sa ní sándáá iní ñáhá-ndí xii-n chi nàha-ndí sá yòhó cúú-n Crístú Déhe Dútú Ndiõxi yaá ndécú àndiú —
cachí-dé xãhaⁿ-dẽ xii-gá.

70 Te ní xáhaⁿ Jèsús:

—Nàha-ndo sá yũhú ní cáháⁿ ñáhà-í xii ndi ùxúú-ndó xica cuu ndihì ñaha-í xii-ndo, dico ñⁿ-ndo quíhu ñaha yùcu ñávãha xii-ndo —càchí-gá xáhaⁿ-gã xii-güedé.

71 Duha ní cáháⁿ Jèsús cuendá té Jùdás déhe té Xĩmú Iscarioté ñⁿ téé ñùtnahá núú ùxí ñⁿ cue téé xica cuu ndihì-gá, chi sa nàha-gá sá tẽ-ãⁿ cuãha cuendá ñáhá-dẽ xii-gá ñⁿ nduu núú cuè téé cùu úhú iní ñáhá.

7

Cue ñaní Jèsús ñá túú sándáá iní-güedé nàcuáa ndiú tnúhu càháⁿ-gá

1 Te sátá dúcáⁿ ñi cuu, te ní xica cuu Jèsús distritú Galileá, te ñá ní sáháⁿ-gá distritú Jùdeá, chi yacáⁿ cuèni cue téé israhèl cahni ñaha-güedẽ xii-gá ní cùu. 2 Te ní cuyatni nduu càdá-yu vico, vico sá dánàni-yu Vico Vehe Tnuvixiⁿ. 3 Te ní xáhaⁿ cuè ñaní Jèsús xii-gá:

—Váha-gá quíhíⁿ-n dìstrítú Jùdeá te vá cúndècu-n iha, chi yá cáⁿ cada-n nchàa sá quidé-n iha cuendá quíní nchaa ñá yiu cùndíhi ñaha xii-n ndecu yacáⁿ.
 4 Chi núu cuíní-ó quíní nchaa ñá yiu ná chiúⁿ cada-o te vá cá dá dáyuhu-o. Te yòhó cuéhé núú sá quidé-n, te cada-n na quíní nchaa ñá yiu — càchí-güedé xáhaⁿ-güedě xii-gá.

5 Ducaⁿ ñí cáháⁿ cue ñaní-gá, chi ni mèe-güedé ñá túú sàndáá iní-güedé nàcuáa ndùu tnúhu càháⁿ-gá.

6 Te ní xáhaⁿ Jèsús xii-güedé:

—Vátá tnàhá-gá òré quíhíⁿ-í dico nchòhó ndédani càa óré cuu quíhíⁿ-ndó. 7 Chi nchaa ñá yiu ñùhu ichi cuehé ichi ñaha chi ñá túú cùu úhú iní ñáhă-yu xii nchòhó. Dico yúhú chi cùu úhú iní ñáhă-yu xii-í cuendá sá càháⁿ-í sá quidě-yu nchaa sá cuéhé sá dúhá. 8 Te chí cuáháⁿ nchòhó vico chi yúhú vá quíhíⁿ-ni-í chi vátá tnàhá-gá òré quíhíⁿ-í —càchí-gá xáhaⁿ-gă xii-güedé.

9 Te ducaⁿ ñí xáhaⁿ-gă te ní ndóo-gá Galileá, te cue tée-áⁿ cuáháⁿ-güedé.

Jèsús ndécú-gă #ⁿ vico chiñuhú-yu Yá Ndiöxí

10 Dico sátá cuáháⁿ cue ñaní-gá, te ní xica-gá cuáháⁿ-gá tnàhá-gá dícó-ni sá dáyuhu cuáháⁿ-gá.
 11 Te ñá yiu isràél ñá yiu xĩndecu vico nànducú-yu Jèsús, te xĩtnàhá-yu:

—¿Ndèé ndécú Jèsús? —càchí-yu xĩtnàhá-yu.

12 Te nchaa ñá yiu xĩndecu vico xĩndatnúhu-yu cuendá-gá. Te davá-yu xĩtnàhá-yu sá ïo váha iní-gá, te davá-yu xĩtnàhá-yu sá ñà díú tée váha cùu-gá, chi dándahú-gá ñá yiu.

13 Dico mee-ni x̄cáháⁿ náh̄i-yu, chi x̄yùhú-yu cue tée cùnūu núŷ-yu.

14 Te ta ngũhuⁿ dava vico, te cuánguihu Jèsús veñúhu càhnu sá ïo cùnūu, te ní ngũíta-gá dácuaⁿha-gá ñáyiu. 15 Te ñáyiu isràel ní cuñúhu v̄ihí-yu sá ïo váha càháⁿ-gá, te ní x̄itnàhá-yu:

—¿Ná cuendá ío váha ñùhu-tu díquí t̄ee-a tnúhu cáháⁿ-dé te ñá túú ní dàcuaha-dé-i? —càchí-yu x̄itnàhá-yu.

16 Te ní xáhaⁿ Jèsús:

—Ñá díú cuendá mée-í cúú-xí s̄á dánèhé ñáhà-í xii-ndo, chi cuendá Dútú Ndiõxí Yaá ní tendaha ñàha xii-í véxi-í cúú-xí. 17 Te núu ïo dava-ndo ñi yuhu ñi iní-ndó cuiní-ndó càda-ndo nacuaá cuiní Yá Ndiõxí cunduu, te cutnùní ndáá iní-ndó s̄á tnúhu dàcuaha ñaha-í xii-ndo cùu-xi cuendá mée Dútú Ndiõxí, te ñá díú cuendá mée-í cúú-xí. 18 Te tée cuiní sá cáda càhnu ñaha ñáyiu xii-dé, tée-áⁿ càháⁿ-dé nàcuáa véxi iní mée-dě. Dico yúhú cuiní-í sá cáda càhnú-yu Dútú Ndiõxí Yaá ní tendaha ñàha xii-í véxi-í ñuyú-a, te càháⁿ ndáá-í te ñá túú dàcuandehnde-í.

19 Te ndí Moisés ní taxi ndí tnúhu sá sánú ìchi ñaha xii-ndo nacuaá cundecu-ndo, te ñi dùcaⁿ ñá túú sàndáá iní-ndó nàcuáa càháⁿ tnúhu-áⁿ. ¿Te ná cuendá cuiní-ndó càhni ñaha-ndo xii-í? —càchí-gá xáhaⁿ-gá xií-yu.

20 Te ní xáhãⁿ-yu xii-gá:

—Yucu ñávãha dàcoto ñaha xii-ó, chi vá yõo ïⁿ cuiní cahni ñaha xii-n —cachí-yu xáhãⁿ-yu xii-gá.

21 Te ní xáhaⁿ Jèsús xií-yu:

—Sá ñi quide-í ïⁿ sá vã yõo tnàhí ndàcu cada nduu cuu-xi nduu ndetatú-ó, xĩãⁿ ío ní cuñúhu

ñaha-ndo xii-í. ²² Te ndíi Moisés ní cachí ndíi sá cuãha-yu señá ñii cue landú téé, dico ñá díú mèe ndíi ni càhu iní ndíi chi ducaⁿ tnàhí ní xóo cada cue ñaní tnáhá-ó dàvá-áⁿ, núu xiãⁿ nchòhó sãha-ndo señá ñii landú téé cuëi cùu-xi nduu ndetatú-ó. ²³ Te ducaⁿ quide-ndo cuendá sá ñà túú nã cumání-ndó nũú tnũhu sá sánú ìchi ñaha xii-ndo ní dándõo ndíi Moisés. ¿Te ná cuendá cúdeéⁿ-ndó nũú-í sá nĩ quide tátna-í téé cùhú nduu ndetatú-ó-í? ²⁴ Te váha váha cada cuendá-ndó, te vá cuendá-ni cáháⁿ-ndó sã yũhú ndècuéchi-í chi ñá túú xini-ndó —càchí-gá xáhaⁿ-gã xii-yu.

Jèsús xáhaⁿ-gã xii-yu núú vëxi-gá

²⁵ Te dava ñáiyu ñuú Jerusàlén ní ngüita-yu xitnàhá-yu:

—¿Náa ñá díú tõe-áⁿ nándùcu-güedé cahni-güedé?, ²⁶ núu náí-dé nútñii núú chítú nũú tàcá-ãⁿ càháⁿ-dé, te vá yõo cùyii cúñaha xii-dé ñⁿ tnúhu. Cudana te cue téé cùchiuⁿ sandáá iní-güedé sá díú-dé cúú-dé Crìstú Yaá ní tendaha Yã Ndiõxí véxi ñuyíú-a. ²⁷ Dico nchoo xini-ó ndèé ichi véxi téé-ãⁿ, dico Crìstú ná quixi-gá chi vá yõo ñⁿ quiní ndèé ichi quixi Yaá-áⁿ —càchí-yu xitnàhá-yu.

²⁸ Te yìhi Jesús xití veñúhu càhnu sá ïo cùnuu danehe-gá ñáiyu, te ní tecú dóho-gá tnúhu càháⁿ-yu. Te níhi ní cáháⁿ-gá, te xáhaⁿ-gã xii-yu:

—¡Ná quiní-tu nchòhó ndèé ichi véxi yúhú! Yúhú véxi-í dico ñá díú sã cúú iní mèe-í, chi Yá Ndiõxí Yaá quidé nchàa-ndi túhú sá váha ní tendaha ñàha-gá xii-í véxi-í, te nchòhó ñá túú xini-ndó-gã. ²⁹ Te yúhú xini-í-gá chi núú ndécú-gã ní quee-í véxi-í,

te diu mee-gă ní tendaha ñaha-gá véxi-í –càchí-gá xáhaⁿ-gă xii-yu.

³⁰ Te sá dúcáⁿ ñí cáháⁿ-gá, núu cuíní-güedé tñi ñaha-güedě xii-gá quíhíⁿ-gá vecaá ní cùu, dico vá yõo ñⁿ ni cùyi tñi ñaha xii-gá chi vátá sàá-gá òré tñi ñaha-güedě. ³¹ Dico vâi-yu ní sándáá iní ñáhă-yu xii-gá, te ní xítñàhá-yu:

–¿Nágá cúú sã cádá Crìstú ná quìxi-gá-i?, te téa-a ío cuéhé núú sã tá quide-dé véxi. Váa diu téa-a cùu-dé Crìstú Yáá ní tendaha Yá Ndiõxí véxi ñuyíú-a –càchí-yu xítñàhá-yu.

Cue téa cùu fariséu cuíní-güedé quíhíⁿ Jèsús vecaá

³² Te ní níhí cue téa cùu fariséu tñuhu nàcuáa càháⁿ ñáyíu cuendá Jèsús, núu ní ndatnúhu-güedé ndihi cue dútú cúnùu, te ní techiùⁿ-güedé cue téa quide cuendá veñúhu cuáháⁿ-güedé cuátñi ñaha-güedě xii-gá ní cùu. ³³ Te ní xáhaⁿ-gă xii-güedé:

–Sacú duha nduu cundecu ndihi ñaha-ï xii-ndo, te núhú tucu-í núú ndécú tătà-í Yáá ní tendaha ñaha xii-í véxi-í ñuyíú-a. ³⁴ Te cuèi na nànducu ñaha-ndo dico vá ná nihí ñáhá-ndó chi vá sàá-ndó núú cundècu-í –càchí-gá xáhaⁿ-gă xii-güedé.

³⁵ Te ní ngúita ñáyíu isràél xítñàhá-yu:

–¿Ndèé quíhíⁿ-tu téa-a te vá ná nihí-ó-dě-i? ¿Àdi quíhíⁿ-dé na chítñahá-dé ñáyíu isràél ñáyíu nchítènuu nchaa ñuú xícá cuendá danèhé-dé ñáyíu grìégú? ³⁶ ¿Nása càháⁿ-tu-dé duha càháⁿ-dé: “Nanducu ñaha-ndo te vá nánihí ñáhá-ndó chi vá sàá-ndó núú cundècu-í”, càchí-tu-dé? –càchí-yu xítñàhá-yu.

Nàcuáa cada Espíritú Yă Ndiõxí iní-ó

³⁷ Te nduu ñi yáha-ná vico cùu-xi nduu cahnu vihi, te nduu-ãⁿ ñi ngúnu tn̄i Jèsús tnuú ñáyiu, te níhi ní cáháⁿ-gá, te xáhaⁿ-gã xií-yu:

—Núu ió dava-ndo yìchí-ndó ndùte, te quixi-ndo nũù-í, te coho-ndo. ³⁸ Duha càháⁿ-í chi nchaa ñáyiu na quìndáá iní ñáhá xì-í, te cada-xi iní-yu dàtná ìⁿ núú xícá ndùte, nchaa-ni nduu xica ñá túú yìchí, ducaⁿ càda-xi iní-yu núú cuaháⁿ núú vèxi dàtná càháⁿ-xi núú tùtú Yã Ndiõxí —càchí-gá xáhaⁿ-gã xií-yu.

³⁹ Te ducaⁿ ñi cáháⁿ-gá cuèndá sá quixí Espíritú Yã Ndiõxí ngúndecu ndihí nchaa ñáyiu na quìndáá iní ñáhá xì-gá, chi sáá nduu ndàa-gá andiu càda cahnu ñaha Tátá-gã xii-gá, te dàvá-áⁿ te quixi Espíritú Yã Ndiõxí cundecu ndihí-yu.

Ñá ní cùu ìⁿnuú-yu cuèndá tnúhu ní cáháⁿ Jèsús

⁴⁰ Te dava ñáyiu ní xíndedóho tnúhu ní cáháⁿ Jèsús ní xítnàhá-yu:

—Ndáá sá tée-a cùu-dé tée càchí-yu quixi cáháⁿ tnúhu Yã Ndiõxí —càchí-yu xítnàhá-yu.

⁴¹ Te dava tucú-yu xítnàhá-yu:

—Tée-a cùu-dé Crìstú Yaá ní tendaha Yã Ndiõxí véxi ñuyíú-a —càchí-yu xítnàhá-yu.

Te dava-gá tucú-yu xítnàhá-yu:

—¿Náa ndàa distritú Galileá quixi Crìstú Yaá tendaha Yã Ndiõxí quixi ñuyíú-a? ⁴² Chi núú tùtú Yã Ndiõxí càchí-xi sá Crìstú Yaá tendaha Yã Ndiõxí quixi ñuyíú-a cuu-gá ìⁿ ñaní tnáhá ndii Dàvíí, te quee-gá ñuú Belén ñuú méé ndii Dàvíí, duha càháⁿ-xi núú tùtú Yã Ndiõxí —càchí-yu xítnàhá-yu.

43 Te xǎnⁿ nǔu ñá ní cùu ìⁿnuú-yu cuèndá Jèsús.
 44 Te davá-yu cuení-yu tñí-yu Jèsús quíhíⁿ-gá vecaá ní cùu, dico ni ìⁿ-yu ñá túú ní cùyíⁿ-yu tñí ñàhá-yu xii-gá.

Cue tée cùchiuⁿ ñá túú sàndáá iní-güedé Jèsús

45 Te cue tée cuáháⁿ tñí ñaha xii Jesús ní cùu ní ndexìo-güedé núú cuè tée cùu fariséu ndihí núú cuè dútú cúnùu. Te xǎhaⁿ cuè tée cùnùu-áⁿ:

—¿Ná cuèndá ñá ní cǎndeca-ndo tée-ǎⁿ quixi? —
 càchí-güedé xǎhaⁿ-güedě.

46 Te cue tée ní sáháⁿ chùuⁿ ní xáhaⁿ-güedě:

—Ni ìⁿ tée ñá túú xìní-ndí cáháⁿ dàtná cáháⁿ tée-ǎⁿ —càchí-güedé xǎhaⁿ-güedě.

47 Te ní xáhaⁿ cuè tée cùu fariséu:

—¿Náa tñàhá nchòhó ní sàndáá iní-ndó tñùhu ndehnde cáháⁿ tée-ǎⁿ? 48 ¿Náa ñá túú xìní-ndó sǎ nì ìⁿ cue tée tàxi tñuní nchúhú, te ni ìⁿ nchúhú cue tée cùu fariséu ñá túú sàndáá iní-ndí tée-ǎⁿ ñǎ? 49 Nchaa ñáyíu tùha ñaha xii tée-ǎⁿ ñá túú sàndáá iní-yu nàcuáa cáháⁿ tñùhu sá sánú ìchi ñaha xii-o, dico cuíta nihnú-yu sá dúcáⁿ quidé-yu —càchí-güedé xǎhaⁿ-güedě xii cue tée-áⁿ.

50 Te té Nicòdemú tée ní sáháⁿ niú ní ndatnúhu-dé ndihí Jèsús cúu-dě tñàhá-dé ìⁿ tée fariséu, te ní xáhaⁿ-dě xii-güedé:

51 —Tnúhu sá sánú ìchi ñaha xii-o nàcuáa cundecu-o càchí-xi sá ndeé cundedóho-o nǎsa cáháⁿ tée tàú cuéchi cuèndá cutnùní iní-ó nǎ ní quide-dé, te dǎtnùní cáháⁿ-ó nǔu ndisa ndècuéchi-dé àdi ñá túú ndècuéchi-dé —càchí-dé xǎhaⁿ-dě.

52 Te ní xáhaⁿ-güedě:

—Cùu ní càchí sá tñàhá-ǒ cúu-n tée distritú Galileá nǔu ducaⁿ cáháⁿ-n. Dacuàha tutú yódó

tnùní tnúhu Yá Ndiõxí te quiní-n nàcuáa càháⁿ-xi sá nì ìⁿ téé véxi distritú Galileá ñá túú càháⁿ-dé tnúhu Yá Ndiõxí —càchí-güedé xáhaⁿ-güedé.

⁵³ Ducaⁿ te ndi díⁿ cuãnuhú-güedé vehe-güedé.

8

Èⁿ ñadìhí ndécú vîhi cuéchi-xi

¹ Te Jèsús cuáháⁿ-gá yucu Òlívú. ² Te sátá ñí túndaá nduu tnéé, te cuáháⁿ tucu-gá veñúhu càhnu sá ìo cùnuu. Te ìo cuéhé ñáyiu ní chítú níhnü-yu núú-gă, te ní ngóo-gá ní dánèhé ñáhá-gă xií-yu. ³ Te ní quexìo cue téé dàcuaha ñaha xií-yu nchaa tnúhu ní chídó tnùní ndíi Moisés, ndihí cue téé cùu fariséú, te ndèca-güedé ìⁿ ñadìhí ní sáá, te ñaha-áⁿ ñí xiní ñáhă-yu càháⁿ ndihí-aⁿ ìⁿ téé dico ñá díú yìⁿ-aⁿ cuu-dé, te ní sanutnì ñaha-güedé xii-aⁿ tnuú nchaa ñáyiu xíndecu núú Jèsús. ⁴ Te ní xáhaⁿ-güedé xii Jèsús:

—Mèstrú, ñadìhí-a ní xiní ñáhá ñáyiu xii-aⁿ càháⁿ ndihí-aⁿ ìⁿ téé dico ñá díú yìⁿ-aⁿ cuu-dé. ⁵ Te tnúhu ní chídó tnùní ndíi Moisés càchí-xi sá yúú cahni-o nchaa ñáyiu dîhí duha quède. Te yòhó, ¿nása càchí-n cùnduu-i? —cachí-güedé xáhaⁿ-güedé xii-gá.

⁶ Duha ní cáháⁿ-güedé chi cuendá sá cuíní-güedé coto ndeé ñáhá-güedé xii-gá nñu nása cáháⁿ-gá cuendá nùcòo nchihi ñaha-güedé xii-gá ní cáháⁿ-güedé. Te ní ngúnu ndeyí-gá te ní nguíta-gá téé-gă ndihí díquí ndáhá-gă lètrá núú ñúhú. ⁷ Te xicáⁿ tnúhú-ní tùcu-güedé núú-gă nñu ní ndonehe núú-gă, te ní xáhaⁿ-gă:

—Ndědani càa nchohó te núu ñá túú nă cuéchi quide-ndo te díhna nuu-gă-ndó chí cuăha-aⁿ yúú — cächí-gá xáhaⁿ-gă xii-güedé.

⁸ Te ní ngúnu ndeyi tucu-gá téé tucu-gá lètrá núú ñuhú. ⁹ Te sá dúcáⁿ ñí xáhaⁿ-gă xii-güedé te ní ndixi túu iní-güedé sá ñà túú quide váha mee-güedě tnahá-güedé, núu da ìⁿ da ìⁿ-güedé ní ndee, te díhna-gá cue téé cùu sacuéhé ñí ndee te ní ngúita nchicúⁿ dava-gá-güedé. Te sátá ñí ndihí-güedé ní ndee, te ní quendóo mee-nă Jèsús ndihí ñadhí-áⁿ. ¹⁰ Te ní ndonehe núú Jèsús te ní xiní-gá sá ñí ndihí-güedé cuáháⁿ te mee-nă ñadhí-áⁿ ñí ndóo-aⁿ, te ní xáhaⁿ-gă xii-aⁿ:

—¿Nděndi cuáháⁿ cue téé cächí sá ñí quide-n cuéchi? ¿Ni ìⁿ-güedé ñá ní cùndee tnúhu-güedé quíhíⁿ-n càstiú-va? —cächí-gá xáhaⁿ-gă xii-aⁿ.

¹¹ Te ní xáhaⁿ-aⁿ xii Jèsús:

—Ñáhá, chi ni ìⁿ-güedé ñá ní ndàcu-güedé — cächí-aⁿ xáhaⁿ-aⁿ.

Te ní xáhaⁿ Jèsús:

—Te ni yúhú vá dáquihíⁿ ñáhà-í castiú xii-n. Te vitna te núhú-n te vá cádá-gă-n năndi sá cuèhé sá dúhá —cächí-gá xáhaⁿ-gă xii-aⁿ.

Jèsús dándixi túu-gá iní-ó

¹² Te ní cáháⁿ tucu Jèsús núú ñayiu, te xáhaⁿ-gă xii-yu:

—Yúhú cúu-í dàtná ìⁿ ñuhú dáyèhe-í ñuyíu-a, te nchaa ñayiu na chìtnahá ñáhá xii-í, te vá cùndècu-gá-yu ichi cuèhé ichi duha, chi yúhú dándixi túu-í iní-yu cuèndá cutnùní iní-yu nàcuáa

ndùu cuendá Yă Ndiöxí, te cundecu-í ndihí-yu ni caa ni quíhíⁿ —càchí-gá xáhaⁿ-gă xii-yu.

¹³ Te ní xáhaⁿ cuè téè cùu fariséú xii-gá:

—Medìi-n caháⁿ-n sǎ cúú-n tǎe váha, te vá yõo ìⁿ-gá chindèe tnúhu ñaha xii-n núu ná téè cùu-n, dico xǎⁿ ñá túú nàndíhi-xi —càchí-güedé xǎhaⁿ-güedë xii-gá.

¹⁴ Te ní xáhaⁿ Jèsús:

—Cuëi càháⁿ-í cuendá mée-í dico nàndíhi tnúhu càháⁿ-í. Chì yúhú ñaha-í ndèe ichi véxi-í, te xini-í ndèe ichi núhú-í, dico nchòhó chi ñá túú xini-ndó ndèe ichi véxi-í, te ni ñà túú xini-ndó ndèe ichi quíhíⁿ-í. ¹⁵ Te nchòhó chi cuendá-ni càháⁿ-ndó cuendá ñáyiu núu quide váha-yu àdi ñá túú quide váha-yu. Te yúhú ñá túú càháⁿ-í cuendá ñáyiu núu quide váha-yu àdi ñá túú quide váha-yu. ¹⁶ Àdi núu càháⁿ-í dico ìⁿ tnúhu ndáá càháⁿ-í chi ñá díú-ní mée-í càháⁿ, chi tnàhá Tǎtà-í Yaá ní tendaha ñaha xii-í véxi-í ñuyúú-a càháⁿ-gá chindèe tnúhu ñaha-gă xii-í. ¹⁷ Te tnúhu sá sánú ichi ñaha xii-ndo cachí-xi sá ñu na cundecu úú cue téè càháⁿ ndáá-güedé nàcuáa cùu ìⁿ sá cundáá, te núu ìⁿ-ni tnúhu na càháⁿ-güedé ndi ndùú-güedé te xǎⁿ nándíhi-xi, duha càchí tnúhu-áⁿ. ¹⁸ Te diu-ni ducaⁿ cùu-xi yúhú chi càháⁿ-í ìⁿ tnúhu ndáá sá cúú-xí mée-í, te diu-ni dàtná càháⁿ-í càháⁿ Tǎtà-í Yaá ní tendaha ñaha xii-í véxi-í ñuyúú-a —càchí-gá xáhaⁿ-gă xii-güedé.

¹⁹ Te ní xáhaⁿ-güedë xii-gá:

—¿Te ndèe ndécú Tǎtà-n-í? —càchí-güedé xǎhaⁿ-güedë.

Te ní xáhaⁿ Jèsús:

—Te núu dicó xini-ndó yòo cuu yúhú-á te ducaⁿ te quiní-ndó Tǎtà-í. Te ni yúhú ñá túú xini-ndó

yòo cuu-í nõu xíǎⁿ ñá túú xìní-ndó Tătà-í —càchí-gá xáhaⁿ-gǎ xii-güedé.

²⁰ Duha ní cáháⁿ Jèsús nini dàcuaha-gá ñáyiu xití veñúhu núú ndécú àlcanciá díhúⁿ. Te vá yõo ñⁿ ni cùyii tñii ñaha xii-gá chi vátá sàá-gá òré tñii ñaha-güedě.

Ñáyiu ñá túú sàndáá iní ñáhá xii Jesús vá ndácü-yu quíhíⁿ-yu núú nùhú-gá cundecu-gá

²¹ Te ní xáhaⁿ tùcu Jesús xii-güedé:

—Yúhú nùhú-í te nanduçu ñàha-ndo te vá nánñí ñáhá-ndó, te cuú-ndó nõu yíca cuèchi-ndo, chi vá ndácú-ndó sàá-ndó nõu nùhú-í cundecu-í —càchí-gá xáhaⁿ-gǎ xii-güedé.

²² Te ní xítñàha cue téé isràél:

—¿Te náa cahni-dé méé-dě nõu càchí-dé sá vǎ ndácú-ó sàá-ó nõu quíhíⁿ-dé-ǎⁿ? —càchí-güedé xítñàha-güedé.

²³ Te ní xáhaⁿ Jèsús xii-güedé:

—Nchòhó chi cue téé ñuyíú-a cùu-ndo, núu ío ñùhu iní-ndó sǎ ío ñuyíú-a. Te yúhú chi téé núu ññu cùu-í nõu xíǎⁿ ñá túú sǎ ío ñuyíú-a ñùhu iní-í. ²⁴ Te xíǎⁿ nõu càchí-í sá cùú-ndó nõu yíca cuèchi-ndo, chi ñá cuiní-ndó quìndáá iní-ndó sǎ yúhú véxi cuuⁿ-í andiu, te núu xíǎⁿ diu-ni núu yíca cuèchi-ndo cùú-ndó —càchí-gá xáhaⁿ-gǎ xii-güedé.

²⁵ Te ní xícaⁿ tñuhú-güedě núú-gǎ, te xǎhaⁿ-güedě:

—¿Te ná cúú yòhó nõu ducaⁿ càháⁿ-n-í? —càchí-güedé xǎhaⁿ-güedě xii-gá.

Te ní xáhaⁿ-gǎ:

—Sa ní cachí tñuhu-í xii-ndo nděé díhna —càchí-gá xáhaⁿ-gǎ xii-güedé.

26 Te xǎhaⁿ tùcu-gá:

—Ndècu cuéhé tnũhu cáháⁿ-í cada ndáá-í cuendá nchòhó. Te Tàtá-í Yaá ní tendaha ñaha xii-í véxi-í ñuyíú-a càháⁿ-gá tnúhu ndáá, te tnúhu càháⁿ yúhú ñuyíú-a cùu-xi tnúhu ní cáháⁿ-gá ní xíndedóho-í —càchí-gá xáhaⁿ-gǎ xii-güedé.

27 Te mee-güedě ñá túú ní tècú tnùn-í-güedé sá cuendá Dútú Ndiõxí ní cáháⁿ Jèsús. 28 Te ní xáhaⁿ-gǎ xii-güedé:

—Òré ná cátá càa ñaha-ndo xii yúhú Tée cùu ñaní tnáhá-ndó nchàa-ndo núú cùrúxí cahni ñaha-ndo, te òré-áⁿ cutnùn-í iní-ndó yòo cuu-í, te ñá túú quide-í sá cúú iní mée-í, chi yúhú càháⁿ-í nàcuáa ní dánèhè ñáhá Tàtá-í 29 Yaá ní tendaha ñaha xii-í véxi-í. Te diu-gá ndécú ndìhì ñaha-gá xii-í, te ñá túú dàña nihnu ñaha-gá chi quide-í nchaa nàcuáa cùu iní-gá —càchí-gá xáhaⁿ-gǎ xii-güedé.

30 Te sá dúcáⁿ ñí cáháⁿ-gá nõu ío vài ñáyiú ní sándáá iní ñáhá xì-gá.

Ñáyiú sándáá iní ñáhá xì Yá Ndiõxí ndìhì ñáyiú ndècu ichi cuehé ichi duha

31 Te ní xáhaⁿ Jèsús xii ñáyiú isràél ñáyiú ní sándáá iní ñáhá xì-gá:

—Te núu vá dáñá ndèé-ndó càda-ndo nchaa nacuáa càháⁿ-í, te cuu ndisa-ndo cuè téé tnáhá tnúhu ndìhì-í, 32 te tecú tnùn-í-gá-ndó tnũhu ndáá, te ducaⁿ te cácu nihnu-ndo —càchí-gá xáhaⁿ-gǎ xií-yu.

33 Te ní xáhǎⁿ-yu:

—Nchúhú cúú-ndí cue ñaní tnáhá ndìi Àbrahám, te ni ìⁿ nduu ñá túú ndèé sácüdedí nihnu-ndí

ndoho tnahá-ndí nũu cáchí-õ sá dàcácu nihnu ñaha-n xii-ndí —càchí-yu xǎhǎⁿ-yu xii-gá.

³⁴ Te ní xáhaⁿ Jèsús xií-yu:

—Na càchí tnúhu ndáá-í xii-ndo sǎ nchàa ñáyiu quide nchaa sá cuèhé sá dúhá tàxi tnuní ñáhá-nǎ-xi xií-yu. ³⁵ Te cue ñáyiu xìnu cuechi te vá cúú ñⁿ-ná cuú-yu ndìhi ñáyiu dii vèhe-xi xinu cuechí-yu, dico cue déhe ñáyiu dii vèhe-xi-áⁿ chi ñⁿ-ni cùu ndìhi ñaha-güexi xií-yu. ³⁶ Te núu yúhú Yaá cúú Dèhe Yá Ndiõxí dàcácu nihnu ñaha-í xii-ndo nũú nchàa yíca cuèchi-ndo, te ndáá sá nchòhó cácu nihnu ndisa-ndo. ³⁷ Te yúhú sa xìní-í sá nchòhó cúú-ndó ñàní tnáhá ndíi Àbrahám, te dìcò-ni sá ñǎ tnáhá iní-ndó tnúhu càháⁿ-í nũu xiǎⁿ cuìní-ndó càhni ñaha-ndo. ³⁸ Te yúhú càháⁿ-í nàcuáa ní dánèhè ñáhá Tǎtà-í, te nchòhó quidé-ndó nàcuáa càháⁿ tǎtà-ndó —càchí-gá xáhaⁿ-gǎ xií-yu.

³⁹ Te ní xáhǎⁿ-yu:

—Ndíi Àbrahám cúú tǎtà-ndí —càchí-yu xǎhǎⁿ-yu xii-gá.

Te ní xáhaⁿ Jèsús:

—Núu ndisa ñàní tnáhá ndíi Àbrahám cúú-ndó, te cada-ndo nàcuáa ní xóo cada ndíi ni cùu. ⁴⁰ Te yúhú cuèi càháⁿ-í ñⁿ tnúhu ndáá nàcuáa càháⁿ Yá Ndiõxí càchí tnúhu-gá xii-í, te cuìní-ndó càhni ñaha-ndo. ¡Dico ndíi Àbrahám chi ñá túú dùcaⁿ ni quide ndíi!
⁴¹ Te nchòhó quidé-ndó nàcuáa quide tǎtà-ndó —càchí-gá xáhaⁿ-gǎ xií-yu.

Te ní xáhǎⁿ-yu:

—Nchúhú, ñá túú yàyacáⁿ ndécú tǎtà-ndí, chi ñⁿndíi Yá Ndiõxí cúú tǎtà-ndí —càchí-yu xǎhǎⁿ-yu xii-gá.

42 Te ní xáhaⁿ Jèsús:

—Núu dìcò Yá Ndiǒxí ndisa cùu Tátá-ndó te cuu iní ñáhá-ndó xii-í ní cùu chi yúhú ní quee-í núu ndécú-gã véxi-í ñuyíú-a. Te ñá túú véxi-í sá cúú iní méè-í, chi mee-gã ní tendaha ñàha-gã véxi-í. 43 Te ñá túú tècú tnùn-ndó tnùhu càháⁿ-í chi ñá túú tnáhá iní-ndó. 44 Te nchòhó chi tátá-ndó cùu yucu ñávãha núu cùdí iní-ndó quìnde-ndo nchaa nacúaa cùu iní-xi, chi ndéé òré ní ngáva ñuyíú ducaⁿ-ni ndècu-xi dacáháⁿ-xi iní-ndó sàhni tnaha-ndo. Te ñá ñⁿ ndùu cáháⁿ-xi ñⁿ tnùhu ndáá chi ñá túú xìca-xi ichi ndáá, chi mee-ni ichi tnùhu ndehnde xìca-xi chi ducaⁿ iní-xi. Te diu-xi dàcahu-xi iní-ndó dàcuandehnde-ndo. 45 Te yúhú càháⁿ-í tnùhu ndáá te ñá túú cuìní-ndó quìndáá iní ñáhá-ndó. 46 ¿Te ndédacàa nchohó xìn-ndó sã quídè-í ñⁿ sá cuèhé sá dúhá-í?, te yúhú ñá túú ñã quídè-í chi càháⁿ ndáá-í, ¿te ná cuèndá ñá túú cuìní-ndó quìndáá iní-ndó tnùhu càháⁿ-í? 47 Te nchaa ñáyiú ndècu ichi Yá Ndiǒxí, ñáyiú-áⁿ sácùndedóho-yu nchaa tnùhu càháⁿ-gã. Te nchòhó chi ñá díú ichi Yá Ndiǒxí ndécú-ndó nùu ñá túú sácùndedóho-ndo tnùhu càháⁿ-gã —càchí-gã xáhaⁿ-gã xií-yu.

Díhna-gá Crìstú sa ndècu dacúúxí ndĩ Àbrahám

48 Te ní xáhaⁿ ñáyiú isràél:

—Váha-ni càháⁿ-ndí sá tēe samaritanú cúú-n, te yucu ñávãha ndècu ndih-í-n —cachí-yu xãhãⁿ-yu xii-gã.

49 Te ní xáhaⁿ Jèsús:

—Yúhú, ñá túú yùcu ñávãha ndècu ndih-í, chi Tàtá-í quídé càhnu-í, te nchòhó da cùu úhú iní ñáhá-ndó xii-í —càchí-gã xáhaⁿ-gã xií-yu.

⁵⁰ Te xǎhaⁿ tùcu-gá:

—Yúhú, ñá túú càchí-í sá cádá càhnu ñaha-ndo, dico Dútú Ndiõxí cuíní-gá sá cádá càhnu ñaha-ndo xii-í. Te mee-gǎ cáháⁿ-gá nõu ndëdacàa-ndo quide váha, te ndëdacàa-ndo ñá túú quide váha. ⁵¹ Te na càchí tnúhu ndáá-í xii-ndo sǎ nchàa ñáyiu na tnèi tnúhu càháⁿ-í te vá cuíta nihnú-yu —càchí-gá xáhaⁿ-gǎ xií-yu.

⁵² Te ní xáhaⁿ tùcu ñáyiu isràél:

—Vitna te ní xiní ndáá-ndí sá yùcu ñávǎha ndècu ndihí-n, chi ndíi Àbrahám ndihí nchaa cue téé ní xóo cáháⁿ tnúhu Yá Ndiõxí ndéé sanaha ní xíhí-güedé, te yòhó càchí-tu-n sǎ ncháá ñáyiu na tnèi tnúhu càháⁿ-n te vá cùú-gá-yu. ⁵³ ¿Náa ío-gá càhnu cuu-ó dàcúúxí ñàní tnáhá-ndí ndíi Àbrahám-ǎⁿ? Téé-án dai ní xíhí-dé ndihí cue téé ní xóo cáháⁿ tnúhu Yá Ndiõxí ndéé sanaha. ¿Te yòhó nágá-tu cùu-n te vá cùú-n càhaⁿ-n-i? —cachí-yu xǎhǎⁿ-yu.

⁵⁴ Te ní xáhaⁿ Jèsús:

—Te núu dicó mèè-í quidé càhnu-í mèè-í ñá, te ñá túú nàndíhí sá quidè-í nõu ducaⁿ. Dico Tǎtà-í quidé càhnu ñaha-gá xii-í, te d̄iu-ni Yaá-án càchí-ndó cùu Ndiõxí-ndó. ⁵⁵ Te nchòhó chi ñá túú xìní-ndó-gǎ. Te yúhú chi xìní-í-gá. Te núu na càchí-í sá ñà túú xìní-í-gá te dàcuandehnde-í dàtná ndehnde mèe-ndo. Te yúhú chi xìní ndisa-í-gá te tnèi-í nchaa tnúhu càháⁿ-gá. ⁵⁶ Te ndíi Àbrahám ñàní tnáhá-ndó ñí xíndecu ndéé sanaha ío ní cudíí ìní ndíi sá quíní ñáhá ndíi xii-í, te ní sáá nduu ñí xìní ñáhá ndíi xii-í nõu ío ní cudíí ìní ndíi —càchí-gá xáhaⁿ-gǎ xií-yu.

⁵⁷ Te ní xáhaⁿ ñáyiu isràél xii Jèsús:

—Ni vătă cúhúⁿ-gă-n ùdico úxí cuíaⁿ-n te càchí-n sã nĩ xiní-n ndĩi Àbrahám, te ní cunaha v̄ihi ní xíhí ndíi-áⁿ —càchí-yu xãhãⁿ-yu xii-gá.

⁵⁸ Te ní xáhaⁿ Jèsús:

—Te na càchí tnúhu ndáá-í xii-ndo sã cùmání-gă cundecu ndíi-áⁿ ñuyíú-a te yúhú sa ndècu-gá-í —càchí-gá xáhaⁿ-gă xii-yu.

⁵⁹ Te sá dúcáⁿ nĩ cáháⁿ-gá nõu xíãⁿ ní quehéⁿ-yu yúú cuãha ñàhá-yu xii-gá ní cùu, te ní nguívãha-gá núũ-yu te ní quee-gá xití veñúhu cuáhãⁿ-gá.

9

Jèsús quidé tãtna-gá ñⁿ tée cuàá

¹ Te núú xicá cùu Jèsús ní naníhí-gã ñⁿ tée cuàá, te sa ducaⁿ tnàhí càa núú-dě ní cacu-dé. ² Te ní xáhaⁿ cuè tée xica cuu ndihí-gá xii-gá:

—Mèstrú, ¿ná cuendá dàcãⁿ cuàá tée-ãⁿ ní cacu-dé? ¿sá cuendá nchaa yicá cuèchi tãtã-dě, ãⁿ sã cuendá nchaa yicá cuèchi nãná-dě, ãⁿ sá cuendá nchaa yicá cuèchi mee-dě dàcãⁿ cáá-dě ní cacu-dé? —càchí-güedé xãhaⁿ-güedě xii-gá.

³ Te ní xáhaⁿ Jèsús:

—Ni ñà díú sã cuendá nchaa yicá cuèchi mee-dě, te ni ñà díú sã cuendá nchaa yicá cuèchi tãtã-dě, te ni ñà díú sã cuendá nchaa yicá cuèchi nãná-dě, chi mee Yã Ndiõxí ní cuiní-gá sá dúcãⁿ cunduú-dé sáá-dé ñuyíú-a cuendá sã ñuyíú-a quini ñáyiú nãsa cada ñãha Yã Ndiõxí xii-dé ndúha núú-dě. ⁴ Te vitna ió-gá nduu cùyica sá cadã-í nchaa chiúⁿ ní táhú Yáá ní tendaha ñãha xii-í véxi-í ñuyíú-a, chi sáá nduu te vá ndácú-gã-í cada-í chiúⁿ-gá. ⁵ Te nĩni ndècu-gá-í ñuyíú-a te dândixi túu-í iní nchaa

ñáyiú cuendá cutnùní iní-yú nàcuáa ndùu cuendá Yá Ndiöxí —càchí-gá xáhaⁿ-gǎ xii-güedé.

⁶ Te sátá dúcáⁿ ñí cáháⁿ-gá, te ní sati-gá díí-gá núú ñúhú te ní dácá-gǎ luha ñuhu ní cuáha ndéhyú, te ndéhyú-ǎⁿ ñí dácánùu-gá ndúú xio núú tée cuàá-áⁿ.

⁷ Te ní xáhaⁿ-gǎ xii-dé:

—Quíhíⁿ-n nàquete-n núú-n ndùte tanquí Silòé —càchí-gá xáhaⁿ-gǎ xii-dé. Te Silòé-áⁿ quée-xí tñuhu mèe-yu: Tée xica chiuⁿ.

Te ní sáháⁿ tée cuàá-áⁿ ñí naquete-dé núú-dě, te òré ní ndexìo-dé te sa ndèhe-dé. ⁸ Te nchaa ñáyiú ndècu yatni núú ndécú-dě ndihí nchaa ñáyiú xìní ñáhá xii-dé núú xicáⁿ ndàhú-dé ní xitnàhá-yu:

—¿Náa ñá díú tée-ǎⁿ ní xóo cácaⁿ ndàhú-dé? —càchí-yu xitnàhá-yu.

⁹ Te davá-yu càchí-yu sá díú-dě, te davá-yu càchí-yu sá ñà díú-dě, dico ducaⁿ càa-dé, càchí-yu xitnàhá-yu.

Dico mee-dě ní xáhaⁿ-dě xii-yu sá díú-dě.

¹⁰ Te ní xicáⁿ tñuhú-yu núú-dě, te xǎhǎⁿ-yu:

—¿Nása ní cuu núu ní ndúha núú-n ndèhe-n vitna? —cachí-yu xǎhǎⁿ-yu xii-dé.

¹¹ Te ní xáhaⁿ-dě:

—Tée nàni Jesús-ǎⁿ ní cadúha-dé luha ndéhyú te ní dácánùu-dé núú-í, te ní táuchíúⁿ-dě ní sáháⁿ-í tànquí Silòé ní naquete-í núú-í, te òré-áⁿ ñí cuu cundehe-í —càchí-dé xǎhaⁿ-dě xii-yu.

¹² Te ní xicáⁿ tñuhú tùcú-yu núú-dě, te xǎhǎⁿ-yu:

—¿Te ndèé ndécú tée-áⁿ? —càchí-yu xǎhǎⁿ-yu xii-dé.

Te ní xáhaⁿ-dě:

—Ná túú xìní-í —càchí-dé xǎhaⁿ-dě xii-yu.

Cue tée cùu fariséu ndátnũhu-güedé ndihi tée ní ndúha núú-xi

¹³ Te ndèca-güedé tée ní ndúha núú-xi-án cuáhán núú cuè tée cùu fariséu. ¹⁴ Te cuendá sá ndùu ndetatú-yu ní cadúha Jèsús ndéhyú ní dácánùu-gá núú tõe-án te ní ndúha, ¹⁵ xíáⁿ núu ní xicáⁿ tnúhú cuè tée cùu fariséu núú-dě, te xáhaⁿ-güedé:

—¿Nása ní cuu ní ndúha núú-n? —càchí-güedé xáhaⁿ-güedě xii-dé.

Te ní xáhaⁿ-dě xii-güedé:

—Íⁿ tée ní dácánùu-dé ndéhyú núù-í te ní sáháⁿ-í ní naquete-í, te ní cuu ndèhe-í vitna —càchí-dé xáhaⁿ-dě xii-güedé.

¹⁶ Te dava cue tée cùu fariséu ní xítnàha-güedé:

—Ñá díú Yá Ndiõxí ní tëndaha ñaha-gá xii tée-ãⁿ véxi-dé núu duha quide-dé nchaa sá vã yõo tnàhí ndàcu cada, te ñá túú sàndáá iní-dé canehe íi-dě nduu ndetatú-ó —càchí-güedé xítnàha-güedé.

Te dava-güedé ní xítnàha-güedé:

—¿Nása ndacu-dé cada-dé sá vã yõo tnàhí ndàcu cada te núu cùu-dé tée yicá cuèchi? —càchí-güedé xítnàha-güedé.

Te ñá túú ní cùu íⁿnuu-güedé tnúhu ní cáháⁿ-güedé. ¹⁷ Te ní xicáⁿ tnúhú tùcu-güedé núú tõe ní ndúha núú-xi-án, te xáhaⁿ-güedě:

—Te yòhó, ¿nása càchí-n cuendá tée ní quide tátna núú-n te ní ndúha? —càchí-güedé xáhaⁿ-güedě xii-dé.

Te ní xáhaⁿ-dě:

—Yúhú càchí-í sá íⁿ tõe càháⁿ tnúhu Yá Ndiõxí cúú-dě —càchí-dé xáhaⁿ-dě xii-güedé.

¹⁸ Dico cue tée isràel ñá ní sàndáá iní-güedé sá cuáá-dé ní cùu, chi cuendá sa ní ndúha núú-dě ní

xiní ñáhá-güedě, te xiǎⁿ nũ ní cana-güedé tătă-dě ndihî năná-dě, ¹⁹ te ní xícáⁿ tnúhú-güedě núŭ-yu, te xăháⁿ-güedě:

—¿Diu téa déhe-ndo tĕe căchî-ndó cuăá-dé ní cacu-dé-ăⁿ? ¿Te nása ní cuu ní ndúha núú-dě? — căchî-güedé xăháⁿ-güedě xîi-yu.

²⁰ Te ní xăháⁿ tătă-dě ndihî năná-dě:

—Diu déhe-ndí cúú-dě te sa cuăá ndisa-dé ní cacu-dé, ²¹ dico ñá túú xîní-ndí nása ní cuu ní ndúha núú-dě, te ni ñà túú xîní-ndí yoo ní guide tătna. Chí căcáⁿ tnúhú núŭ méé-dě xiǎⁿ nũ sa săcuéhé-dě, te na căháⁿ-dé nũ nása ní cuu ní ndúha núú-dě —căchî-yu xăhăⁿ-yu xii-güedé.

²² Duha ní căháⁿ tătă-dě ndihî năná-dě ní xăhăⁿ-yu xii-güedé cuëndá sá yùhú-yu cue tĕe cùnũu núú ñăyiu isrăél, chi cue tĕe-ăⁿ sa ní ndatnúhu-güedé ní cuu ĩⁿnuu-güedě sá nũ ndĕdacăa ñăyiu na căháⁿ sá Jĕsús cúú-gă Crîstú Yáá ní tendaha Yă Ndiǒxí véxi ñuyíú-a, te vá dáñá-gă-güedé quíhu-yu veñúhu. ²³ Núu xiǎⁿ ní xăháⁿ tătă-dě ndihî năná-dě sá ná căcáⁿ tnúhú-güedé núú méé-dě chi sa sacuéhé-dě.

²⁴ Te xiǎⁿ nũ ní cana tucu-güedé tĕe ní ndúha núú-xi-áⁿ, te ní xăháⁿ-güedě:

—Căháⁿ-n ĩⁿ tnúhu ndáá chi Yá Ndiǒxí ndéhé ndihî-gă năcuăa ní cuu ní ndúha núú-n, chi nchúhú xîní-ndí sá dîcô ĩⁿ tĕe ndĕcu yícă cuĕchi-xi cùu tĕe căchî-n ñî guide tătna núú-n —căchî-güedé xăháⁿ-güedě xii-dé.

²⁵ Te ní xăháⁿ-dĕ:

—Yúhú, ñá túú xîní-í te núu tĕe ndĕcu yícă cuĕchi-xi cùu-dé àdi ñáhá. Dîcô-ni sá xîní-í sá

cuàá-í ní cùu te vitna ní cuu cundehe-ĩ —càchí-dé xǎhaⁿ-dě xii-güedé.

26 Te ní xícáⁿ tnúhú tùcu-güedé núú-dě, te xǎhaⁿ-güedě:

—¿Nása ní quide ñaha-dě xii-n te ní ndúha núú-n-í? —càchí-güedé xǎhaⁿ-güedě xii-dé.

27 Te ní xáhaⁿ-dě:

—Yúhú sa ní cáháⁿ-í te ñá túú quide cuendá-ndó. ¿Te ná cuendá cuìní-ndó càchí tnúhu-ni tucu-í? ¿Á tnàhá-ndó cuìní-ndó quìndáá iní-ndó tnúhu càháⁿ-dé? —càchí-dé xǎhaⁿ-dě xii-güedé.

28 Te ní cudééⁿ-güedě núú-dě, te ní xáhaⁿ-güedě xii-dé:

—Te núu yòhó cuìní-n chìnchícúⁿ-n tē-ǎⁿ te cuàháⁿ, dico nchúhú chi canchicúⁿ nihnu nahi-ni-ndí nàcuáa ní cáháⁿ ndí Moisés. 29 Te nchúhú chi nàha-ndí sá Yǎ Ndiǒxí ní cáháⁿ ndihí-gá ndí Moisés, dico tēe càchí-n-ǎⁿ chi ni ñà túú xìní-ndí ndéé tēe cùu-dé —càchí-güedé xǎhaⁿ-güedě xii-dé.

30 Te ní xáhaⁿ tēe ní ndúha núú-xi-áⁿ:

—¿Te náa ñá díú nchòhó càchí-ndó sǎ ïo túha-ndo? Te núu ducaⁿ càháⁿ-ndó sǎ ñà túú xìní-ndó ndéé tēe cùu-dé, te ñiu-dé ní quide tátna-dé núú-í ní ndúha —càchí-dé xǎhaⁿ-dě xii-güedé.

Te xǎhaⁿ tùcu-dé:

31 —Xìní-ó sǎ Yǎ Ndiǒxí ñà túú tédóho-gá tnúhu càháⁿ ñáyiú quide nchaa sá cuéhé sá dúhá, chi nchaa ñáyiú quide cahnu ñaha xii-gá te quidé-yu nchaa nàcuáa cùu iní-gá, te ñáyiú-áⁿ tédóho-gá tnúhu càháⁿ-yu. 32 Te ñá ñíⁿ ndùu cáháⁿ ñáyiú cuendá ñíⁿ tēe cada tátna núú ñíⁿ ñáyiú cuàá ndéé

ní cacu-xi te ndúha. ³³ Te núu ñá díú mèe Yá Ndiõxí ní tëndaha ñaha-gá xii tée-ãⁿ véxi-dé ñá, te vá ndácú-dě cada tátna-dé núu-í ní cùu —cachí-dé xãhaⁿ-dě xii-güedé.

³⁴ Te ní xáhaⁿ-güedě:

—Dico yòhó ndèé yatni vài cuéchi sa ta quìde-n véxi, ¿te vitna nacanú ichi ñaha-n xii-ndí cáháⁿ-n-ãⁿ? —càchí-güedé xãhaⁿ-güedé xii-dé.

Te ní queñuhu ñaha-güedě xii-dé tnuú-güedé ñá túú ní dàña-gá-güedé níhí tnáhá ndìhi ñaha-dé xii-güedé.

Ñáyiú ñá túú ndìxi túu iní cuendá nchaa sá cuèhé sá dúhá quìdé-yu

³⁵ Te ní níhí Jèsús tnúhu sá ñí queñuhu-güedé téé ní cuhú núu-xi-áⁿ tnuú-güedé cuendá sá vã tnáhá tnúhu ndìhi ñaha-gã-dé xii-güedé, te ní naníhí ñáhá-gã xii-dé te ní xáhaⁿ-gã:

—¿Sàndáá iní-n Dèhe Yá Ndiõxí-ãⁿ? —càchí-gá xáhaⁿ-gã.

³⁶ Te ní xáhaⁿ tõe ní cuhú núu-xi-áⁿ:

—Mèstrú, cachí tnúhu núu ndèé ndécú tõe-áⁿ cuendá quíndáá iní-í-dé —càchí-dé xãhaⁿ-dě xii-gá.

³⁷ Te ní xáhaⁿ Jèsús:

—Sa xìní-n-dě chi diu-dé cúu yùhú téé ndàtnúhu ndìhi-n —càchí-gá xáhaⁿ-gã xii-dé.

³⁸ Te ní ngüíñí xítí-dě núu-gã, te ní xáhaⁿ-dě:

—Xítóhó Jesucrístú, sàndáá iní ñáhá-í xii-n —càchí-dé xãhaⁿ-dě xii-gá.

³⁹ Te ní xáhaⁿ tùcu Jèsús:

—Yúhú véxi-í ñuyíú-a cada ndáá-í cuéchi ñáyiú. Te nchaa ñáyiú ñá túú quìde váha cùú-yu dàtná ñⁿ ñáyiú cuàá, dico nchaa ñáyiú cùtnuní iní-xi

sá ñà túú quide váha, te núu na quíndáá iní-yu tnúhu càháⁿ-í, te cada iní-ndó sã dàtná sá ñí nacaáⁿ núũ-yu chi tní^í-yu tnúhu càháⁿ-í. Te ñáyiú cãchí sá quidé vãha vá nõu núu-yu cuéchi-yu chi quesàhá-yu sá ïo ndáá quidě-yu, ñáyiú-áⁿ cúũ-yu dàtná ñⁿ ñáyiú cuàá, chi vá ndíxí tũu iní-yu sá ñà túú quide váha-yu ndècú-yu, te vá tní^í-yu tnúhu càháⁿ-í —cãchí-gá xáhaⁿ-gã xii-dé.

⁴⁰ Te sá dúcáⁿ ñí cáháⁿ-gá, núu ní cáháⁿ ñⁿ úú cue tée cùu fariséú, te xãhaⁿ-güedě:

—¿Te náa tnàhá nchúhú cuàá-ndí cáháⁿ-n-ãⁿ? —
cãchí-güedé xãhaⁿ-güedě xii-gá.

⁴¹ Te ní xáhaⁿ Jèsús:

—Te núu dicó nchòhó cuàá-ndó ñá, te vá cùndècu cuéchi-ndo ni cùu, dico cãchí-ndó sã ndéhé-ndó ñⁿ sá quidé-ndó te ñá ndàá, núu xiãⁿ ío ndècu cuéchi-ndo.

10

Jèsús càháⁿ-gá cuendá cùrrálí mběé

¹ Te na cãchí tnúhu ndáá-í xii-ndo sã ñⁿ tée ñá túú quíhu ndàa yuyehe ñⁿ currálí mběé, te cùtexínu-ni na cuídó-dé, tée-áⁿ cúú-dě ñádúhú. ² Dico tée quíhu ichi yèhe currálí-güedi, tée-áⁿ cúú-dě xítohó-güedi. ³ Te tée ndéé yèhe currálí-güedi nacaáⁿ-dé te cuánguìhu xítohó-güedi te ní cáháⁿ-dé, te ní nucúhuⁿ ndudú ñáhá-güedi xii-dé. Te ní cáháⁿ díú-dě-güedi te ní queñuhu-dé-güedi cùrrálí. ⁴ Te sátá ñí quee-güedi cùrrálí, te ní ngódó núú-dě núú-güedi, te ní ngüíta nchicúⁿ ñáhá-güedi xii-dé chi ní nucúhuⁿ ndudú ñáhá-güedi. ⁵ Te ñá túú chìnchícúⁿ-güedi ñⁿ tée tàtú, chi nùcúhuⁿ

ndudú-güedi sá ñà díú xǐtohó-güedi cùu-dé, núu xiǎⁿ xínú-güèdi núú-dě —càchí-gá xáhaⁿ-gǎ xii-güedé.

⁶ Duha ní cáháⁿ Jèsús cuèndá sá cuìní-gá dacuàhá-yu tnúhu-gá ní cùu, dico ñá ní tècú tnùnì-yu nása ndùu tnúhu ní cáháⁿ-gá.

Jèsús cúu-gǎ dàtná #ⁿ toli

⁷ Te ní xáhaⁿ tùcu Jèsús xii-güedé:

—Na càchí tnúhu ndáá-í xii-ndo sǎ yǔhú cùu-í dàtná #ⁿ yèhe currálí núú ndǐhu cue mbéé.

⁸ Te nchaa cue téé sa yòdo nuu-gá ní quixi ní dándàhú-güedé ñáyiú cùu-güedé dàtná ñádúhú dùhu-güedé cue mbéé ní cùu, dico ñá ní quide cuendá ñáhá-güèdi xii-güedé, chi ní cutnùnì iní-güedi sá ñà díú xǐtohó-güedi cùu-güedé. ⁹ Te yúhú cùu-í dàtná yuyèhe currálí cue mbéé. Te ducaⁿ sǎtnahá-xi cùu-í chi nchaa ñáyiú na tùha ñaha xii-í te naníhí tàhú-yu. Te cùu-yu dàtná cue mbéé quiti xǐquee cùrrálí-xi cuáháⁿ-güedi núu cáá ité caxi-güedi, te dàtnùnì cuándihu-ná-güedi cùrrálí, ducaⁿ sǎtnahá-xi cùu-yu.

¹⁰ Ñádúhú òré véxi-dé chi dùhu-dé, sàhni-dé te dànaa-dé mbéé, dico yúhú chi véxi-í cuèndá sá nánìhí tàhú-ndó te ío cudǐ iní-ndó cùnu cuechi-ndo núú Dǔtú Ndiǒxí nǐ caa nǐ quihíⁿ. ¹¹ Te yúhú cùu-í dàtná #ⁿ toli téé ío nèhe cuendá mbéé-xi, chi téé-áⁿ cuèi na cùu-dé sá cúu-xi mbéé-dě cuèndá-nǎ sá ná cǎcu-güedi. ¹² Te núu #ⁿ téé na còto ñaha xii-güedi, te téé-áⁿ cuèndá-ni sá ñúhú yǎhu-dé xító-dě-güedi. Te núu na quìnì-dé sáá #ⁿ quiti dééⁿ te dàña-dé-güedi xìnu-dé, te ndìhi-güedi xité nuu ñaha quiti dééⁿ-ǎⁿ, chi ñá díú mèi xǐtohó-güedi cùu-dé. ¹³ Chi cuèndá-ni

sá ñúhú yǎhu-dé xító-dě-güedi núu ñá túú nǎ ndìhú iní-dé cuèi na dàndìhi ñaha quiti cuihna. ¹⁴ Te yúhú cùu-í dàtná ìⁿ téé ío váha xító mbéé-xi, chi téé-áⁿ da ìⁿ da ìⁿ-dì xìní-í-dé nàcuáa ndáa-dì, te ducaⁿ xìní ñáhá-güedi xii-dé. Te ducaⁿ sǎtnahá-xi cùu yúhú ndìhi nchaa ñáyiú sàndáá iní ñáhá xii-í, chi yúhú xìní-í-yu te ducaⁿ mée-yu xìní ñáhǎ-yu xii-í.

¹⁵ Te ñu-ni ducaⁿ cùu-í ndìhi Tǎtà-í, chi xìní ñáhá-gǎ xii-í te xìní-í-gá. Te sáá nduu cùu-í cuendá nchaa ñáyiú sàndáá iní ñáhá xii-í. ¹⁶ Te ndècu-gá ñáyiú vátá quìndáá iní ñáhá-gǎ xii-í. Te xìní ñuhu-xi cundedóho-yu tnúhu-í te quìndáá iní ñáhǎ-yu cuendá ìⁿ-nǎ ichi cuú-yu, te ducaⁿ cùndecu ìⁿ-ná téé coto ñaha xii-yu cuu-dé dàtná ìⁿ tòlí-yu, te téé coto ñaha xii-yu-áⁿ cúu yúhú.

¹⁷ Te Tǎtà-í ío cùdíí iní ñáhá-gǎ xii-í cuendá sá sàá ìⁿ nduu te cuú-í, te cuú-í chi ducaⁿ càchí iní-í, te ñá díú sǎ cúu iní ñáyiú ñuyíú-a cuú-í, te cuú-í dico ndoto-í. ¹⁸ Te vá yǎo ìⁿ te ndacu cahni ñaha xii-í, te núu ñá díú sǎ cúu iní mée-í cuú-í. Te dàtná-ni cùu iní-í sá cùu-í te ñu-ni ducaⁿ ndòto-í chi ducaⁿ ñí cachí Tǎtà-í Dútú Ndiǒxí cunduu — càchí-gá xáhaⁿ-gǎ xii-güedé.

¹⁹ Te sá dúcáⁿ ñí cáháⁿ-gá te ñá ní cùu ìⁿnuu tucu ñáyiú isráel. ²⁰ Te davá-yu ní xítñahá-yu:

—¿Ná cuendá sàndáá-tu iní-ndó tnúhu càháⁿ téé-áⁿ, te yucu ñávǎha ndècu ndìhi-dé, lúcú téé-áⁿ?
—càchí-yu xítñahá-yu.

²¹ Te davá-yu ní xítñahá-yu:

—¿Náa xìní-ndó ìⁿ téé ndècu ndìhi yucu ñávǎha duha váha càháⁿ-dé? ¿Náa xìní-ndó núu ndàcu

yucu ñávãha cada tátna-xi núú ïⁿ téé cuàá te ndúha? —càchí-yu xĩtnàhá-yu.

Ñáyiú isràél dáquèè tíhũ-yu Jèsús

²² Te ndi tnahá cuía ndádá càhnú-yu vico veñúhu càhnu sá ïo cùnuu ñuú Jerusalén, te mei yóó quidé víxiⁿ-xi quidé-yu vico-áⁿ. ²³ Te corrèdór veñúhu-áⁿ nání-xí Sàlomón, te xíáⁿ xícá cùu Jesús. ²⁴ Te ní chítú níhnú ñãyiú isràél núú-gã, te ní xáhãⁿ-yu:

—¿Ná ndéé òré cachí tnúhu ndáá-n, te núu sá Crístú Yaá ní tendaha Yã Ndiõxí véxi ñuyíú-a cùu-n, àdi ná téé cùu-n?, cáháⁿ-ni-n —càchí-yu xãháⁿ-yu xii-gá.

²⁵ Te ní xáhaⁿ Jèsús:

—Sa ní cachí tnúhu-í te ñã sàndáá iní-ndó, te ndèhe-ndo sá vái nũú sã quidè-í sá ñĩ táúchíúⁿ Tătà-í cada-í, te cùu-xi ïⁿ sá cùtnùní iní-ndó nã téé cùu-í. ²⁶ Dico nchòhó ñã sàndáá iní-ndó, chí ñã túú cùu-ndo ñãyiú ní chitnahá ñáhá xii-í. ²⁷ Chí nchaa ñãyiú ní chitnahá ñáhá xii-í cùú-yu dàtná cue mbéé quitì xĩndecu ndihì xítóhó-xi chí nùcúhuⁿ ndudú-güedi xítóhó-güedi, te ducaⁿ nàquiní ñáhá-ní xítóhó-güedi xii-güedi. Ducaⁿ sãtnahá-xi cùu nchaa ñãyiú ní chitnahá ñáhá xii-í. ²⁸ Te yúhú cada-í te nduu táhũ-yu cundecu ndihì ñàhá-yu xii-í ni caa ni quíhíⁿ te vá ïⁿ ndùu-gá cuíta nihnú-yu, te ni vã yóo ïⁿ ndacu naquendeé ñáhá xii-yu ndaha-í. ²⁹ Chí Tătà-í ní taxi cuendá ñáhá-gã xii-yu. Te ío cùnuu-gá nũu xíãⁿ vá yóo ïⁿ ndacu naquendeé ñáhá xii-yu ndaha-gá. ³⁰ Yúhú ndihì Tătà-í Dútú Ndiõxí ïⁿ-ni cùu-ndí —càchí-gá xáhaⁿ-gã xii-yu.

³¹ Te ní queheⁿ tucu ñãyiú isràél yúú cuãha ñàhá-yu xii-gá ní cùu.

32 Te ní xáhaⁿ-gǎ xií-yu:

—Ío cuéhé sǎ vǎha ní guide-í núú-ndó nǐ chindee ñàha Tàtá-í Dútú Ndiǒxí. ¿Te ndëdacàa sá ñǎ tnàhá iní-ndó nǔu cuiní-ndó cuǎha ñaha-ndo yúú xii-í-i? —càchí-gá xáhaⁿ-gǎ xií-yu.

33 Te ní xáhaⁿ ñǎyiu isràél:

—Ñá díú cuendá nchaa sá vǎha ni guide-n cuiní-ndí cuǎha ñaha-ndǐ yúú xii-n, chi ìⁿ dì-ni sá ío càháⁿ úhú-n cuendá Yǎ Ndiǒxí. Te dìcò ìⁿ téé ñuyíú-a cùu-n te càchí-n sá cúu-n Ndiǒxí —càchí-yu xǎhǎⁿ-yu xii-gá.

34 Te ní xáhaⁿ Jèsús:

—Núú tütú Yǎ Ndiǒxí sá ndécú ndìhi-ndo cáháⁿ-xi nàcuáa ní cáháⁿ-gá, te duha ní cachí-gá: “Nchòhó quidé-ndó nǔú-í”, duha ní cachí-gá. 35 Te nàha-o sá vǎ cúú quèhndé nihnu-o tnǔhu yòdo tnuní núú tütú Yǎ Ndiǒxí, chi mee-gǎ ní cachí-gá sá cádá-yu núú-gǎ, te vǎ càchí-ó sǎ ñǎ ndàá. 36 Te núu ducaⁿ nǐ cáháⁿ-gá sá nǔú-gǎ quidé nchàa ñáyiu ní sándáá iní ñáhá xii-gá ñá, ¿te ná cuendá cúdëéⁿ-ndó nǔú yǎhú sá càchí-í sá cúu-í Déhe-gá? Te mee Yǎ Ndiǒxí ní tendaha ñàha-gá xii-í véxi-í ñuyíú-a sá cádá-í chiuⁿ-gá. 37 Te núu ñá túú quide-í nàcuáa ní táuchíúⁿ Tàtá-í cada-í ñá, te vǎ quìndáá iní ñáhá-ndó. 38 Te núu quide-í ñá, te cuèi vǎ quìndáá iní ñáhá-ndó xii mee-í dico quìndáá iní-ndó nchàa chiuⁿ quide-í. Ducaⁿ te cutnùní ndáá iní-ndó sǎ Yǎ Ndiǒxí ndécú ndìhi-í te ìⁿ-ni cùu-ndí —càchí-gá xáhaⁿ-gǎ xií-yu.

39 Te ní cuiní-güedé tnì ñaha tùcu-güedé xii-gá quíhíⁿ-gá vecaá ní cùu, dico ní xinu núú ñáhá-gǎ xii-güedé.

40 Te ní xica-gá cuáháⁿ-gá ndàa ìngá xio yúte Jòrdán núú nǐ xóo dacuàndute ndíi Juàá ñáyiu ndéé díhna, yàcáⁿ ní xíndecu-gá. 41 Te yàcáⁿ ío vài ñáyiu ní sáháⁿ ní cáháⁿ ndíi ñaha xii-gá, te ní xítnàhá-yu:

—Ndíi Juàá, cuèi ñá túú ní quide ndíi sá vǎ yǎo tnàhí ndàcu cada dico ndáá ní cáháⁿ ndíi, chi dàtná-ni ní cáháⁿ ndíi quide téa-a —càchí-yu xítnàhá-yu.

42 Te yàcáⁿ ío vài-yu ní sándáá iní ñáhǎ-yu xii-gá.

11

Ní xíhí té Lǎzarú

1 Nnú Bètaniá ní xíndecu ìiⁿ téé ní xínani-dě Lǎzarú. Te càhú víhí nǐ tnahá-dé ní cuhú-dé, te ní xíndecu ndíi-dé cue cúha-dé tá Màriá ndíi tá Màrta chi xíaⁿ ñúú-yu. 2 Te tá Màriá-áⁿ cúú-xí xíchí nǐ sódó àcítí sáháⁿ tnámí sáhá Jèsús, te ní nadayìchí-xi sáhá-gǎ ndíi idi díquí-xi. Te cuèndá sá cuhú cúha-yu té Lǎzarú, 3 núú ní tendàhá-yu ñáyiu nàha tnúhu cuáháⁿ núú Jèsús, te xǎhǎⁿ-yu xii-gá:

—Mèstrú, téé ío cùu iní-n ìo càhú tnàhá-dé cuhú-dé —càchí-yu xǎhǎⁿ-yu xii-gá.

4 Te sá dúcáⁿ càa tnúhu ní sáá, núú ní xáhaⁿ Jèsús xii-yu:

—Dico cuéhé-ǎⁿ chi vá cùú-dé sá cùú dúcáⁿ-dě, chi Yá Ndiǒxí cuení-gá sá quení-yu nchaa sá cádá-gǎ cuèndá chiñuhu ñàhá-yu xii-gá, te ñu-ni ducaⁿ chiñuhu ñàhá-yu xii yúhú Déhe-gá —càchí-gá xáhaⁿ-gǎ xii-yu.

5 Te cuèi ío cùu iní ñáhá Jèsús xii té Lǎzarú ndíi cue cúha-dé 6 dico òré ní níhí-gǎ tnúhu, te ní cuyaa-gǎ úú-gá nduu núú ndécú-gǎ. 7 Te ní xáhaⁿ-gǎ xii cue téé xica cuu ndíi-gá:

—Na quíhíⁿ tucu-o dístrítú Jùdeá —càchí-gá xáhaⁿ-gă xii-güedé.

⁸ Te ní xáhaⁿ cuè téé xìca cuu ndíhi-gá xii-gá:

—Mèstrú, vitna-ni cuení cue téé israél xĩndecu yàcáⁿ cuáha ñaha-güedě xii-n yúú ní cùu, ¿te cuení-ni tucu-n quíhíⁿ-n-ú? —càchí-güedé xáhaⁿ-güedě xii-gá.

⁹ Te ní xáhaⁿ Jèsús:

—Úxúú òré cúú ìⁿ nduu, te núu nduu na càca cuu-o, te ñã túú ñã candaundeé-ó chí cùtnuní núú-ó chí dító. ¹⁰ Dico núu niú ná càca cuu-o, te ìó ná candaundeé-ó chí vá cùtnuní núú-ó —càchí-gá xáhaⁿ-gă xii-güedé.

¹¹ Te ní xáhaⁿ Jèsús:

—Té Lăzarú téé ío váha tnàhá tnúhu ndíhi-o ñĩ xídí-dé dico quíhíⁿ-ó chí ndocani-o-dě —càchí-gá xáhaⁿ-gă xii-güedé.

¹² Te ní xáhaⁿ-güedě xii-gá:

—Mèstrú, te núu xídí-dé te váa sa ta ndũha-dé cuáháⁿ —càchí-güedé xáhaⁿ-güedě xii-gá.

¹³ Duha ní cáháⁿ Jèsús, chí té Lăzarú sa ní xíhí-dé te cue téé xìca cuu ndíhi-gá ní sani iní-güedé sá ñĩ xídí ndisa-dé. ¹⁴ Te Jèsús ní xáhaⁿ ndăá-gá xii-güedé:

—Sa ní xíhí té Lăzarú. ¹⁵ Váha-gá sá ñã ní sáháⁿ-í quíngoto-í-dé, chí ndècu íngá chiúⁿ cada-í quiní-ndó, te quíndáá iní ñáhá-gă-ndó xii-í, te vitna na quíhíⁿ-ó núú ndécú yiqui cuñú ndíi —càchí-gá xáhaⁿ-gă xii-güedé.

¹⁶ Te té Măxí téé xáhaⁿ-güedě cuáchí ní xáhaⁿ-dě xii dava-gá-güedé:

—Na quíhíⁿ-ó nchàa-o chi yàcáⁿ cuú-ó ndìhi-dé —
càchí-dé xǎhaⁿ-dě xii-güedé.

*Jèsús càháⁿ-gá sá cuěi na cùú ñáyiú dico ndotó-yu
cundecú-yu ndìhi-gá*

17 Te òré ní sáá Jèsús ñuú Bètaniá, te ní xáhǎⁿ-yu sá sà ní cuu cúmí nduu ní xíhí té Lǎzarú. 18 Te ñuú-áⁿ cáá yàtni-ni-gá ñuú Jerusàlén, dàtná cuádava-ná òré cuhuⁿ-o ìchi te saá-ó. 19 Núu xǎⁿ vài ñáyiú isràèl ní sáháⁿ-yu ní cáháⁿ ndìhí-yu tá Mǎrta ndìhi cùhú-xi tá Màriá, te ní sáñhá-yu tnúhu ndee ìní sá dúcáⁿ ñí xíhí cúha-yu. 20 Te ní níhí tǎ Mǎrta tnúhu sá ñúhú Jèsús ichi cuáháⁿ-gá núú ndécǔ-yu núu ní sáháⁿ-xi ní sátnahá-xi-gá, te cùhú-xi tá Màriá ní ndóo-xi vehe. 21 Te òré ní naníhí tǎ Mǎrta Jèsús, te ní xáhaⁿ-xi xii-gá:

—Mèstrú, te núu dícó ní xǐndecu-n ìha te vá cùú cúha-ndí ní cùú. 22 Te cuěi vitna te núu ná sá ná càcáⁿ-n núú Yǎ Ndiǒxí te taxi-gá xii-n —càchí-xi xǎhaⁿ-xi xii-gá.

23 Te ní xáhaⁿ Jèsús:

—Vá ndìhú ìní-n chi ndoto cúha-n —càchí-gá xáhaⁿ-gǎ xii-xi.

24 Te ní xáhaⁿ tǎ Mǎrta:

—Ndáá chi sa xìní-í sá ndótó-dě ná quǐtnahá nduu ndòto nchaa ñáyiú ní xíhí —càchí-xi xǎhaⁿ-xi xii-gá.

25 Te ní xáhaⁿ Jèsús:

—Yúhú dandòto-í-yu cuèndá cundecú-yu ñi caa ñi quíhíⁿ ná sáá nduu. Te nchaa ñáyiú na quíndáá ìní ñáhá xii-í, te cuěi na cùú-yu dico ndotó-yu cundecu-í ndìhí-yu ñi caa ñi quíhíⁿ. 26 Te nchaa ñáyiú ndècu vívú ñuyíú-a te núu na quíndáá ìní

ñáhã-yu xii-í, te cundecu ndihí-í-yu ni caa ni quíhíⁿ.
¿Sàndáá iní-n tnũhu-a ñã? —càchí-gá xáhaⁿ-gã xii tá
Mărta.

²⁷ Te xăhaⁿ-xi:

—Mèstrú, sàndáá iní-í, te sàndáá tucu iní-í sá
díú-n cùu-n Cristú Déhe Yá Ndiõxí, Yaá ní ten-
daha-gã véxi ñuyíú-a —càchí-xi xăhaⁿ-xi xii-gá.

Jèsús ndàhí-gá núú nĩ nguĩndũxi té Lăzarú

²⁸ Sátá dúcáⁿ nĩ cáháⁿ-xi te ní sáháⁿ ngana-xi
cúhú-xi tá Măriá, te dayuhu nĩ xáhaⁿ-xi:

—Yàcáⁿ ní quexìo Mestrú, te càna ñaha-dé xii-n —
càchí-xi xăhaⁿ-xi.

²⁹ Te sá dúcáⁿ xăhaⁿ cùhú tă Măriá sá cáná ñaha
Jesús xii-xi, núu ndihí-ni ní xica-xi cuáháⁿ-xi núu
ndécú-gã. ³⁰ Te Jèsús vátá quĩhu-gá xití ñúú, chi
ndècu-ni-gá núu nĩ sáháⁿ tnahá ñáhá tă Mărta.

³¹ Te ñáyiu isràél ndécú sãñaha tnũhu ndee iní xii
tá Măriá ndihí cúhú-xi ní sani iní-yu sá cuáháⁿ-xi
núu yĩndũxi cúha-xi ndáhyú-xi ní cáháⁿ-yu, núu
nchìcúⁿ-yu-xi cuáháⁿ.

³² Te ní sáá tá Măriá núu ndécú Jèsús te ní nguĩñí
xítí-xí nũú-gã, te xăhaⁿ-xi xii-gá:

—Mèstrú, te núu dìcò ní xĩndecu-n ìha te vá cùú
cúha-ndí ní cùu —cachí-xi xăhaⁿ-xi xii-gá.

³³ Te sá nĩ xiní Jèsús ndàhyú tá Măriá ndihí ñáyiu
isràél nchìcúⁿ ñáhá cuáháⁿ, xĩãⁿ ío ní cuyica iní-gá.

³⁴ Te ní xáhaⁿ-gã xií-yu:

—¿Ndèé ní taxi ndecu-ndo yìquĩ cuñú-dé-i? —
càchí-gá xáhaⁿ-gã xií-yu.

Te ní xáhãⁿ-yu:

—Mèstrú, néhé ná quìhíⁿ-ó te quíní-n —càchí-yu xǎhǎⁿ-yu xii-gá.

³⁵ Te ní ndáhyú-gá tñàhá-gá. ³⁶ Te ní xítñàha ñáyu isràél:

—Súúní cùu iní-dé ndíi ni cùu —cachí-yu xǐtñàhá-yu.

³⁷ Te davá-yu xǐtñàhá-yu:

—Tée-a ní quide tátna-dé núú tēe cuàá te ní ndúha. ¿Te nása ní cuu núu ñá túú ní quide tátna-dé té Lǎzarú cuendá sá vǎ cùú-dé ní cùu-i? —cachí-yu xǐtñàhá-yu.

Jèsús dándòto-gá té Lǎzarú

³⁸ Te ío ní cuyica tùcu iní Jèsús òré ní quexìo-gá yuhu yàú núú ñí chihi-güedé yiqui cùñú té Lǎzarú. Te yuhu yàú-áⁿ ndèdí ìⁿ yúú. ³⁹ Te ní xáhaⁿ Jèsús xii-yu:

—Chí xócàni yúú-ǎⁿ —càchí-gá xáhaⁿ-gǎ xii-yu.

Te ní xáhaⁿ tǎ Mǎrta cúha tée ní xíhí-áⁿ:

—Mèstrú, sa tucu sàháⁿ-dé chi sa ní cuu cúmí nduu sá ñí xíhí-dé —càchí-xi xǎhaⁿ-xi xii-gá.

⁴⁰ Te ní xáhaⁿ Jèsús:

—¿Náa ñá díú ñí cachí-í sá ñuu na quìndáá iní-n, te quíní-n sǎ ío càhnu cuu Yá Ndiǒxí? —càchí-gá xáhaⁿ-gǎ xii-xi.

⁴¹ Te ní xócání-yu yúú ndèdí yuhu yàú-áⁿ. Te ní ndacoto-gá andíu, te ní xáhaⁿ-gǎ xii Tǎtá-gǎ Dútú Ndiǒxí:

—Táu, ndàcáⁿ táhù-í núú-n sǎ ñí tèdoho-n tñúhu ní cáháⁿ-í. ⁴² Te yúhú sa nàha-í sá ncháá-ni òré ndèdóho ñaha-n xii-í, dico duha càháⁿ-í cuendá sá ná tècú dóho nchaa ñáyu ndècu iha cuendá

quíndáá iní-yu sá díú-n ñ tendaha ñàha-n xii-í véxi-í ñuyíú-a —càchí-gá xáhaⁿ-gă xii Dútú Ndiöxí.

⁴³ Te sátá dúcáⁿ ñ cáháⁿ-gá ndihí Yá Ndiöxí, te níhi ní cáháⁿ-gá xáhaⁿ-gă xii téé ní xihí-áⁿ:

—¿Lázaru, tandèe xíaⁿ! —càchí-gá xáhaⁿ-gă xii-dé.

⁴⁴ Te ní ndee téé ní xihí-áⁿ yaú-áⁿ, te ndùtu dóó cuíñí ndàha-dé ndihí sáhá-dě, te dăhu tucu ñⁿ dóó núú-dě. Te ní xáhaⁿ Jèsús xií-yu:

—Chí nándaxi-dé te dañà-ndo-dě ná cáca-dě —càchí-gá xáhaⁿ-gă xií-yu.

Ndùcu-güedé nàcuáa cada-güedé cahni-güedé Jèsús

(Mt. 26:1-5; Mr. 14:1-2; Lc. 22:1-2)

⁴⁵ Te nchaa ñáyu nchìcúⁿ ñáhá xii tá Màriá cuáháⁿ ío vâi-yu ní sándáá iní-yu Jèsús sá ñ xini-yu nàcuáa ní quide-gá. ⁴⁶ Dico davá-yu ní sáháⁿ-yu núú cuè téé cùu fariséú, te ní caní-yu cuendú núú-güedě nàcuáa ní quide Jèsús. ⁴⁷ Te cue téé cùu fariséú ndihí cue dútú cúnùu ní natacá-güedé ní xóo-güedé jündá, te ní xitnàha-güedé:

—¿Nása cada-o?, chi téé-ăⁿ ío vâi sá vă yôo tnàhí ndàcu cada quide-dé. ⁴⁸ Te núu na dàña ío te nchaa ñáyu quíndáá iní ñáhă-yu xii-dé, te quixi cue téé ñuú Rómá dangòyo-güedé veñúhu-o te danàa-güedé nchaa ñuú-ó —càchí-güedé xitnàha-güedé.

⁴⁹ Te ñⁿ cue téé-áⁿ nání-dě Caifás, te cùnuu-gá-dé núú dâva-gá cue dútú cuíá-ăⁿ, te ní xáhaⁿ-dě xii-güedé:

—Nchòhó ni lùha ñá túú cùtnuní iní-ndó. ⁵⁰ Te ni ñă sàha-ndo cuendá sá vâha-gá tnahá-ó, te núu na cùú ñⁿ-ni téé cuendá nchaa ñáyu isràél, te ñă

díú sǎ dánàa ñaha-güedé xií-yu —càchí-dé xǎhaⁿ-dě xii-güedé.

⁵¹ Dico té Caifás chi ñá díú sǎ cúú iní méé-dě ní cǎháⁿ-dé, chi cuendá sá cuíá-ǎⁿ ní cunuu-dě núú cuè dúú, núu xiǎⁿ Yǎ Ndiǒxí ní dácáhú iní ñáhá-gǎ nàcuáa cáháⁿ-dé sá Jèsús cuú-gá sá cúú-xí nchaa ñáyiú isràél. ⁵² Te ñá díú cuendá mee-ni ñáyiú-ǎⁿ cuú-gá, chi cuú-gá tnàhá cuendá nchaa ñáyiú ní sándáá iní ñáhá xii-gá, ñáyiú nchiténuu niñí ñuyíú, te ñⁿ-ná cuú-yu ndiñi-gá. ⁵³ Núu ndéé nduu-ǎⁿ ní ndatnúhu cue té cùnuu núú ñáyiú isràél nàcuáa cada-güedé cahni-güedé Jèsús.

⁵⁴ Te xiǎⁿ núu ñá ní xica cuu-gá Jèsús quiní ñáhá ñáyiú isràél, te ní quee-gá cuáháⁿ-gá ñuú Efráin, ñⁿ ñuú cáá yàtni yucu, yàcáⁿ ní ngüíñi-gá ndiñi cue té xica cuu ndiñi-gá.

⁵⁵ Te ta cùyatni nduu cadá-yu vico páscaú. Te cuéhé ñáyiú ní queé-yu ñuú-yu cuáháⁿ-yu ñuú Jerusálén cuendá sá sà ndihí-yu nchaá-yu nduu íí, te tnahá nduu vico páscaú. ⁵⁶ Te yàcáⁿ nándúcú-yu Jèsús ní cùu te ñá túú-gǎ òré-ǎⁿ, te ní naníhí tnáhǎ-yu xití veñúhu, te xitnàhá-yu:

—¿Nása sàni iní-ndó-í? ¿Quixi Jèsús vico ǎⁿ ñáhá? —càchí-yu xitnàhá-yu.

⁵⁷ Te cue té cùu fariséú ndiñi cue dúú cùnùu sa ní xáhaⁿ-güedé xii ñáyiú sá núu ndéda-ni càá-yu xini-yu núu ndécú Jèsús te na càháⁿ-ni-yu cuendá tñi ñaha-güedé xii-gá.

12

*Ñⁿ ñadìhí chíhí-ǎⁿ Jèsús acití
(Mt. 26:6-13; Mr. 14:3-9)*

1 Íñú-gá nduu cùmání tnahá vico pàscuá, te ní sáháⁿ Jèsús ñuú Bètaniá, ñuú té Lăzarú téé ní dándótó-gă. 2 Te xíaⁿ ñĩ cadúha-yu sá ñĩ cudìni Jèsús. Te tá Mărta ní sani-xi cóhó, te té Lăzarú yíhí-dě mèsá ndihĩ Jèsús, ndihĩ dava-gá-güedé xéxí-güedě. 3 Te tá Măriá néhé-xí cuădava lĩtrú acitĩ sáháⁿ tnámí sã ïo ndèyáhu, te acitĩ-áⁿ ñĩ cuáha mee-ni yücú nărdú, te ní sódó-xi sáhá Jèsús, te ní nadayĩchĩ-xi ndihĩ idi díquí-xi sáhá-gă. Te ñihĩ xitĩ vehe ní xité nuu dicó acitĩ-áⁿ. 4 Te té Júdás déhe té Xímú Iscarioté ðiu-ni ïⁿ téé xica cuu ndihĩ-gá, téé cuáha cuendá ñáhá xii-gá núú cuè téé cùu úhú iní ñáhá ñĩ xáhaⁿ-dě xii-gá:

5 —¿Ná cuendá ñá ní cüyáhu acitĩ-a sá ùní ciendú díhúⁿ denàriú cuu cuendá ñáyiu ndàhú? —càchĩ-dé xáhaⁿ-dě xii-gá.

6 Dico sá dúcáⁿ ñĩ cáháⁿ té Júdás chi ñá díú sã ndísá ñùhu iní-dé ñáyiu ndàhú chi dicó-ni ïⁿ ñádúhú cúú-dě, chi ðiu-dé néhé cuendá-dé díhúⁿ-güedě nchaagüedé te ní xóo duhu ñàha-dé xii-güedé. 7 Te ní xáhaⁿ Jèsús:

—Daña, vá dásatú-n iní xíchĩ-a na tàxúha nahi-xi àcitĩ-a, chi nàndĩhĩ ndéé òré ná nguĩndũxi-í. 8 Chi nchòhó chi cuhuⁿ tnahá-ni ñáyiu ndàhú tnuú-ndó, dico yúhú chi vá ncháá ndùu cundecu ndihĩ ñaha-í xii-ndo —càchĩ-gá xáhaⁿ-gă xii-dé.

Tnahá té Lăzarú cuinĩ-güedé cahni ñaha-güedé xii-dé

9 Te vại ñáyiu isràél ní níhĩ-yu tnuúhu sá ndécú Jèsús ñuú Bètaniá. Te ní sáháⁿ-yu cuendá quinĩ-yu-gá, te quinĩ-yu tnahá té Lăzarú téé ní dándótó-gă. 10 Te cue dútú cúnùu ní

ndatnúhu-güedé ní cuu ìⁿnuu-güedě cuendá sá cáhní-güedě tnàhá té Lăzarú ní cùu, ¹¹ chi òu cuendá téé-áⁿ nǐ cuu cuéhé ñăyiu isràél tá dàña nihnú-yu-güedé cuáháⁿ cuendá sá nǐ sándáá iní-yu Jèsús.

Jèsús cuànguìhu-gá ñuú Jerusàlén

(Mt. 21:1-11; Mr. 11:1-11; Lc. 19:28-40)

¹² Te nduu tněé-áⁿ vài ñăyiu ní quexìo ñuú Jerusàlén cuendá cundecú-yu vico, te ní níhǐ-yu tnúhu sá Jèsús sáá-gá tnàhá-gá cundecu-gá vico-áⁿ, ¹³ núu ní xehndé-yu ndaha yùtnu ñúú, te nèhé-yu ní sáháⁿ ní sátnahá ñáhă-yu xii-gá. Te níhi ní cáháⁿ-yu, te càchí-yu:

—jío càhnu cuu Yá Ndiòxí! Te ducaⁿ-ni ò càhnu cuu Yaá ní tendaha-gă véxi quindaha ñàha xii-o — duha ní cachí-yu.

¹⁴ Te Jèsús ní níhí-gă ìⁿ bǔrru, te yòdo-gá-di cuáháⁿ. Te ducaⁿ nǐ cuu chi ní quee ndáá-xi nàcuáa càháⁿ-xi núú tütú Yă Ndiòxí núú càchí-xi:

¹⁵ Vá yùhú nchòhó cue ñăyiu ndècu ñuú Siòn,

chi iha véxi téé yìndaha ñaha xii-ndo yodo-dé ìⁿ bǔrru.

Duha càchí-xi núú tütú-gá. ¹⁶ Dico cue téé xìca cuu ndihì Jèsús ñá ní ndàcu iní-güedé nàcuáa càháⁿ-xi núú tütú Yă Ndiòxí nàcuáa cada Jèsús. Dico sátá cuàndaa-gá andiù càda cahnu ñaha Tátá-gă xii-gá, te ní ndacu iní-güedé sá dúcáⁿ yòdo tnuní nàcuáa cada-gá, te ducaⁿ nǐ cuu.

¹⁷ Nchaa ñăyiu ní xíndecu ndihì Jèsús òré ní dándótó-gă té Lăzarú, ya yàcáⁿ ní caní-yu cuendú núú ñăyiu nàcuáa ní quide ñaha-gă xii-dé. ¹⁸ Te vài-yu ní sáháⁿ-yu núú ndécú Jèsús cuendá sá nǐ

níhĩ-yu tnúhu ní quide-gá sá vă yõo tnàhí ndàcu cada. ¹⁹ Te cue tée cùu fariséú ní xítñaha-güedé:

—Ní xito-ndo nã ñá túú nàndihĩ sá quidé-ó-vá, chi nchaa ñáyiú ní chinchícúⁿ ñáhã-yu xii-dé — cächí-güedé xítñaha-güedé.

Ñáyiú ñá túú cùu ñáyiú isràél nánducú-yu Jèsús

²⁰ Te tnàhá ñáyiú ñá túú cùu ñáyiú isràél ní sáháⁿ-yu vico ñuú Jerusàlén ní quide càhnú-yu Yá Ndiõxí. ²¹ Te ñáyiú-áⁿ ñĩ sáháⁿ-yu núú tẽ Lìpé tée ñuú Bètsaidá, te ñuú-áⁿ yíndèhu-xi distritú Galileá. Te ní xáhãⁿ-yu xii-dé:

—Tátá, vá cündèe iní-n cächí tnúhu-n nõu ndèé ndécú Jèsús, chi cuíní-ndí cáháⁿ ndihĩ-ndí-gá — cächí-yu xáhãⁿ-yu xii-dé.

²² Te té Lìpé ní naníhí-dẽ té Ndrĩxí te ní xáhaⁿ-dẽ nàcuáa càháⁿ-yu, te ndĩ nduú-güedé ní sáháⁿ-güedé ní xáhaⁿ-güedẽ xii Jèsús nàcuáa càháⁿ-yu. ²³ Te ní xáhaⁿ Jèsús xii-güedé:

—Vítña ní cuyatni òré cada càhnu ñaha Tátá-í xii-í, te quíní-yu sá ïo càhnu cuu yúhú Tée cùu ñaní tnáhã-yu nchaa-yu. ²⁴ Te na cächí tnúhu ndáá-í xii-ndo sã nõu ñⁿ tatá vá ngává-xí nõú ñúhú tẽhyú-xi ña, te ðiu-ni ducaⁿ cùnduu-xi cundecu-xi. Dico ñⁿ tatá ná ngává nõú ñúhú xĩnu déhe-xi, te xíãⁿ nádàcayá tnáhá-xí, te mee-xi tẽhyú-xi. ²⁵ Te nchaa ñáyiú ío ñùhu iní-xi cundecu ñuyíú-a ñá túú ñùhu iní-yu Yá Ndiõxí, te ñáyiú-áⁿ cuíta nihnú-yu. Te nchaa ñáyiú ío ñùhu iní ñáhá xii Yá Ndiõxí, ñáyiú-áⁿ cundecú-yu ndihĩ-gá ñi caa ñi quíhíⁿ. ²⁶ Te nchaa ñáyiú cuíní cunu cuechi nõù-í xini ñuhu-xi natuha ñahá-yu xii-í, te nduu táhũ-yu cundecú-yu núú

nùhú-í cundecu-í. Te nchaa ñáyi na cùnu cuechi núù-í, te cada càhnu ñaha Tàtá-í xií-yu —càchí-gá xáhaⁿ-gã xii-güedé.

Jèsús càháⁿ-gá sá cáhni ñaha-güedé xii-gá

²⁷ Te ní xáhaⁿ tùcu-gá:

—Ío ndìhú iní-í. Te cúñaha-í xii Tàtá-í taunihnu ñaha-gã nùu dìcò sá cúú, dico vá cúú chi cuendá tnàhí-a véxi-í —càchí-gá xáhaⁿ-gã xii-güedé.

²⁸ Te ní xáhaⁿ-gã xii Tàtá-gã Dútú Ndiöxí:

—Táu, cada nàcuáa ní sani iní-n cùnduu cuendá sá ná cáda càhnu ñaha ñáyi xii-n —càchí-gá xáhaⁿ-gã.

Te ducaⁿ te ní tecú ní cáháⁿ Yã Ndiöxí ndéé andiu, te càchí-gá:

—Sa ní quide-í nàcuáa cachí ñáyi sá ïo càhnu cuu-í. Te cada tucu-í cuendá cada càhnu ñaha-gá-yu xii-í —càchí Yã Ndiöxí xáhaⁿ-gã xii Déhe-gá.

²⁹ Te nchaa ñáyi xñdecu ní tecú dóho-yu ní cáháⁿ-gá, dico ñá túú ní sàni iní-yu sá méé-gã ní cáháⁿ, chi davá-yu ní xítñahá-yu sá ñùhu ní cáháⁿ, te davá-yu ní xítñahá-yu sá ìⁿ espíritú xínú cuèchi núú Yã Ndiöxí ní cáháⁿ. ³⁰ Te ní xáhaⁿ Jèsús xií-yu:

—Ñá díú cuendá yúhú ní cáháⁿ Yã Ndiöxí, chi ní cáháⁿ-gá cuendá sá nchòhó cundedóho-ndo. ³¹ Te vitna ní sáá nduu càda ndáá Yã Ndiöxí cuèchi nchaa ñáyi ñuyíú-a, te ducaⁿ te vá cùnù-gá yucu ñávãha. ³² Te na càta caa ñaha-güedé xii-í núú cùrúxí, te xíáⁿ cuú-í te níhí-yu tnúhu ni càa xico ñuyíú, te quindáá iní-yu tnúhu-í —càchí-gá xáhaⁿ-gã xií-yu.

33 Duha ní cáháⁿ-gá cuendá cutnùní iní-yu nàcuáa ndoho-gá òré cuú-gá. 34 Te ní xáhăⁿ-yu xii-gá:

—Nìhí-ndí tnúhu sá nǔú tütú yódó tnùnì tnúhu Yá Ndiöxí càháⁿ-xi sá Crìstú Yaá tendaha-gă quixi ñuyíú-a cundecu-gá ni caa ni quíhíⁿ. ¿Te yòhó nása càháⁿ-tu-n sǎ ìⁿ tée cùu ñanì tnáhá nchàa ñáyiu ñuyíú-a cahni ñaha-güedě núú cùrúxí? Te cachí tnúhu-n nǎ cúú tǎe-áⁿ —càchí-yu xáhăⁿ-yu xii-gá.

35 Te ní xáhaⁿ Jèsús:

—Yúhú cúú-í dàtná ìⁿ ñuhú dáyèhé ñuyíú-a, dico sacú-ni nduu ndècu ndìhì ñaha-í xii-ndo. Te caca-ndo ìchi ndáá vitna dáyehé-gá-í núú-ndó chi na cùnee te vá cùtnùnì-gá núú-ndó ndéè ìchi quíhíⁿ-ndó. 36 Quindáá iní ñáhá-ndó xì-í vitna ndècu ndìhì ñaha-gá-í xii-ndo dándixi túu-í iní-ndó, cuendá cutnùnì iní-ndó nàcuáa ndùu cuendá Yá Ndiöxí, te cuu-ndo dèhe-í —càchí-gá xáhaⁿ-gă xií-yu.

Te sátá dúcáⁿ ñí cáháⁿ Jèsús, te ní queue-gá cuáháⁿ-gá ìⁿ núú vǎ ná ñìhì ñáhăⁿ-yu xii-gá.

Ñáyiu isràél ñá cuìnì-yu quindáá iní-yu Jèsús

37 Te cuèi ío vai sá vǎ yòo tnàhí ndàcu cada ní quide Jèsús ní xiní-yu, dico ni dùcaⁿ ñá túú ní sàndáá iní-yu-gá. 38 Te ducaⁿ ñí quidé-yu chi dacuítí ñí queue ndáá-xi nàcuáa ní chídó tnùnì ndíi Chàíá ndíi ní cáháⁿ tnúhu Yá Ndiöxí ndéé sanaha nǔú tütú-gá núú càchí-xi:

Yòhó Yaá cúú Xìtohó-í, vá yòo ìⁿ sàndáá iní tnúhu càháⁿ-ndí.

Te vá yòo ìⁿ cùtnunì iní-xi sá ìo càhnu cuu-n.

Duha ní chídó tnùní ndíi Chàíá núú tütú-gá. ³⁹ Te ñá ní sàndáá iní-yu chi ní quee ndáá-xi nàcuáa ní chídó tnùní tucu ndíi Chàíá núú tütú Yă Ndiõxí nàcuáa cáháⁿ Jèsús:

⁴⁰ Mee Yă Ndiõxí ní quide-gá sá vă tècú tnùní-yu, chi ní dádăhu ndodo iní ñáhá-gă xií-yu, chi ío sàá iní-yu núu ñá ní cuíní-gá-yu quíndáá iní ñáhă-yu xii-gá.

Te ni vă túhá ñáhá-yu xii yúhú cuèndá dacăcu nihnu-í-yu.

⁴¹ Duha ní chídó tnùní ndíi Chàíá nàcuáa cáháⁿ Jèsús chi ní xiní ndíi sá ío càhnu cuu-gá.

⁴² Te cuèi ducaⁿ nǐ cuu dico títí cue tée cùnuu núú ñăyiu isràél ní sàndáá iní ñáhá-güedě xii-gá. Dico ñá túú ní xõo cáháⁿ ndáá-güedé chi ní xóo yúhú-güedé sá vă dáñá-gă cue tée cùu fariséú quíhu-güedé veñúhu. ⁴³ Chi ní xóo cudíí-gă iní-güedé sá càháⁿ ñáyiu dàcúúxí tnúhu càháⁿ Yă Ndiõxí.

Ñáyiu ñá túú sàndáá iní tnúhu Jèsús cuíta nihnú-yu

⁴⁴ Jèsús níhi ní cáháⁿ-gá, te càchí-gá:

—Nchaa ñáyiu na quíndáá iní ñáhá xii-í, te ñá díú-ní mē-í quíndáá iní-yu, chi tnàhá Tătà-í Yaá ní tendaha ñàha xii-í véxi-í ñuyíú-a quíndáá iní-yu.

⁴⁵ Te ñáyiu xiní ñáhá xii yúhú xiní-yu tnàhá Tătà-í.

⁴⁶ Te yúhú véxi-í dandixi túu-í iní ñáyiu ñuyíú-a cuèndá cutnùní iní-yu nàcuáa ndùu cuèndá Yă Ndiõxí, te nchaa ñáyiu na quíndáá iní ñáhá xii-í te vá cùndècu-gá-yu ichi cuèhé ichi duha. ⁴⁷ Te núu ío davá-yu ndédóho-yu nàcuáa càháⁿ-í te ñá túú tnǐ-yu tnúhu-í, te ñá díú yúhú dàcuíta nihnu-í-yu, chi ñá túú véxi-í ñuyíú-a sá dácúíta nihnu-í-yu, chi

véxi-í sá dácăcu nihnu-í-yu. ⁴⁸ Te nchaa ñáyiú na cùyíchí iní ñáhá xii-í te ñá túú quide cuendá-yu năcuáa cáháⁿ-í, te ñáyiú-áⁿ ná sàà nduu te cuíta ni-hnú-yu chi ñá ní tñi-yu tnúhu ní cáháⁿ-í. ⁴⁹ Te yúhú ñá túú cáháⁿ-í tnúhu véxi iní mée-í, chi mee Tătá-í Yaá ní tendaha ñàha xii-í véxi-í ñuyúú-a ní cachí tnúhu-gá năcuáa cunduu tnúhu cáháⁿ-í danèhé-í ñáyiú. ⁵⁰ Te yúhú xini-í sá tnúhu ní táuchíúⁿ Tătá-í cáháⁿ-í cúu-xí ñⁿ sá vâha sá cúu xii-ndo chi nduu táhú-ndó cundecu-ndo ndihi-gá ni caa ni quíhíⁿ, núu xiáⁿ cáháⁿ-í nchaa năcuáa ní táuchíúⁿ-gă — cächí-gá xáhaⁿ-gă xií-yu.

13

Jèsús náquète-gá sáhá cuè téé xica cuu ndihi-gá

¹ Te cùmání-gă tnahá vico pascuá, te Jèsús sa nàha-gá sá sà ní cuyatni òré dândóo-gă ñuyúú-a, te ndaa-gá núu ndécú Tătá-gă. Te ío ní cuu iní-gá nchaa ñáyiú ní sándáá iní ñáhá xii-gá, te ní quide ndisa-gá sá ñi cuu iní ñáhá-gă xií-yu.

²⁻⁴ Te ní quíhu yucu ñăvâha díquí tē Júdás déhe té Xímú Iscarioté, te ní sani iní-dé năcuáa cada-dé cuáha cuendá-dé Jèsús núu cuè téé cùu úhú iní ñáhá xii-gá. Te Jèsús sa nàha-gá sá mée Yă Ndiòxí Yaá cúu Tătá-gă ní sãñaha-gă tnúhu ndee iní xii-gá sá cáda-gă núu-gă, te nàha-gá sá díú núu Tătá-gă ní quee-gá véxi-gă ñuyúú-a. Te sáá nduu năsáá tucu-gá núu Tătá-gă. Te cùdini Jèsús ndihi cue téé xica cuu ndihi-gá ní cùu, te ní ndacuíñi-gá yuhu mèsá, te ní taunuu-gă ñⁿ dóo níhnú-gă, te ní queheⁿ-gă ñⁿ dóo ñi dácútú-gă núu yíquí-gă. ⁵ Te ní chihí-gá ndute ñⁿ tñá, te xiáⁿ ñi naquète-gá sáhá

cuè téé xìca cuu ndìhi-gá, te ndìhi dóó ndútú nǔú yíquí-gǎ-áⁿ nǐ nadayìchí-gá sáhá-güedě.

⁶ Te òré naquete-gá sáhá tě Xímú, àdi Pelú, ní cùu ní xáhaⁿ-dě xii-gá:

—Mèstrú, ¿te yòhó naquete-n sǎhà-í-u? —
càchí-dé xǎhaⁿ-dě xii-gá.

⁷ Te ní xáhaⁿ Jèsús:

—Vitna ñá cutnùní iní-n sǎ quídè-í-a dico sáá nduu te cutnùní iní-n —càchí-gá xáhaⁿ-gǎ xii-dé.

⁸ Te ní xáhaⁿ tě Pèlú:

—Yúhú chi vá ĩⁿ ndùu te naquete-n sǎhà-í —
càchí-dé xǎhaⁿ-dě xii-gá.

Te ní xáhaⁿ Jèsús:

—Te núu vá náquète-í sáhá-n áⁿ, te vá cádá-gǎ-n cuèndá sá ndécú ndìhi ñaha-í xii-n —càchí-gá xáhaⁿ-gǎ xii-dé.

⁹ Te ní xáhaⁿ tě Pèlú:

—Te núu ducaⁿ te vá méé-ní sǎhà-í naquete-n,
chi naquete-n tnàhá ndaha-í ndìhi díquí-í —
càchí-dé xǎhaⁿ-dě xii-gá.

¹⁰ Te ní xáhaⁿ Jèsús xii-dé:

—Tée íchí nǐ xìchi chi xìni ñuhu-xi sá sáhá-na-dě ndoo, te ducaⁿ te nduu ndoo-dé nihí-dé. Te nchòhó sa cándoo-ndo cuéi ñá ncháá-ndó cándoo —
cachí-gá xáhaⁿ-gǎ xii-dé.

¹¹ Te ducaⁿ nǐ cáháⁿ Jèsús chi sa nàha-gá sá ĩⁿ cuè téé-áⁿ cuǎha cuèndá ñáhá-güedě xii-gá núú cuè téé cùu úhú iní ñáhá, xǎⁿ nǔu ní xáhaⁿ-gǎ sá ñà túú cándoo-güedé nchaa-güedé.

¹² Te sátá nǐ naquete-gá sáhá-güedě, te ní ndécuihnu-gá dóó-gǎ, te ní nucóo-gá yuhu mèsá, te ní xáhaⁿ-gǎ xii-güedé:

—¿Te ní cutnùní iní-ndó sã nĩ quide ñaha-ĩ xii-ndo-ãⁿ? ¹³ Te nchòhó váha-ni càháⁿ-ndó sã cúnùu-í, te dànani ñaha tucu-ndo Mestrú xii-í, te ndáá càháⁿ-ndó. ¹⁴ Te núu yúhú cùu-í Mèstrú, te cùu tucu-í tée cùnùu te nàquete-í sáhá-ndó, te ñu-ni ñucaⁿ càda nchòhó tucu naquete sáhá tnáhá-ndó. ¹⁵ Yúhú sànu ichi ñaha-í xii-ndo nàcuáa cada-ndo. ¹⁶ Te na càchí tnúhu ndáá-í xii-ndo sã nĩ ñⁿ tée xìnu cuechí ñá túu cùnùu-dé dàcúúxí pàtróoⁿ-dé, te nĩ ñⁿ tée xìca chiuⁿ ñá túu cùnùu-dé dàcúúxí tée tendaha ñaha xii-dé cuáháⁿ-dé chiuⁿ. Te ñucaⁿ sãtnahá-xi cùu yúhú ndihì nchòhó. ¹⁷ Te núu ní cutnùní iní-ndó nàcuáa ní quide ñaha-ĩ xii-ndo ña, te ñucaⁿ càda tnaha-ndo te cuu váha iní ñáhá Yã Ndiõxí xii-ndo.

¹⁸ Yúhú, ñá túu càháⁿ-í cuèndá-ndó nchàa-ndo, chi yúhú sa nàha-í nàcuáa sàni iní ñⁿ ñⁿ nchòhó cue tée ní nanducu nìhnu-í tnuú nchaa ñáyiu ñùhu ichi cuehé ichi ñuha ní cachí-í chitnahá ñáhá-ndó xii-í. Chi dacuítí sã quéé ndáá-xi nàcuáa càháⁿ-xi núu tütú Yã Ndiõxí núu càchí-xi: “Tée xèxi ndihì ñaha xii-í ngóo-dé cuu úhú iní ñáhá-dé”, ñuha càchí-xi núu tütú-gá. ¹⁹ Te cùmání-gã sáá nduu càda ñaha-dé sá sání iní-dé, núu xíãⁿ càchí tnúhu-í xii-ndo nàcuáa cada-dé, chi na sáá nduu-ãⁿ te cutnùní iní-ndó sã yúhú cùu-í Cristú Yaá ní tendaha Yã Ndiõxí véxi ñuyíú-a. ²⁰ Te na càchí tnúhu ndáá-í xii-ndo sã nchàa ñáyiu na quèheⁿ cuendá ñáhá xii cue tée tendaha-ĩ cáháⁿ tnúhu-í, te cada iní-yu sá tnáhá yúhú ní queheⁿ cuèndá-yu. Te nchaa ñáyiu na quèheⁿ cuendá ñáhá xii-í, te cada iní-yu sá tnáhá Tãtã-í Dútú Ndiõxí Yaá ní tendaha ñaha xii-í véxi-í ñuyíú-a ní queheⁿ cuèndá-yu — càchí-gá xáhaⁿ-gã xii-güedé.

Jèsús càchí-gá sá tẽ Jùdás cuáha cuendá ñáhá-dě xii-gá núú cuè téè cùu úhú iní ñáhá

(Mt. 26:20-25; Mr. 14:17-21; Lc. 22:21-23)

²¹ Te sátá dúcáⁿ ñí cáháⁿ Jèsús te ío ní ndíhú iní-gá, te ní xáhaⁿ-gã xii-güedé:

—Na càchí tnúhu ndáá-í xii-ndo sã díú-ní ìⁿ nchohó cuáha cuendá ñáhá-ndó xii-í núú cuè téè cùu úhú iní ñáhá —càchí-gá xáhaⁿ-gã xii-güedé.

²² Te ní ngúita cue téè xica cuu ndíhi-gá ndéhe ìⁿ ndehe ìⁿ núú tnáhá-güedě, chi ñá ní cùtnuní iní-güedé ndédacàa-güedé cuendá-güedé ní cáháⁿ-gá. ²³ Te ìⁿ téè-áⁿ ìo cùdíí iní ñáhá Jèsús, te ndècu yatni-dé dǐñi-gá cùdini-dé ndíhi-gá. ²⁴ Te té Xímú, àdi Pelú chi úú diu-dé, ní guide-dé sèñá núú tẽ ndècu yatni dǐñi-gá-áⁿ sá càcáⁿ tnúhú-dě núú-gã nũu ndédacàa-güedé cuendá-güedé ní cáháⁿ-gá. ²⁵ Te téè-áⁿ ní sáháⁿ ndehe yatni-gá-dé dǐñi Jesús, te ní xáhaⁿ-dě xii-gá:

—Mèstrú, ¿ndédacàa-ndí cuendá-ndí ní cáháⁿ-n-i? —càchí-dé xáhaⁿ-dě xii-gá.

²⁶ Te ní xáhaⁿ Jèsús:

—Na chindóyo-í luha pàá, te téè na cuáha-í te téè-áⁿ cúú-dě —càchí-gá xáhaⁿ-gã xii-dé.

Te ní chindóyo-gá luha pàá, te ní sáha-gá té Jùdás déhe té Xímú Iscarioté. ²⁷ Te òré ní queheⁿ-dé pàá, te ní ngúndecu ndíhi ñaha dùuⁿ-ná yucu ñáváha xii-dé. Te ní xáhaⁿ Jèsús:

—Sá ñí sani iní-n càda-n te cada ndíhi-ni-n —càchí-gá xáhaⁿ-gã xii-dé.

²⁸ Te ní ìⁿ cue téè cùdini ndíhi-gá ñá ní tècú tnùní-güedé nása ndùu tnúhu ní xáhaⁿ-gã xii té Jùdás. ²⁹ Te dava-güedé ní sani iní-güedé sá sã

cuendá sá ndécú ndìhi-dé sá ñúhú dǐhún, te vaa ìó ìn sá cuáán-dě nàndìhi-güedé vico, àdi díhún cuãha-dé ñáyi ndàhú xáhaⁿ-gã ní cáháⁿ-güedě. ³⁰ Te sa ní cundi^{qu}íⁿ ní queheⁿ cuendá té Jùdás pàá caxi-dé, te òré ní níhí-dě pàá-án te ní quee-dé cuáhán-dé.

Jèsús càchí tnúhu-gá nàcuáa cada-o

³¹ Te sátá nǐ quee té Jùdás cuáhán-dé, te ní xáhaⁿ Jèsús xii dava-gá-güedé:

—Vitna te quiní-ndó ndìhi nchaa ñáyi sá ìo càhnu cuu yúhú Tée cùu ñaní tnáhá-ndó nchàa-ndo, te òré-án cutnùnì iní-ndó sã ìo càhnu cuu tucu mee Yá Ndiöxí. ³² Te núu yúhú quídé càhnu-í Yã Ndiöxí, te ñu-ni ducaⁿ càda cahnu ñaha-gá xii yúhú, te ñã túú-gã titní nduu te ducaⁿ càda-gá. ³³ Te nchòhó cue déhe-í na càchí tnúhu-í sá sàcú duha-ná nduu ndècu ndìhi ñaha-í xii-ndo. Te nchòhó nanducu ñaha-ndo xii-í dico vá ná nìhí ñáhá-ndó dàtná ní xáhaⁿ-í xii ñáyi isràél, te ñu-ni ducaⁿ càháⁿ-í núú-ndó sã vã ndácú-ndó quíhíⁿ-ndó núú quíhíⁿ-í. ³⁴ Te duha sànu ichi ñaha tucu-í xii-ndo nàcuáa cada-ndo sã cúú ìní tnáhá-ndó ìn ìn-ndo datná yúhú cúú ìní ñáhà-í xii-ndo. ³⁵ Te núu na cùu ìní tnáhá-ndó ìn ìn-ndo ña, te ducaⁿ te cutnùnì iní nchaa ñáyi sá cúú-ndó cuè téé ní chitnahá ñáhá xii-í —càchí-gá xáhaⁿ-gã xii-güedé.

Jèsús càháⁿ-gá sá tẽ Pelú vá nũnuu-dé sá xicá cùu ndìhi ñaha-dé xii-gá

(Mt. 26:31-35; Mr. 14:27-31; Lc. 22:31-34)

³⁶ Te ní xáhaⁿ tẽ Xímú, àdi Pelú chi úú ñu-dé, xii Jèsús:

—Mèstrú, ¿ndèé quíhíⁿ-n-í? —càchí-dé xáhaⁿ-dě xii-gá.

Te ní xáhaⁿ Jèsús:

—Vitna te vá ndácú-n cànchicúⁿ ñáhá-n quĩhíⁿ núú quĩhíⁿ-í, dico na sàá nduu te dai sáá-n núú cùndècu-í —càchí-gá xáhaⁿ-gã xii-dé.

³⁷ Te ní xáhaⁿ tẽ Pèlú xii-gá:

—Mèstrú, ¿te ná cuendá núu vá ndácú-í cànchicúⁿ ñáhá-í xii-n quĩhíⁿ vitna-í? Chi yúhú ñá túú tnáhí yùhú-í cuẽi na cùú-í sá cuendá-n —càchí-dé xáhaⁿ-dẽ xii-gá.

³⁸ Te ní xáhaⁿ Jèsús:

—¿Te ndáá sá xèhndé iní-n sã cuẽi na cùú-n cuendá-í-u? Te na càchí tnúhu ndáá-í xii-n sã cùmání-gã cana líhi, te úní xito cáháⁿ-n sã ñá túú xìní ñáhá-n xì-í —càchí-gá xáhaⁿ-gã xii-dé.

14

Jèsús dánèhé ñáhá-gã nàcuáa cada-o nàsáá-ó núú ndécú Yã Ndiõxí

¹ Te ní xáhaⁿ-gã xii-güedé:

—Te ñá túú nã cani iní-ndó. Quìndáá iní-ndó Yã Ndiõxí, te quìndáá iní-ndó yùhú. ² Chi núú ndécú Tàtà-í ío núne núú cùndècu-o, chi núu ñáhá ñá te sa cachí tnúhu-í xii-ndo ni cùu. Te vitna na nùhú-í te cada túha-í núú cùndècu-ndo. ³ Te dătnùní quixi tucu-í te candeca ñaha-ĩ xii-ndo quĩhíⁿ cuendá ìⁿ-ni xìchi cundecu-o. ⁴ Te sa nàha-ndo ndéé quĩhíⁿ-í te sa xìní-ndó ìchi —cachí-gá xáhaⁿ-gã xii-güedé.

⁵ Te ní xáhaⁿ tẽ Măxí xii-gá:

—Mèstrú, ñá túú xìní-ndí ndèé quĩhíⁿ-n te da ichi-ná quini-ndí —càchí-dé xáhaⁿ-dẽ xii-gá.

⁶ Te ní xáhaⁿ Jèsús:

—Yúhú cù-í dàtná ìⁿ ichi te càháⁿ-í tnúhu ndáá, te yúhú cada-í te naníhí tàhú-ndó. Te ìⁿ dìi díi-ni yúhú cada-í te sáá-ndó núú Yá Ndiöxí cundecu-ndo te núu na quíndáá iní ñáhá-ndó xii-í. ⁷ Te núu dicó cútnùní ndisa iní-ndó yòo cuu-í-áⁿ, ducaⁿ te cutnùní iní-ndó yòo cuu Tàtá-í ní cùu. Dico vitna dàtná sá ñí xiní núú-ndó Dútú Ndiöxí Yaá cùú Tàtá-í cada iní-ndó, chi ní xiní-ndó yúhú — càchí-gá xáhaⁿ-gã xii-dé.

⁸ Te ní xáhaⁿ tē Lìpé xii-gá:

—Mèstrú, danèhé ñáhá xii-ndí Dútú Ndiöxí chi na cùu váha iní-ndí — càchí-dé xáhaⁿ-dē xii-gá.

⁹ Te ní xáhaⁿ Jèsús xii-dé:

—Lìpé, ¿te náa ñá túú xiní ñáhá-n xii-í? Te sa ní cuu vâi nduu ndecu ndìhì ñaha-í xii-ndo, chi ñáyiu xiní ñáhá xii-í te xiní-yu tnàhá Tàtá-í. ¿Te ná cuendá yòhó càchí-n sã dánèhé ñáhà-í xii-ndo Tàtá-í? ¹⁰ ¿Náa ñá túú sàndáá iní-ndó sã yúhú ndécù-í ndìhì Tàtá-í? Te mee-gã ndécú ndìhì ñaha-gá xii-í. Te nchaa tnúhu càháⁿ-í núú-ndó ñà túú càháⁿ-í sá vèxi iní mée-í, chi Tàtá-í Yaá ndécú ndìhì ñaha xii-í chíndèe ñaha-gá quidè-í chiuⁿ-gá. ¹¹ Te quíndáá iní-ndó sã yúhú ndécù-í ndìhì Tàtá-í, te ducaⁿ mée-gá ndécú ndìhì ñaha-gá xii-í. Te núu ñá túú sàndáá iní-ndó tnúhu càháⁿ-í-a, te dandàcu iní-ndó nchàa chiuⁿ ta quide-í véxi, te quíndáá iní ñáhá-ndó. ¹² Te na càchí tnúhu ndáá-í xii-ndo sã nchàa ñáyiu na quíndáá iní ñáhá xii-í, te cadá-yu chiuⁿ quide-í te càhnu-gá chiuⁿ cadá-yu chi yúhú núhú-í núú ndécú Tàtá-í cundecu-í nàcuáa níhí ndée-gã-yu cundecú-yu. ¹³ Te nchaa sá ná càcáⁿ-ndó te taxi-í te núu na quíndáá iní ñáhá-ndó

xì-í, te nchaa cada-í cuèndá cutnùnì iní ñáyiú sá ïo càhnu cuu Tàtá-í Dútú Ndiöxí. ¹⁴ Te yúhú cada-í nchaa sá cuìní-ndó càcáⁿ táhú-ndó nùù-í, te núu na quìndáá iní ñáhá ndisa-ndo xii-í.

Jèsús càchí-gá sá téndàha-gá Espíritú Yă Ndiöxí quixi cundecu ndihí-o

¹⁵ Te núu nchòhó cúú ìní ñáhá-ndó xì-í te tñi-ndo nchàa tñúhu càháⁿ-í. ¹⁶ Te yúhú cacáⁿ táhù-í núú Tàtá-í sá téndàha-gá Espíritú-gá quixi cundecu ndihí-ndo cànu ichi ñaha-xi xii-ndo nacuaá cundecu-ndo, te chindee ñàha-xi xii-ndo nì caa nì quíhíⁿ. ¹⁷ Te nchaa ñáyiú ndècu ichi cuehé ichi duha ñá túú xìní-yu Espíritú Yă Ndiöxí te ni vă cúú cùndecu ndihí-yu. Dico nchòhó sa xìní-ndó Espíritú-gá te ndècu ndihí ñaha-xi xii-ndo. Te sáá ìⁿ nduu te cunuu Espíritú-gá iní-ndó. ¹⁸ Te yúhú vá dáñá ñihnu ñaha-í xii-ndo, chi quixi tucu-í cundecu ndihí ñaha-ï xii-ndo. ¹⁹ Te sácú duha-ná nduu ndècu-í te vá quìní ñáhá-gă ñáyiú xii-í, dico nchòhó chi quìní ñáhá-ní-ndó xì-í. Te ducaⁿ-ni cùndecu-ndo ichi váha chi cundecu ndihí ñaha-ï xii-ndo nì caa nì quíhíⁿ. ²⁰ Te dàvá-áⁿ cutnùnì iní-ndó sã ndécù-í ndihí Tàtá-í, te ducaⁿ nchòhó cundecu ndihí ñaha-ni-ndo xii-í. ²¹ Te nchaa ñáyiú dàcuaha tñúhu-í te tñi-nyu, ñáyiú-áⁿ quidé ndisá-yu sá cúú ìní ñáhă-yu xii-í. Te ducaⁿ Tàtá-í cúú ìní ñáhá-gă xií-yu, te ducaⁿ-ni yúhú cúú ìní-í-yu tucu, te ducaⁿ te cùtnuní iní-yu sá ndécú ndihí-í-yu —càchí-gá xáhaⁿ-gă xii-dé.

²² Te ní cáháⁿ ìⁿ tée nàni Judás dico ñá díú tẽ Jùdás déhe té Xímú Iscàrioté ní cáháⁿ, chi ìngá té Jùdás ní xáhaⁿ-dẽ xii-gá:

—Mèstrú, ¿nása cada-n cuendá cutnùní iní-ndí sá cùndècu ndihì ñaha-n xii-ndí, te ñáyiú ñùhu ichi cuehé ichi duha vá cùndècu ndihí-n-yu-i? — càchí-dé xǎhaⁿ-dě xii-gá.

²³ Te ní xáhaⁿ Jèsús xii-güedé:

—Nchaa ñáyiú cùu iní ñáhá xii-í te tnǎ-yu tnúhu càháⁿ-í, te ñáyiú-áⁿ cúú ìní ñáhá Tǎtà-í xií-yu, te yúhú ndihì Tǎtà-í ndécú-ndǎ ndihí-yu. ²⁴ Te nchaa ñáyiú ñá túú cùu iní ñáhá xii-í te ñá túú tnǎ-yu tnúhu càháⁿ-í. Te nchaa tnúhu ní cáháⁿ-í ní xíndèdóho-ndo chi Tǎtà-í Yaá ní tendaha ñaha xii-í véxi-í ñuyíú-a ní dácáhú ìní ñáhá-gǎ xii-í, te ñá díú mèe-í ní càhu iní-í tnúhu cáháⁿ-í.

²⁵ Duha ndùu tnúhu càháⁿ-í núú-ndó vìtna ndecu ndihì ñaha-gá-í xii-ndo. ²⁶ Dico Yá Ndiǒxí tendaha-gǎ Espíritú-gá quixi-xi cada-xi núu-í taxi-xi tnúhu ndee ìní xii-ndo, te ñu-xi chindee ñaha-xi xii-ndo te danèhé ñáhá-xí xii-ndo nchaa sá cúmǎní quini-ndó, te ñu-ni-xi dandàcu iní ñáhá-xí xii-ndo nchaa nacuaá ní cáháⁿ-í.

²⁷ Te yúhú chindee chítuu ñaha-í xii-ndo ïo váha cuu iní-ndó cùndecu-ndo datná yúhú ío váha cùu iní-í ndécù-í, chi sa ta cùyatni nduu núhú-í. Te yúhú càchí tnúhu ndáá-í sá chíndèe ñaha-í xii-ndo, te vá cadà-í dàtná quidé ñáyiú ñùhu ichi cuehé ichi duha. Te ni vǎ ndihú iní-ndó, te ni vǎ yuhú-ndó. ²⁸ Te sa ní xíndèdóho-ndo ní cáháⁿ-í sá nùhú-í, te quixi tucu-í cundecu ndihì ñaha-í xii-ndo. Te núu ndisa cùu iní ñáhá-ndó xii-í ñá, te òré ní níhí-ndó tnúhu sá nùhú-í núu ndécú Tǎtà-í, te cudǎ ìní-ndó ní cùu, chi ío càhnu cuu-gá dàcúúxí yúhú. ²⁹ Te sa ní cachí tnúhu-í sá nùhú-í, te na sàá òré núhú-í núu ndécú Tǎtà-í, te quindáá iní ñáhá-ndó xii-í.

³⁰ Te ñá túú-gă vâi tnúhu ndatnúhu ndihî ñaha-ï xii-ndo chi sa véxi yucu ñăvâha sá táxí tnùní ñuyíú-a, dico vá táxí tnùní ñáhá-xí xì yúhú. ³¹ Te cada-í nchaa nâcuáa ní táúchíúⁿ Tătà-í cuendá cutnùní iní nchaa ñáyiu ñuyíú-a sá yúhú ío cùu iní-í-gá. Te vitna chí ndácuïñî ná quihîⁿ-ó –càchí-gá xáhaⁿ-gă xii-güedé.

15

Cuendá yoho yàha stilé ndihî nchaa dité-xi

¹ Te ní xáhaⁿ tùcu-gá xii-güedé:

–Yúhú cùu-í dàtná yoho yàha stilé, te Tătà-í cúú-gă dàtná ìⁿ téé xìto yoho yaha stilé-áⁿ. ² Te nchaa ñáyiu ní sándáá iní ñáhá xì-í cúú-yu dàtná dité nchaa yoho yàha stilé-áⁿ. Te téé xìto yoho yaha stilé-áⁿ xèhndé-dé nchaa dité-xi sá ñă cuìní-gá-xi cuuⁿ ndéhé-xi, te ndàda ndoo-dé nchaa dité-xi sá cúúⁿ cuendá cuuⁿ-gá. ³ Te ducaⁿ sãtnahá-xi cùu nchohó, chi sa ní xócuïñî nchaa sá cuèhé sá dúhá ndècu ndihî-ndo, chi ní sándáá iní-ndó tnúhu ní cáháⁿ-í. ⁴ Te cuu ìⁿnuu-ndo cùndecu ndihî ñaha-ndo xii-í, te núu ducaⁿ na càda-ndo, te cundecu ndihî ñaha-ï xii-ndo. Chi núu ìⁿ yutnu vídí ná quèndéé dité-xi, te dité-xi sá ñă quèndéé-áⁿ vâ cúúⁿ-gă sávidí-xi chi duuⁿ duuⁿ ní xíta-xi. Ducaⁿ sãtnahá-xi cùu nchohó chi vá ndácú-ndó càda-ndo chiúⁿ-í, te núu vá cùndècu ndihî ñaha-í xii-ndo.

⁵ Chi yúhú cùu-í dàtná yutnu vídí-áⁿ, te nchòhó cúú-ndó dàtná nchaa dité-xi. Te nchaa ñáyiu cùu ìⁿnuu ndihî ñaha xii-í, te ndècu ndihî-í-yu, te ndácú-yu quidè-yu chiúⁿ-í. Te núu vá cúú ìⁿnuu ndihî ñahá-yu xii-í, te vá ndácú-yu cadá-yu chiúⁿ-í.

⁶ Te nchaa ñáyiu vá cúú ìⁿnuu ndihî ñaha xii-í, te

yáha-yu dàtná yáha ìⁿ dité yutnu vǐdí sá ñà túú cùuⁿ sávìdí-xi, chi xèhndé-güedé yìchí-xi, te sàhmi-güedé.

7 'Cuu ìⁿnuu ndìhì ñaha-ndo xii-í, te vá nácuànaa-ndo nacuaá ní cáháⁿ-í. Te núu ducaⁿ na càda-ndo, te nání cuìní-ndó cǎcáⁿ-ndó núu-í te taxi-í. 8 Te núu nchòhó ná cádá vǎha-ndo cùndecu-ndo, te ío cada càhnu-ndo Tàtá-í, te ducaⁿ cùtnuní sá ndísá cùu-ndo cue téé ní chitnahá ñáhá xii-í. 9 Te yúhú ío cùu iní ñáhà-í xii-ndo dàtná cúú iní ñáhá Yǎ Ndiöxí xii-í. Te cada-ni-ndo mèè-ni sá vǎha cuendá cudíí iní ñáhá-gǎ-í xii-ndo. 10 Te núu na quìndáá iní-ndó càda-ndo nchaa nacuaá ní cáháⁿ-í, te ío cuu iní ñáhà-í xii-ndo, chi yúhú ducaⁿ ío sàndáá iní-í Tàtá-í quidè-í nchaa nàcuáa ní cáháⁿ-gǎ, te xiǎⁿ núu ío cùu iní ñáhá-gǎ xii-í.

11 'Duha càháⁿ-í núu-ndó cuendá cudíí ndísa iní-ndó dàtná cúú iní mèè-í. 12 Te duha ndùu tnúhu càháⁿ-í cuendá sá cúú iní tnáhá-ndó ìⁿ ìⁿ-ndo datná cúú iní ñáhà-í xii-ndo. 13 Te núu ní xíhó sǎ cúú-xí ìⁿ téé ío váha tnàhá tnúhu ndìhì-o, te xiǎⁿ cutnùní iní ñáyíu sá ío cùu iní-ó-dě. 14 Te nchòhó cuu-ndo cuè téé ío váha tnahá tnúhu ndìhì-í te núu na càda-ndo nchaa nacuaá càháⁿ-í. 15 Te vá cùñaha-gǎ-í xii-ndo sǎ cúú-ndó cuè téé xìnu cuechi núu-í, chi ni ìⁿ téé xìnu cuechi ñá túú xìní-dé ná quidé pàtróóⁿ-dě. Te yúhú càchí-í xii-ndo sǎ cúú-ndó cuè téé ío váha tnàhá tnúhu ndìhì-í, chi ní cǎchí tnúhu-í nchaa nàcuáa ní cáháⁿ Tàtá-í. 16 Te ñá díú nchòhó ní càháⁿ ñáhá-ndó xì yúhú, chi yúhú ní cáháⁿ ñáhà-í xii-ndo. Te yúhú tauchìuⁿ-í quíhìⁿ-ndó càda-ndo nchaa nacuaá ní cáháⁿ-í, chi tnúhu-áⁿ vǎ ndíhí nìhnu-xi. Te ducaⁿ nchàa sá ná cǎcáⁿ-ndó núu Tàtá-í Yǎ Ndiöxí te taxi-gǎ, te núu na quìndáá iní

ñáhá-ndó xì-í. ¹⁷ Te yúhú càháⁿ-í dóho-ndo sǎ cúú ìní tnáhá-ndó ìⁿ ìⁿ-ndo.

*Ñáyiú ndècu ichi cuehé ichi duha cùu úhú iní-yu
Jèsús ndìhi nchaa ñáyiú sàndáá iní tnúhu-gá*

¹⁸ Te nchaa ñáyiú ndècu ichi cuehé ichi duha ñá cúú quìní ñáhǎ-yu xii-ndo, te sa nàha-ndo sá dǐhna-gá yúhú ní ngüíta-yu ducaⁿ ñà cúú quìní ñáhǎ-yu xii-í. ¹⁹ Te núu dicó tnàhá nchòhó ndécú-ndó ichi cuehé ichi duha ña, te cuu iní ñáhǎ-yu xii-ndo dàtná cúú ìní tnáhǎ-yu ndì mèé-yu ni cùu. Te yúhú ní nanducu ñihnu ñaha-í xii-ndo tnúú ñáyiú ndècu ichi cuehé ichi duha, núu xiǎⁿ ío cùu úhú iní ñáhǎ-yu xii-ndo cuèndá sá ñà túú-gǎ chítnàhá-ndǒ-yu. ²⁰ Te dandàcu iní-ndó nàcuáa ní cáháⁿ-í sá nì ìⁿ téé xìnu cuechi ñá túú cùnùu-dé dàcúúxí pàtróóⁿ-dé. Te yúhú cúú úhú iní ñáhǎ-yu, te ñi-ni ducaⁿ càda ñahá-yu xii nchòhó. Te núu dicó ní tnǐⁿ-yú tnúhu ní cáháⁿ-í ñá, te ñi-ni ducaⁿ tnǐⁿ-yú tnúhu cáháⁿ-ndó nǔǔ-yu ni cùu. ²¹ Te ducaⁿ càda ñahá-yu xii-ndo sǎ cuèndá-í, chi ñá xìní-yu Tǎtà-í Yáá ní tendaha ñàha xii-í véxi-í ñuyíú-a.

²² Te vǎa vǎa cùndècu cuéchi-yu ni cùu, te núu ñá túú yúhú ní cǎháⁿ-í núǔ-yu, te vitna vǎa cúú tnàhí cachí-yu sá ñà túú cuéchi-yu. ²³ Chi nchaa ñáyiú cùu úhú iní ñáhǎ xì-í, te cùu úhú iní-yu tnàhá Tǎtà-í. ²⁴ Te vǎa ni ìⁿ cuéchi-yu vǎa cùndècu ni cuu, te núu dicó ñá túú ní xìní-yu nchaa sá ñǐ quide-í sá vǎ yǒo tnàhí ndàcu cada. Te cuèi ní xìní-yu dico dai cùu úhú iní ñáhǎ-yu xii-í ndìhi Tǎtà-í. ²⁵ Te duha quidé-yu chi dacu:íí quèè ndáá-xi nàcuáa yòdo tnuní núú tütú Yǎ Ndiǒxí sá dácuàhá-yu,

chi càchí-xi sá ñà túú nă cuéchi-í te cuu úhú iní ñáhă-yu xii-í.

²⁶ Te Espíritú Tătà-í Dútú Ndiöxí sá ndécú nűú-gă tendaha-í quixi chindee ñaha-xi xii-ndo, te canu ichi ñaha-xi năcuáa cundecu-ndo, te Espíritú-áⁿ cǎháⁿ ndáá-xi cuendá cutnùní iní nchaa ñáyu yoo cùu-í. ²⁷ Te nchòhó tnàhá-ndó cǎháⁿ váha-ndo cuendá-í cuendá cutnùní iní-yu yoo cùu-í, chi nàha-ndo sá ndèé òré ní ngúíta-í quidè-í chiùⁿ Tătà-í ní chitnahá ñáhá-ndó xii-í —càchí-gá xáhaⁿ-gă xii-güedé.

16

¹ Te ní xáhaⁿ tùcu-gá xii-güedé:

—Duha càháⁿ-í cuendá ná nanchòcáva iní-ndó nűhú-ndó ichi cuéhé ichi duha. ² Chi vá dáñá-gă-güedé quihu-ndo vèñúhu, te ni vǎ cúú-gǎ quini ndeé ñáhá-güedě xii-ndo. Te sáá ìⁿ nduu te cahni ñaha-güedě xii-ndo, te xǎⁿ cuu cahaⁿ-güedě sá quidé-güedě chiùⁿ Yá Ndiöxí. ³ Te ducaⁿ càda-güedě chi ñá túú xini-güedé Tătà-í, te ni ñà túú xini ñáhá-güedě xii yúhú. ⁴ Te duha ndùu tnúhu càháⁿ-í núú-ndó, chi na sáá òré te ndacu iní-ndó nchàa tnúhu sá sà ní cachí tnúhu-í xii-ndo năcuáa cada ñaha-güedě xii-í.

Nchaa chiùⁿ quide Espíritú Yǎ Ndiöxí

Te ñá túú ní càchí tnúhu-í xii-ndo ndèé díhna chi ndècu ndìhi ñaha-í xii-ndo. ⁵ Dico vitna sa ta cùyatni nduu núhú-í núú ndécú Tătà-í Yaá ní tendaha ñaha xii-í véxi-í ñuyíú-a. Te ni ìⁿ nchohó ñá túú xicáⁿ tnúhú-ndó nűú-í nűu ndèé quíhíⁿ-í. ⁶ Chi mee-ni sǎ ndìhú iní-ndó sǎ dúcáⁿ nǐ cǎháⁿ-í. ⁷ Te na càchí tnúhu ndáá-í xii-ndo sǎ vǎha-gá sá cúú-xí-ndó nűu

núhú-í, chi tendaha-ĩ Espíritú Yă Ndiõxí quixi cundecu ndìhi-ndo chìndee ñaha-xi, chi núu vá nùhú-í te vá quíxí Espíritú-gá cundecu ndìhi-ndo chìndee ñaha-xi xii-ndo. ⁸ Te na quìxi Espíritú-gá te dandìxi túu-xi iní nchaa ñáyiu ndècu ichi cuehé ichi duha sá ñà túú quide váha-yu. Te dacàhu iní ñáhá-xí sã ndécú ìⁿ ichi váha ichi ndáá. Te Espíritú-gá-áⁿ cada-xi nàcuáa cutnùní iní-yu sá Yă Ndiõxí cada ndáá-gá cuéchi-yu. ⁹ Te ducaⁿ te cutnùní iní-yu sá ndécú cuéchi-yu, chi ñá túú sàndáá iní ñáhã-yu xii-í. ¹⁰ Te ducaⁿ te cutnùní iní-yu nàcuáa ndùu cuendá ichi váha ichi ndáá, chi yúhú núhú-í núú ndécú Tătà-í, te nchòhó vá quìní ñáhá-gã-ndó. ¹¹ Te ducaⁿ te cutnùní iní-yu sá Yă Ndiõxí cada ndáá-gá cuéchi-yu, chi sa ní cáháⁿ-gá sá yúcú ñävãha sá táxí tnùní ñuyíú-a quíhíⁿ-xi núú ùhú núú ndàhú.

¹² Te vài-gá tnúhu ndècu cachí tnúhu-í xii-ndo, dico nchòhó chi vá cùndèe iní-ndó cùndedóho-ndo nchàa vitna. ¹³ Te na quìxi Espíritú Yă Ndiõxí, Espíritú càháⁿ ndáá cuiti, te Espíritú-áⁿ danèhé ñáhá-xí nchàa tnúhu váha tnúhu ndáá. Te vá dacàhu iní ñáhá-xí xii-ndo sá vèxi iní méé-xí chi dacàhu iní ñáhá-xí nchàa sá càháⁿ Yă Ndiõxí, te cachí tnúhu-xi nchaa nàcuáa cada-xi ndéé núú cuaháⁿ núú vèxi-gá. ¹⁴ Te Espíritú-gá-áⁿ cada càhnu ñaha-xi xii yúhú chi ndècu ndìhi-xi tnúhu-í, te danèhé ñáhá-xí xii-ndo. ¹⁵ Te nchaa sá ndécú ndìhi Tătà-í ndécú ndìhi-í tnàhá-í, núu xiáⁿ càhí-í sá Espíritú-gá danèhé ñáhá-xí nchàa tnúhu-í xii-ndo.

Nchaa ñáyiu ndìhú iní-xi nduu dǎí iní-yu na quixi tucu Jesús

16 'Te ìíⁿ úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tùcu-ndo xii-í, te ducaⁿ chi núhú-í núú ndécú Tǎtà-í —càchí-gá xáhaⁿ-gǎ xii-güedé.

17 Te sá dúcáⁿ nǐ cáháⁿ-gá nǔu ní ngüíta ìíⁿ úú cue téé xìca cuu ndìhi-gá xǐtnàha-güedé:

—¿Nása ndùu-tu tnúhu càháⁿ-gá sá càchí-gá sá ìíⁿ úú-nǎ nduu ndècu-gá te vá quìní-gá-ó-gǎ, dico núú sàcú-ni nduu te quìní tucu-o-gǎ-i?, chi núhú-gá núú ndécú Tǎtá-gǎ —càchí-güedé xǐtnàha-güedé.

18 Te xǐtnàha tucu-güedé:

—¿Nása cuáháⁿ-tu tnúhu-ǎⁿ sá sàcú-ni nduu? Te ñá tècú tnùnì-ó nása ndùu tnúhu càháⁿ-gá —càchí-güedé xǐtnàha-güedé.

19 Te Jèsús ní cutnùnì iní-gá sá cuìní-güedé cǎcáⁿ tnúhú-güedé núú-gǎ nása ndùu tnúhu ní cáháⁿ-gá, núú ní xáhaⁿ-gǎ:

—Cuendá sá nǐ cachí-í sá ìíⁿ úú-nǎ nduu ndècu-í te vá quìní ñáhá-gǎ-ndó xii-í, dico núú sàcú-ni nduu te quìní ñáhá tùcu-ndo xii-í ní cachí-í, ¿xíⁿ ndúcú tnúhu núú tnáhá-ndó-ǎⁿ? —càchí-gá xáhaⁿ-gǎ xii-güedé.

20 Te ní xáhaⁿ tùcu-gá:

—Te na càchí tnúhu ndáá-í xii-ndo sǎ nchòhó ndíhú víhí iní-ndó te ndáhyú-ndó, dico nchaa ñáyiú ndècu ichi cuehé ichi duha chi da cudí^í iní-yu. Dico nchòhó ñáyiú ndáhyú chi sáá nduu te nduu díí iní-ndó. 21 Chi dàtná cuìní-ndó cùu ìíⁿ ñadíhí ñaha ní tnáhá nduu cacu déhe-xi vai sani iní-aⁿ sá quidé úhú ñáhá-xí. Dico na yáha cacu déhe-aⁿ, te ñá túú-gǎ ndácú iní-aⁿ sá nǐ quide úhú ñáhá-xí xii-aⁿ chi mee-nǎ sá cúdí^í iní-aⁿ déhe-aⁿ. 22 Ducaⁿ

sătnahá-xi cùu nchohó vitna chi ndìhú iní-ndó sã nùhú-í, dico quixi tucu-í quixi coto ñaha-í xii-ndo, te òré-áⁿ te cudíí ndìsa iní-ndó, te vá yõo ìⁿ-gá dandìhú iní ñáhá xii-ndo davá-áⁿ.

²³ Te dàvá-áⁿ ñà túú-gã ná nducu tnũhu-ndo nũù-í. Te na càchí tnũhu ndáá-í xii-ndo sã Tătà-í taxi-gá nchaa sá ná càcáⁿ-ndó nũú-gã nũu na quìndáá iní ñáhá-ndó xii-í. ²⁴ Te ndéé vitna vátá dúcáⁿ-gã cada-ndo càcáⁿ-ndó. Dico càcáⁿ-ndó nũú-gã nũu ná cuìní-ndó te taxi-gá cuendá cudíí ndìsa iní-ndó —càchí-gá xáhaⁿ-gã xii-güedé.

Xítóhó Jesucristú ní cunuu tnũhu-gá núú yucu ñávãha

²⁵ Te xáhaⁿ tucu-gá xii-güedé:

—Mee-ni ñí chidáhu ndodo-í tnũhu ní cáháⁿ-í núú-ndó, dico sáá nduu te vá chidãhu-gá-í tnũhu cáháⁿ-í, chi cáháⁿ ndáá-na-í cuendá Tătà-í. ²⁶ Te dàvá-áⁿ càcáⁿ-ndó nũú Tătà-í nũu ná cuìní-ndó te taxi-gá, te núu na quìndáá iní ñáhá-ndó xii yúhú Déhe-gá. Te ñá túú-gã xini ñũhu-xi sá yúhú càcáⁿ-í núú-gã cuendá-ndó chi càcáⁿ méé-ñã-ndó. ²⁷ Chi mee Tătà-í ío cùu iní ñáhá-gã xii-ndo cuendá cúu iní ñáhá-ndó xii-í, te sàndáá iní-ndó sã nũú-gã ní quee-í véxi-í. ²⁸ Te yúhú ní quee-í núú Tătà-í véxi-í ñuyíú-a, te vitna dándóo-í ñuyíú-a te núhú-í núú ndécú-gã —càchí-gá xáhaⁿ-gã xii-güedé.

²⁹ Te ní xáhaⁿ cuè téé xica cuu ndìhi-gá:

—Vitna chi càháⁿ ndáá-ñã-n, ñá túú-gã chidãhu-n tnũhu càhá-n. ³⁰ Te vitna ní xini-ndí sá ïo váha cùtnuní iní-n nchàa nacuaá cùu, te cùtnuní iní-n nchàa nacuaá sàni iní nchaa ñáyíu. Te ñá túú xini ñũhu-xi nágá nducu tnũhu-yu núú-n chi nchaa

sa ní dátũu-n nũũ-yu. Te xíǎⁿ nũũ sàndáá iní-ndí sá nũũ Yǎ Ndiǒxí ní quee-n vëxi-n —càchí-güedé xǎhaⁿ-güedë xii-gá.

³¹ Te ní xáhaⁿ Jèsús:

—¿Te vitna sàndáá iní-ndó-ǎⁿ? ³² Vitna ní sáá nduu nǐ sáá òré sá ncháá nchòhó cuténuu-ndo cǎa ñⁿ cǎa úú cuu-ndo, te dándóo mee ñàha-ndo xii-í. Dico ñá díú mèe dii-í quendóo chi ndècu ndihi-í Tǎtà-í. ³³ Duha càháⁿ-í cuendá cuu váha iní-ndó cùndecu-ndo, chi ñuyíú-a cuu úhú iní ñáhǎ-yu xii-ndo, dico ni vǎ yùhú-ndó chi yùhú sa ní dáquée tíhù-í nchaa sá cuèhé sá dúhá ió ñuyíú-a —càchí-gá xáhaⁿ-gǎ xii-güedé.

17

Jèsús xicáⁿ táhú-gǎ núú Tǎtà-gǎ Dútú Ndiǒxí cuendá cue téé xica cuu ndihi-gá

¹ Te sátá dúcáⁿ nǐ cáháⁿ Jèsús te ní ndacoto-gá andiú, te ní xáhaⁿ-gǎ xii Tǎtà-gǎ Dútú Ndiǒxí:

—Táu, vitna ní sáá nduu cǎda cahnu ñaha-n xii-í cuendá ducaⁿ cǎda cahnu ñaha-í xii-n. ² Chi mee-n nǐ cachí-n sǎ táxí tñuní-í nchaa ñáyíu ñuyíú-a, te dàcacu nihnu-í nchaa ñáyíu ní cachí-n nàníhí tàhú.

³ Te cundecu ndihi-ǒ-yu nǐ cǎa nǐ quíhíⁿ, chi sàndáá iní ñáhǎ-yu sá ñⁿ dìi díi-ni yòhó cúú-n Ndiǒxí ndisa, te ducaⁿ xini ñáhǎ-yu xii yùhú Jesucristú téé ní tendaha-n vëxi ñuyíú-a.

⁴ Te yùhú ní chiñuhu ñaha-í xii-n ñuyíú-a, te ní xínu chiúⁿ ní cachí-n cǎda-í. ⁵ Táu, vitna na nàsáá-í núú-n te cada cahnu ñaha-n xii-í dàtná ní xóo cada cahnu ñaha-n xii-í ndéé cùtnáhá vátá ngǎva-gá ñuyíú.

6 'Te nchaa ñáyiú ní nanducu ñhnu-n tnuú nchaa ñáyiú ndècu ichi cuehé ichi duha, ní taxi cuèndá-n-yu, te ní xáhaⁿ-í xii-yu yoo cùu-n. Te cuèndá-n cùú-yu, te ní taxi cuèndá-n-yu, te ní sándáá iní-yu tñuhu-n. 7 Te vitna ní cutnùní iní-yu sá ncháá tñuhu ndècu ndihí-í ðiu-ni mee-n ñí taxi-n. 8 Te ní dánèhé-í-yu nchaa tñuhu sá ñí dánèhé ñáhá-n xii-í, te ní sándáá iní-yu. Te ní cutnùní iní-yu sá nñú-n ñí quee-í véxi-í, te ní sándáá iní-yu sá yòhó ní tendaha ñàha-n xii-í véxi-í ñuyíú-a.

9 'Te yúhú càháⁿ ndàhú-í núú-n cuèndá nchaa ñáyiú ní taxi cuèndá-n. Te ñá túú càháⁿ ndàhú-í núú-n cuèndá ñáyiú ndècu ichi cuehé ichi duha, chi cuèndá nchaa ñáyiú ní taxi cuèndá-n càháⁿ-í, chi cuèndá-n cùú-yu. 10 Te nchaa sá cúú cuèndá-í cúú-xí cuèndá-n, te nchaa sá cúú cuèndá-n cùu-xi cuèndá-í tñáhá-í. Te xíquide càhnu ñáhá-yu xii-í.

11 'Te yúhú vá cùndècu-gá-í ñuyíú-a, dico mèé-yu chi cundecu-ní-yu, te yúhú ndixi-í núú ndécú-n. Táu, yòhó ío yíñùhu ndecu-n, te yúhú càháⁿ ndàhú-í núú-n sǎ ní yùhu ñí iní-n còto-n nchaa ñáyiú ní taxi cuèndá-n, ñáyiú ní sándáá iní tñuhu-í cuèndá sá ñíⁿ-ní ìchi cuú-yu cundecú-yu dàtná ñíⁿ-ni cùu nchoo. 12 Chi òré ndécú-í ndihí-yu ñuyíú-a ní xito-í-yu nàcuáa cùu iní-n, te ní ñíⁿ-yu ñá túú ní xíta nihnu, chi ñíⁿ ñíⁿ-ni té Jùdás ní xíta nihnu tñáhí-dé, te ducaⁿ ñí cuu cuèndá sá ñí quee ndáá-xi nàcuáa yòdo tñuní núú tütú-n.

13 'Te vitna sa ndixi-í núú ndécú-n, dico ñini ndècu-gá-í ñuyíú-a duha càháⁿ-í cuèndá sá cúú ñíⁿ iní-yu dàtná cúú ñíⁿ ñíⁿ mèé-í. 14 Te yúhú ní

dánèhé-í-yu tnúhu-n, dico nchaa ñáyiú ndècu ichi cuehé ichi duha cùu úhú iní ñáhă-yu xií-yu cuendá sá ñà túú-gă ndécŭ-yu ichi cuèhé ichi duha-án dâtná yúhú ñá túú ndècu-í ichi-án. ¹⁵ Te ñá túú càchí-í sá xócàní-n-yu ñuyúú-a, dico càháⁿ ndàhú-í núú-n sã dácăcu ñìhnú-n-yu núú yucu ñăvăha. ¹⁶ Te yúhú ñá túú ndècu-í ichi cuèhé ichi duha, te ducaⁿ mée-yu ñá túú-gă ndécŭ-yu ichi cuèhé ichi duha. ¹⁷ Te ío na cùndecu yìhì ñuhu-gá-yu núú-n dàcuahá-yu tnúhu-n, chí cùu-xi ñⁿ tnúhu ndáá. ¹⁸ Te dâtná ní tendaha ñàha-n xii yúhú véxi-í tnuú nchaa ñáyiú ndècu ichi cuehé ichi duha, ducaⁿ càda-í tendaha-í-yu quíhíⁿ-yu cáháⁿ-yu tnúhu-í tnuú nchaa ñáyiú ndècu ichi cuehé ichi duha. ¹⁹ Te yúhú ndécú yìñuhu-í núú-n, te cada ñàha-n xì-í nàcuáa cùu iní-n sã cuendá-yu, te ducaⁿ te cundecu yìñùhú-yu núú-n dàcuahá-yu tnúhu-n.

²⁰ Te ñá díú cuendá mee-ni ñáyiú sa ní sándáá iní-xi càháⁿ ndàhú-í núú-n, chí tnhá cuendá nchaa ñáyiú na quíndáá iní ñáhá xì-í ndéé ìdá-gá nŭu na cùndedóho-yu tnúhu cáháⁿ ñáyiú na tëndaha-í. ²¹ Te xìcáⁿ táhù-í núú-n sã ncháă-yu ñⁿ-nă ichi na cùú-yu, te ñⁿ-nă caní iní ndìhì ñàhá-yu xii-o dâtná cúú nchòo ñⁿ-ni cuu-o. Te ducaⁿ ñⁿ-ná cuu-o ndìhí-yu cuendá sá ná quíndáá iní nchaa ñáyiú ndècu ichi cuehé ichi duha sá díú-n ñí tendaha ñàha-n xii-í véxi-í ñuyúú-a. ²² Te nchaa sá văha ní taxi-n ndècu ndìhì-í ní dánèhé-í-yu cuendá sá ñⁿ-nă cuú-yu cundecú-yu dâtná ndécú nchòo. ²³ Te yúhú cundecu ndìhì-í-yu, te yòhó cundecu ndìhì ñàha-n xì yúhú cuendá ñⁿ-nă cuu

ndisá-yu cundecú-yu. Te ducaⁿ te cutnùnì iní nchaa ñáyiú ndècu ichi cuehé ichi duha sá díú mèe-n ní tendaha ñàha-n xii-í véxi-í ñuyíú-a, te cùu iní-n-yu dàtná cúú iní ñáhá-n xii yúhú.

²⁴ "Táu, mee-n ñí taxi cuendá-n-yu, te cuiní-í sá cùndècú-yu núú cùndècu-í cuendá quiní-yu sá quidé càhnu ñaha-n xii-í chi ducaⁿ-ni cùu iní ñáhá-n xii yúhú ndéé cùtnàhá vátá ngăva-gá ñuyíú. ²⁵ Táu, yòhó ío yíñùhu ndecu-n. Te ñáyiú ndècu ichi cuehé ichi duha ñá túú xìní ñáhă-yu xii-n, dico yúhú chi xìní ñáhà-í xii-n, dico ñáyiú ní sándáá iní ñáhá xii-í sa xìní-yu sá díú-n ñí tendaha ñàha-n xii-í véxi-í ñuyíú-a. ²⁶ Te sa xăhaⁿ-í xii-yu yoo cùu-n, te diu-ni ducaⁿ càda-í cuendá cuu iní tnáhă-yu dàtná cúú iní ñáhá-n xii-í, te ducaⁿ cùndecu-í ndihí-yu —càchí-gá xăhaⁿ-gă xii Tătá-gă Dútú Ndiöxí.

18

Ní tnî-güedé Jèsús ndécá ñàha-güedé cuáháⁿ
(Mt. 26:47-56; Mr. 14:43-50; Lc. 22:47-53)

¹ Te sátá dúcáⁿ ñí cáháⁿ Jèsús, te ní quee-gá ndihí cue téé xica cuu ndihí-gá cuáháⁿ-güedé ndăa ingá xio yuhu yùú Cèdrón. Te yàcáⁿ cáá ñíⁿ lahuertá, te xití lahuertá-án cuănguïhu Jèsús ndihí cue téé xica cuu ndihí-gá. ² Te té Jüdás déhe té Xímú Iscarioté téé ní sáha cuendá ñáhá xii-gá núú cuè téé cùu úhú iní ñáhá sa xìní-dé lahuertá-án chi titní xito ní sáháⁿ Jèsús ndihí-güedé xíaⁿ. ³ Núú ndăá ichi xíaⁿ ñí sáá té Jüdás ndihí vâi sandadú, ndihí cue téé quide cuendá veñúhu ní techiⁿ ñaha cue dútú cúnùu, ndihí cue téé cùu fariséú. Te xînehe-güedé machití ndihí ñíⁿ úú-gá sá dĕĕⁿ, te yòtnuú-güedé

l'interná ndihi iti ní sáá. ⁴ Te Jèsús sa nàha-gá nchaa nàcuáa cada ñaha-güedě xii-gá nũu ní sáháⁿ tuha ñaha-gă xii-güedé, te ní xáhaⁿ-gă:

—¿Yoo nànducu-ndo? —cachí-gá xáhaⁿ-gă xii-güedé.

⁵ Te ní xáhaⁿ-güedě:

—Jèsús tée ñuú Nazàrét nándücu-ndí —càchí-güedé xăhaⁿ-güedě xii-gá.

Te ní xáhaⁿ Jèsús:

—Yúhú ducaⁿ nàni-í, te náu-í ndécú-á te núu yúhú nándücu-ndo —cachí-gá xáhaⁿ-gă xii-güedé.

Te tnàhá té Jùdás tée ní sáha cuendá ñáhá xii-gá ndihi-güedé. ⁶ Te òré ní xáhaⁿ Jèsús sá díú-gă cúu tée nànducu-güedé, te ní nacaca dùma-güedé te ní nduá-güedé ndéé ñuhu. ⁷ Te ní xicáⁿ tnúhú tùcu Jèsús núu-güedé yoo nànducu-güedé. Te ní xáhaⁿ tùcu-güedé sá Jèsús tée ñuú Nazàrét nándücu-güedé, ⁸ núu ní xáhaⁿ-nă Jèsús:

—Sa ní cáháⁿ-í sá díú yúhú ducaⁿ nàni-í, te núu yúhú nándücu-ndo, te dañà-ndo nchàa cue tée iha na nùhú-güedé —càchí-gá xáhaⁿ-gă xii-güedé.

⁹ Duha ní cuu chi ní quee ndáá-xi nàcuáa ní cáháⁿ méé Jèsús chi ní cachí-gá sá ncháá ñăyiu ní sáha cuendá ñáhá Yă Ndiõxí cundecu ndihi-gá vâ cuíta nihnú-yu. ¹⁰ Te té Xímú, àdi Pelú chi úú diù-dé, néhé-dě ìⁿ machití, te ní tava-dé machití-áⁿ ñì-xi te ní xehndé-dé lóhò xio cùhà ìⁿ téé nàni Malcú ní quéndeé duuⁿ. Te téé-áⁿ xínú cuèchi-dé núu dütú cúnùu-gá. ¹¹ Te ní xáhaⁿ Jèsús xii té Pèlú:

—Nataxúha machití-áⁿ nũú ñúhú-xí, chi dacuítí să ndóhò-í nàcuáa ní cachí Tătà-í cunduu —càchí-gá xáhaⁿ-gă xii-dé.

*Jèsús ndécú-gǎ núú dütú cúnùu-gá
(Mt. 26:57-58; Mr. 14:53-54; Lc. 22:54)*

¹² Te cue sandàdú ndihì cue tée cùnùu-gá núú-güedě, ndihì cue tée quide cuendá veñúhu ní tñii-güedé Jèsús, te ní dácútú ñàha-güedé. ¹³ Te ndèca ñàha-güedé xii-gá cuáháⁿ núú ndécú tě Ànás, te té Ànás-áⁿ cúu-dě tǎtá ñadìhì té Caiřás. Te té Caiřás-áⁿ ñi cuu-dé dütú cúnùu-gá cuíá-ǎⁿ. ¹⁴ Te ñiu-ni tée-áⁿ ñi xáhaⁿ-dě xii ñáyiú isràél sá vǎha-gá sá ííⁿ-ní tée na cùu-dé sá cuendá-yu nchaá-yu.

*Té Pèlú càháⁿ-dé núú ñáyiú sá ñà túú xìní-dé Jèsús
(Mt. 26:69-70; Mr. 14:66-68; Lc. 22:55-57)*

¹⁵ Te té Pèlú, àdi Xímú chi úu ñiú-dé, ndihì ingá tucu-dé nàcuáa xica cuu ndihì-güedé Jèsús nchìcúⁿ ñáhá-güedě xii-gá cuáháⁿ. Te ííⁿ tée-áⁿ xìní tñáhá-dě ndihì dütú cúnùu-áⁿ ñiú nchìcúⁿ-dé tñáhá-dé Jèsús cuánguihu ndéé núú cáá vèhe tée cùnùu-áⁿ. ¹⁶ Dico té Pèlú ní ndóo-dé yuyèhe ndaa quehé, núu ní ndee tée ndihì té Pèlú-áⁿ ñi càháⁿ ndihì-dé ñàha ndéé yuyèhe, te ndèca-dé té Pèlú cuánguihu. ¹⁷ Te ní xáhaⁿ ñàha ndéé yuyèhe-áⁿ xii té Pèlú:

—¿Náa ñá ñiú yòhó tñáhá-n xica cuu ndihì-n tée ndèca-güedé cuánguihu-a? —càchí-aⁿ xáhaⁿ-aⁿ xii-dé.

Te ní xáhaⁿ tě Pèlú:

—Ñáhá, ñá túú tée-ǎⁿ xicá cùu ndihì-ú —càchí-dé xáhaⁿ-dě xii-aⁿ.

¹⁸ Te ío víxiⁿ quide-xi núu cue tée xinu cuechi, ndihì cue tée quide cuendá veñúhu ní dátñáhá-güedé ñuhú, te xínutñii teté-güedé ndihì té Pèlú.

*Dútú cúnùu nducu tnúhu-dé núú Jèsús
(Mt. 26:59-66; Mr. 14:55-64; Lc. 22:66-71)*

¹⁹ Te dútú cúnùu ní xícáⁿ tnúhú-dě núú Jèsús nùu nándi cùu cue tée xìca cuu ndihí-gá, te nándi sá dánèhé ñáhá-gă xii-güedé. ²⁰ Te ní xáhaⁿ-gă:

—Yúhú càháⁿ ndodo-í núú nchàa ñáyiú cuèi xití veñúhu càhnu sá ïo cùnùu, te cuèi xití nchaa dava-gá veñúhu núú tàcá nchaa ñáyiú isràèl ducaⁿ-ni dānehé-í-yu, te ñá túú dàyuhu cáháⁿ-í.

²¹ Núú vá càcáⁿ tnúhú-n nùú-í. Càcáⁿ tnúhú nùú nchàa ñáyiú sàcúndedóho tnúhu càháⁿ-í, te na càháⁿ-yu núú nása ndùu tnúhu càháⁿ-í chí xìní-yu —càchí-gá xáhaⁿ-gă xii-dé.

²² Te sá dúcáⁿ ñí cáháⁿ Jèsús nùu ìⁿ téé quide cuendá veñúhu nùtníí-dé tnàhá-dé te ní caní-dé ìⁿ déhndé nùú-gă. Te ní xáhaⁿ-dè:

—¿Ná cuendá ducaⁿ càháⁿ-n nùú dütú cúnùu-i? —cachí-dé xáhaⁿ-dè xii-gá.

²³ Te ní xáhaⁿ Jèsús xii-dé:

—Te núú nèhé ní cáháⁿ-í te cáháⁿ-n ñása ndùu tnúhu ní cáháⁿ-í, te yúhú càháⁿ váha-í te ducaⁿ càniha-n —cachí-gá xáhaⁿ-gă xii-dé.

²⁴ Te ndùtu yoho-ni Jesús ní dánùhú ñáhá tē Anás xii-gá ndaha té Caifás dútú cúnùu-gá.

*Té Pèlú càháⁿ tucu-dé núú ñáyiú sá ñà túú xìní-dé
Jèsús*

(Mt. 26:71-75; Mr. 14:69-72; Lc. 22:58-62)

²⁵ Te té Pèlú nùtníí teté-ni-dé, te ní xáhaⁿ-güedé xii-dé:

—¿Náa ñá díú tnàhá yòhó xícá cùu ndihí téé ndèca-ndí véxi-ăⁿ? —càchí-güedé xáhaⁿ-güedé xii-dé.

Te ní xáhaⁿ tĕ Pèlú:

—Ñáhá, ñá túú tĕe-áⁿ xícá cùu ndìhi-ú —càchí-dé xăhaⁿ-dě xii-güedé.

²⁶ Te ìⁿ ñani tñáhá tĕe ní xehndé té Pèlú lóho-xi-áⁿ xínú cuèchi-dé tñáhá-dé núú dütú cúnùu. Te tĕe-áⁿ nĭ xáhaⁿ-dě xii té Pèlú:

—¿Náa ñá díú tñáhá-n ndìhi-n-dé ní xiní ñáhà-í òré ní tñi-ndí-dé xití lahuèrtá? —càchí-dé xăhaⁿ-dě xii-dé.

²⁷ Te té Pèlú ní xáhaⁿ tùcu-dé sá ñà díú-dĕ, te òré-áⁿ nĭ cana ìⁿ lĭhi.

Jèsús ndécú-gă núú tĕ Pilatú

(Mt. 27:1-2, 11-14; Mr. 15:1-5; Lc. 23:1-5)

²⁸ Te ní ndeñuhu-güedé Jèsús vehe té Caifás, te ndèca ñaha-güedé xii-gá cuáháⁿ vechiùⁿ tĕe cùu gobiernú. Te sa ta cùditó-ni-gá cuáháⁿ nũ ñá ní cuíní cue tĕe isràél quíhu-güedé xití vechiùⁿ tĕe cùu gobiernú-áⁿ. Te núu nì quíhu-güedé vechiùⁿ-áⁿ ñá, te vá cúú-gă quíhu-güedé cudìni-güedé vico pàscuá ní cùu chi ducaⁿ tñáhí quide-güedé. ²⁹ Núu té Pilatú tĕe cùu gobiernú ní quee-dé vechiùⁿ-dé ní cáháⁿ ndìhi ñaha-dĕ xii-güedé, te ní xáhaⁿ-dĕ:

—¿Ná cuèchi ní quide tĕe-a núu ndèca-ndo-dé véxi? —càchí-dé xăhaⁿ-dě xii-güedé.

³⁰ Te ní xáhaⁿ-güedĕ:

—Te núu dícó ñá túú cuèchi-dé-áⁿ te vá cándèca-ndí-dé quixi núú-n ní cùu —cachí-güedé xăhaⁿ-güedĕ xii-dé.

³¹ Te ní xáhaⁿ tùcu té Pilatú xii-güedé:

—Chí cándèca-dé cuánùhú, te cada ndáá-ndó cuèchi-dé nàcuáa càa leí méé-ndó —càchí-dé xăhaⁿ-dĕ xii-güedé.

Te ní xáhaⁿ-güedĕ:

—Dico nchúhú ñáyiú isràél chi ñá túú dùcaⁿ taxi tñuní lèi sá cáhní-ndí —càchí-güedé xáhaⁿ-güedé xii-dé.

³² Te ducaⁿ ñí cuu chi dacuítí ñí quee ndáá-xi nàcuáa ní cáháⁿ méé Jèsús cada-xi cuú-gá. ³³ Te cuándihu té Pilatú vechùⁿ-dé, te ní cana-dé Jèsús ní xícaⁿ tnúhú-dě núú-gă, te xáhaⁿ-dě:

—¿Yòhó yíndàha-n ñáyiú isràél-ăⁿ? —càchí-dé xáhaⁿ-dě xii-gá.

³⁴ Te ní xáhaⁿ Jèsús:

—¿Te xíăⁿ càháⁿ-n să vëxi iní méé-n, àdi ió #ⁿ ñáyiú ní cachí tñúhu xii-n cuèndá-í? —càchí-gá xáhaⁿ-gă xii-dé.

³⁵ Te ní xáhaⁿ tē Pilatú xii-gá:

—Ñá díú tēe isràél cúu-í nñu ducaⁿ cáháⁿ-n, chi cue ñaní tnáhá-n cuè tēe isràél ndíhi cue dútú cúnùu ní taxi cuèndá ñáhá-güedé xii-n ìha. ¿Te ná ní quide-n? —càchí-dé xáhaⁿ-dě xii-gá.

³⁶ Te ní xáhaⁿ Jèsús:

—Ñá díú tēe ñuyíú-a cùu-í te ni ñà túú vëxi-í taxi tñuní-í ñuyíú-a, chi núu dicó iha tàxi tñuní-í áⁿ te cue tēe xíca cuu ndíhi-í nàá-güedé ndíhi cue tēe isràél cuèndá sá vă tñí ñàha-güedé xii-í ní cùu, dico ñá túú vëxi-í sá táxí tñuní-í ñuyíú-a —càchí-gá xáhaⁿ-gă xii-dé.

³⁷ Te ní xáhaⁿ tē Pilatú:

—¿Te tēe yíndaha ñáyiú cùu-ó vání? —càchí-dé xáhaⁿ-dě xii-gá.

Te ní xáhaⁿ Jèsús:

—Te dàtná càchí-n-ăⁿ yíndaha ndisa-í ñáyiú, chi yúhú véxi-í ñuyíú-a te iha ní cacu-í te càháⁿ-í mee-ni tñúhu ndáá. Te nchaa ñáyiú na cùdí ìní-xi

tnúhu ndáá, te tedóho-yu nchaa tnúhu càháⁿ-í —
càchí-gá xáhaⁿ-gă xii-dé.

³⁸ Te ní xáhaⁿ tĕ Pìlatú:

—¿Te ná cúu-tu tnúhu ndáá-áiⁿ? —càchí-dé
xáhaⁿ-dĕ xii-gá.

Càchí-güedé sá cáhni-güedĕ Jĕsús

(Mt. 27:15-31; Mr. 15:6-20; Lc. 23:13-25)

Te sáta nĭ yáha ní xícáⁿ tnúhú tĕ Pìlatú núú Jĕsús,
te ní quee tucu-dé quehé, te xáhaⁿ-dĕ xii cue tĕe
isràél:

—Ná túú nă cuéchi tĕe-a. ³⁹ Te váha-ni chi ducaⁿ
tnàhí quide nchohó sá ndĭ tnahá nduu vico pascuá
cuiní-ndó să dácăcu-í ĩⁿ tĕe yĭhi vecaá. Te núu
cuiní-ndó te na dácăcu-í tĕe yĭndaha ñaha xii-ndo
—cachí-dé xáhaⁿ-dĕ xii-güedé.

⁴⁰ Te sá dúcáⁿ nĭ cáháⁿ-dé, núu nchaa-güedé níhi
ní cáháⁿ-güedé, te xáhaⁿ-güedé:

—¡Vá dácăcu-n tĕe-áⁿ, tĕ Barrábás dácăcu-n! —
càchí-güedé xáhaⁿ-güedĕ xii-dé.

Te tĕ Barrábás-áⁿ nĭ cuu-dé ĩⁿ ñadúhú.

19

¹ Te tĕ Pìlatú ní táuchíúⁿ-dĕ ní tnĭ ñaha cuè san-
dadú xii Jĕsús, te ní caniha-güedĕ xii-gá ndĭhi ñĭ.

² Te diu-ni cue tĕe-áⁿ nĭ cadúha-güedé ĩⁿ coróná
iñu ní chihi-güedé díquí-gă, te ní dáquĭu nuu
ñaha-güedĕ xii-gá ĩⁿ dóó tícuèhé víhí. ³ Te ní sáháⁿ
ndehe yatni-gá-güedé núú-gă, te ní xáhaⁿ-güedé:

—¡Ío càhnu cuu yohó tĕe yĭndaha ñaha xii ñáyiu
isràél! —càchí-güedé xáhaⁿ-güedĕ cúdíquí ndĕé
ñáhá-güedĕ xii-gá.

Te ní cani-güedé déhndé nŭú-gă.

⁴ Te ní quee tucu té Pilatú quehé te ní xáhaⁿ-dě xii nchaa ñáyiú xĩndecu quehé:

—Te cundehe-ndo-dě ná ndéé ñùhu-í-dé iha, chi yúhú sǎha-í cuendá sá ñà túú cuèchi-dé —càchí-dé xǎhaⁿ-dě xií-yu.

⁵ Te ní ndeñuhu ñaha té Pilatú xii Jèsús xití vechiùⁿ-dé te ñùhu ìⁿ coroná iñu díquí-gǎ, te ñihnu-gá dóó tícuèhé víhí-ǎⁿ. Te ní xáhaⁿ tǎ Pilatú xií-yu:

—¡Nái-dé-a! —càchí-dé xǎhaⁿ-dě xií-yu.

⁶ Te ní xiní ñáhá cuè dútú cúnùu ndìhì cue téé quide cuendá veñúhu. Te ní cuáá-güedé, te xǎhaⁿ-güedé:

—¡Cata caa-dé! ¡Cata caa-dé núú cùrúxí! —càchí-güedé xǎhaⁿ-güedé xii-dé.

Te ní xáhaⁿ tǎ Pilatú:

—Váha-gá ñùu candeca mee-ndo-dě quíhìⁿ cata caa-ndo-dé núú cùrúxí, chi yúhú cùtnùní iní-í sá ñà túú na cuèchi-dé —càchí-dé xǎhaⁿ-dě xii-güedé.

⁷ Te ní xáhaⁿ cuè téé isràél:

—Lèí ndécú ndìhì nchúhú càchí-xi sá dàì cuú-dé, chi càchí-dé sá Dèhe Yá Ndiǒxí cúú-dé —càchí-güedé xǎhaⁿ-güedé xii-dé.

⁸ Te sá dúcáⁿ ñí xáhaⁿ-güedé xii té Pilatú, te vaa-gá ní yùhú-dé. ⁹ Núu cuándìhu tucu-dé vechiùⁿ-dé, te ní xáhaⁿ tùcu-dé xii Jèsús:

—¿Te yòhó ndéé téé cùu-n-i? —cachí-dé xǎhaⁿ-dě xii-gá.

Dico Jèsús ñà túú ní cǎháⁿ-gá.

¹⁰ Núu ní xáhaⁿ tǎ Pilatú xii-gá:

—¿Te vá càchí tnúhu-n ñùu ndéé téé cùu-n-u? ¿Náa ñà túú xìní-n sǎ yùhú táxí tnùn-í, te cuu-ni tauchiùⁿ-í cata caa ñaha-güedé xii-n núú cùrúxí

cuú-n, te cuu-ni dàcácu ñaha-ĩ xii-n-ǎⁿ? —càchí-dé xǎhaⁿ-dě xii-gá.

¹¹ Te ní xáhaⁿ Jèsús:

—Yòhó ñá túú sǎ táxí tnùní ñáhá-n xii yúhú ní cùu núu ñá túú Yǎ Ndiǒxí ní cuíní-gá sá dúcáⁿ cùnduu, te téé ní taxi cuèndá ñáhá xii-í núú-n tǎe-áⁿ ïo-gá ndècuéchi-dé dàcúúxí yòhó —càchí-gá xáhaⁿ-gǎ xii-dé.

¹² Te òré-áⁿ ñǎ ngüíta té Pilatú ndúcú-dě nàcuáa cada-dé dàcácu-dé Jèsús ní cùu, dico cue téé isràél ní ngüíta-güedé ní cuáá-güedé, te xǎhaⁿ-güedé:

—Te núu na dàcácu-n tǎe-áⁿ, te ñá díú tǎe tnàhá tnúhu ndihí té Cèsár cúú-n. Chi nděda-ni cǎa téé na càchí sá cúú-dě téé yìndaha ñaha xii ñáyiu cùu úhú iní-dé té Cèsár. Te té Jèsús-áⁿ càchí-dé sá táxí tnùní-dé —càchí-güedé xǎhaⁿ-güedé xii-dé.

¹³ Te sá dúcáⁿ ñǎ xáhaⁿ-güedé xii té Pilatú núu ní quee-dé ndihí Jèsús cuáháⁿ ndihí ñaha-dě corrèdór núú ñǎ quee mee-ni yúú vǎha núú ñúhú, te xíaⁿ nání-xí Gǎbatá tnúhu hèbreú. Te xíaⁿ ndécú xilé sácóo nchihí té Pilatú xèhndé-dé cuéchi ñáyiu, núu ní nucóo-dé núú xilé-dé òré ní quexìo-dé ndihí Jèsús. ¹⁴ Te cùu-xi datná cuádava nduu, nduu vèspré vico pàscuá. Te ní xáhaⁿ tǎ Pilatú xii ñáyiu isràél:

—¡Nái téé yìndaha ñaha xii-ndo-a! —cachí-dé xǎhaⁿ-dě xii-yu.

¹⁵ Te ní cuáá-yu, te xǎhǎⁿ-yu:

—¡Cahni-dé! ¡Cahni-dé! ¡Cata caa-dé núú cùrúxí! —càchí-yu xǎhǎⁿ-yu.

Te ní xáhaⁿ tǎ Pilatú:

—¿Te yúhú cata caa-í téé yìndaha ñaha xii-ndo-u? —cachí-dé xǎhaⁿ-dě xii-yu.

Te cue dútú cúnùu ní xáhaⁿ-güedé:

—Nchúhú ñá túú-gă téé yìndaha ñaha xii-ndí, chi ìndi-ni té Cèsár yìndàha ñaha-dé xii-ndí — cächí-güedé xǎhaⁿ-güedě xii-dé.

¹⁶ Te té Pilatú ní xáhaⁿ-dě ní queheⁿ cuendá-güedé Jèsús ndécá ñaha-güedé cuáháⁿ cata caa ñaha-güedě núú cùrúxí.

Sàta caa-güedé Jèsús núú cùrúxí

(Mt. 27:32-44; Mr. 15:21-32; Lc. 23:26-43)

¹⁷ Te ní quee Jèsús nchídó-gă cùrúxí cuáháⁿ ìⁿ xichi núú nání Yìquì Díquì Ndíyì. Te tnúhu hèbreú quée-xí Gǒlgotá. ¹⁸ Te yàcáⁿ ní sata caa ñaha-güedě xii-gá núú cùrúxí-áⁿ. Te xio xio òñi-gá ní sata caa-güedé úú cue téé ndècu ndisa cuéchi-xi òⁿ-ni núú cùrúxí tucu. ¹⁹ Te ní táúchíúⁿ tǎ Pilatú ní taxi ndecu-güedé ìⁿ sá ndéé lètrá núú cùrúxí tá cǎa-gá, te duha cächí lètrá-áⁿ: “Jèsús téé ñuú Nazàrét, téé yìndaha ñaha xii ñáyiú isràél”, duha cächí-xi. ²⁰ Te vài ñáyiú isràél ní xiní-yu nàcuáa cǎháⁿ lètrá-áⁿ, chi yatni-ni yuhu ñuú ní sata caa ñaha-güedě xii-gá núú cùrúxí. Te lètrá-áⁿ cǎháⁿ-xi tnúhu hèbreú, te cǎháⁿ-xi tnúhu griégú, te cǎháⁿ-xi tnúhu làtín. ²¹ Te ní xáhaⁿ cuè dútú cùnù xii té Pilatú:

—Vá táuchìuⁿ-n tee-güedé lètrá cǎháⁿ-xi “Tée yìndaha ñaha xii ñáyiú isràél” ní cùu, váha-gá tauchìuⁿ-n tee-güedé lètrá cǎháⁿ-xi “Tée cächí yìndàha ñaha xii ñáyiú isràél ní cùu” —cachí-güedé xǎhaⁿ-güedě xii-dé.

²² Te ní xáhaⁿ tǎ Pilatú:

—Nàcuáa ní táúchíúⁿ-í ní tee-güedé te ducaⁿ quèndóo-xi —cächí-dé xǎhaⁿ-dě xii-güedé.

²³ Te sátá ñí sata caa ñaha cuè sandadú xii Jèsús núú cùrúxí, te cúmí xichi ní quide-güedé dóo-gă,

te ìⁿ ìⁿ xichi dóó-gă ní cáhñu cue sandàdú-áⁿ. Te ndècu ìⁿ dóó-gă dóó cání ñà túú ní tǐcu. ²⁴ Te cuendá dóó-ăⁿ ñí xítñàha cue sandadú-áⁿ:

—Vá ndátá-ó dǒó-a, váha-gá ñũu na còto ndéé-ó cuendá quiní-ó ndědacàa-o cuu cuendá-ó — cǎchí-güedé xítñàha-güedé.

Te ducaⁿ ñí quide-güedé chi ní quee ndáá-xi nàcuáa cǎháⁿ-xi núú tütú Yǎ Ndiǒxí núú cǎchí-xi: “Títñí xichi ní cáhñu-güedé dóò-í. Te ní xito ndéé-güedé cuendá cutnùní iní-güedé ndědacàa-güedé ñíhí-güedě dóò-í”, duha cǎchí-xi núú tütú-gá. Te sá dúcáⁿ cǎháⁿ-xi núú tütú Yǎ Ndiǒxí ñũu xíǎⁿ ducaⁿ ñí quide cue sandàdú-áⁿ.

²⁵ Te yatni ñíhí curúxí núú tácaà Jesús nútñí ñǎná-gă, ndihí cùhú-xi, ndihí tá Màriá ñadìhí té Clèofás, ndihí tá Màriá Magdalèná. ²⁶ Te ní xiní Jèsús ñǎná-gă nútñí-aⁿ ñíhí ìⁿ téé ní xica cuu ndihí-gá, téé ío cùu iní-gá, te ní xáhaⁿ-gă xii ñǎná-gă:

—Nǎá, téé nútñí-áⁿ nduu-dé dàtná déhe mee-n — cǎchí-gá xáhaⁿ-gă xii-aⁿ.

²⁷ Te ní xáhaⁿ-gă xii téé ní xica cuu ndihí-gá-áⁿ:

—Ñaha-áⁿ nduu-aⁿ dàtná ñǎná méé-n —cǎchí-gá xáhaⁿ-gă xii-dé.

Núu ndéé dàvá-áⁿ ñí nduu ñǎná ñáhá tée-áⁿ xii ñǎná-gă.

Ní xíhí Jèsús

(Mt. 27:45-56; Mr. 15:33-41; Lc. 23:44-49)

²⁸ Te ní cutnùní iní Jèsús sá ñí ndihí chiúⁿ ní táhú Tǎtá-gă Dútú Ndiǒxí ní quide-gá ñũu ní cachí-gá:

—Yíhí-í ndute —cǎchí-gá.

Te duha ní cáháⁿ-gá chi ní quee ndáá-xi nàcuáa càháⁿ-xi núú tütú Yá Ndiöxí.

²⁹ Te ndècu ìⁿ lítu ñùhu ndudí íá. Te sá dúcáⁿ ñí cáháⁿ-gá sá yìchí-gá ndute, núu xíáⁿ ní queheⁿ-güedé cächí te ní chindóyo-güedé xítí ndudí íá-áⁿ, te ní chinenu-güedé díquí ìⁿ dité yutnu nàni hisópó, te ní ndocani-güedé ní chihi-güedé yuhu-gá. ³⁰ Te sátá ñí xihí-gá ndudí íá-áⁿ, te cächí-gá:

—Vitna ní dáxínu cava-í nchaa chùⁿ ní cachí Tàtá-í cada-í —duha ní cachí-gá.

Te ní xócuíta dúcúⁿ-gă ndàa núú-gă, te ní xíhí-ni-gá.

Èⁿ sandàdú ní caáⁿ-dé yiqui naha Jèsús ndihí ìⁿ pùyá yíhí càá núú-xi

³¹ Te cuèndá sá ndùu vispré vico pàscuá cúú-xí nùu ñá ní cuení cue tée israèl cundecu-ni yiqui cùñú-gá núú cùrúxí ndihí yiqui cùñú cue tée ní sata caa-güedé dìñi-gá, chi cuèndá nduu tnèé-áⁿ cúú-xí ndùu ndetatú ñáyíu, te ío quède cahnú-yu nduu-áⁿ, núu ní xáhaⁿ-güedě xii té Pilatú sá táuchìuⁿ-dé quíhíⁿ cue tée cáhnú-güedé díhíⁿ Jèsús ndihí díhíⁿ cue tée tàcaa ndihí-gá, te xocàni-güedé yiqui cùñú-gá ndihí yiqui cùñú-güedé yàcáⁿ. ³² Te sátá dúcáⁿ te ní sáháⁿ cue sandàdú ní sáhnú-güedé díhíⁿ cue tée tàcaa xio xio dìñi Jesús. ³³ Te òré ní cuyatni-güedé núú-gă, te ní xiní-güedé sá sà ní xíhí-gá nùu ñá ní sáhnú-güedé díhíⁿ-gá.

³⁴ Dico ìⁿ sandàdú-áⁿ ñí cúxi-dé pùyá néhé-dě ìⁿ xio yiqui naha-gă, te yíhí caá núú-xi núu ní caáⁿ-xi yiqui naha-gă ní quee níñí ndihí ndute

cuí. ³⁵ Te yúhú té Juàá téé ní cadúha tutú-a ní xiní-í nàcuáa ní cuu ní xíhí Jèsús, te xiáⁿ núu càháⁿ ndáá-í cuèndá quíndáá iní-ndó. ³⁶ Te ducaⁿ nǐ cuu ñá ní sǎhnú-güedé díhíⁿ Jèsús, chi ní quee ndáá-xi nàcuáa càháⁿ-xi núú tütú Yǎ Ndiöxí núú càchí-xi: “Vá càhnú-güedé ni ñⁿ yiqui-gá”, duha càchí-xi. ³⁷ Te ducaⁿ nǐ quide-güedé Jèsús ní caáⁿ-güedé yiqui naha-gǎ, chi ingá xichi núú tütú Yǎ Ndiöxí càchí-xi: “Sáá nduu te quiní-güedé ñⁿ téé ní dánícuèhé-güedé”, duha càchí-xi.

Chìndúxi-güedé Jèsús

(Mt. 27:57-61; Mr. 15:42-47; Lc. 23:50-56)

³⁸ Te sátá dúcáⁿ nǐ cuu, te té Chèé téé ñuú Arimàtéa tnàhá-dé ní sándáá iní-dé tnúhu Jèsús dico dayuhu, chi ní xóo yúhú-dé cue téé cùnuu núú ñǎyiu isràél. Te téé-áⁿ nǐ xáhaⁿ-dǎ xii té Pilatú núu vá dáñá-dǎ canehe-dé yiqui cùñú Jèsús quíhíⁿ chindúxi-dé, te té Pilatú ní xáhaⁿ-dǎ xii-dé sá cúú cànehe-dé yiqui cùñú Jèsús quíhíⁿ, núu ní sáháⁿ-dé ní nuu nehe-dé yiqui cùñú-gá núú cùrúxí nchídó-dǎ cuáháⁿ. ³⁹ Te té Nicòdemú téé ní sáháⁿ niú ní cáháⁿ ndihí-dé Jèsús ndéé díhna, téé-áⁿ nǎhé-dǎ ócó úxí kílú yuchi ní cuáha mee-ni yúcú sǎ nání mìrrá ndihí yúcú sǎ nání àloés. Te ío váha tnàmi saháⁿ. ⁴⁰ Te ní naníhí tnàhá-dǎ ndihí té Chèé, te ní chidúcúⁿnuu-güedé yiqui cùñú Jèsús mee-ni dǎó vǎha, te nàcuáa ta dùcuⁿ nuu-güedé yiqui cùñú-gá dóó-ǎⁿ, te ducaⁿ ta chido-güedé yuchi sáháⁿ tnámí-ǎⁿ núú dǎó-ǎⁿ chi ducaⁿ tnàhí quide ñǎyiu isràél òré chindúxi tnàhá-yu. ⁴¹ Te yatní núú nǐ sata caa-güedé Jèsús cáá ñⁿ lahuertá. Te xití lahuertá-áⁿ nchì ñⁿ yaú cava duha cuáháⁿ ndáá-xi,

te vátá yõo ìⁿ-gá nguíndũxi xíáⁿ. ⁴² Te cuèndá sá ñí cuyatni tnahá nduu ndètatú ñáyiu isràél nõu xíáⁿ yaú cava nchìi yatni-ni xíáⁿ ñí chihi-güedé yìqui cùñú Jèsús.

20

Jèsús ní ndoto-gá

(Mt. 28:1-10; Mr. 16:1-8; Lc. 24:1-12)

¹ Te ndumìngú tacuĩhndá-gá cuáháⁿ tá Màriá Magdalèná cuáháⁿ ngoto-xi yaú núú ñí chihi-güedé yìqui cùñú Jèsús, te ní sáá-xi ní xiní-xi sá ñà túú-gã ndèdí yúú yèhe yaú-áⁿ. ² Núu xìnu-xi cuánuhú núú ndécú tẽ Xímú, àdi Pelú chi úú dìu-dé, ndìhi ìngá téé ní xica cuu ndìhi-gá téé ío cùu iní-gá, te ní xáhaⁿ-xi xì-güedé:

—Nèhe-güedé yìqui cùñú Jèsús cuáháⁿ, te ñá xìní-ó ndèé ní taxi ndecu-güedé —càchí-xi xãhaⁿ-xi xì-güedé.

³ Te ní quee té Pèlú ndìhi ìngá téé-áⁿ cuáháⁿ ndéhé-güedé yaú núú ñí chihi-güedé yìqui cùñú-gá. ⁴ Te ndùú-güedé xínú-güedé cuáháⁿ ní cùu, dico ìngá téé-áⁿ ñí cuu ñìhi-gá sáhá-dé cuáháⁿ-dé nõu díhna-gá-dé ní sáá-dé yuhu yaú núú ñí chihi-güedé yìqui cùñú Jèsús ní cùu. ⁵ Te ní ngáundayi-dé xító ñìhni-dé xítí yaú-áⁿ, te ní xiní-dé mee-ñá dóó vãha sá ñí xíducúⁿ nuu-gá yúcú, dico ñá ní quĩhu-dé. ⁶ Te sátá ñí sáá té Pèlú te cuánguĩhu-dé xítí yaú-áⁿ, núu tnahá-dé ní xiní-dé nchaa dóó ñí xíducúⁿ nuu-gá yúcú-ãⁿ. ⁷ Te ní xiní-dé sá dõó ñí xíndútú ñíquĩ-gã ñá túú càtuu jundú-xi ndìhi dóó ñí xíducúⁿ nuu-gá chi

ní nadúcuⁿnuu-ná cátùu ìⁿ xio. ⁸ Te nchìcuⁿ tucu téé ní sáá díhna-gá-áⁿ cuǎnguihu xítí yaú-áⁿ, te ní xiní-dé sá dǒó-nǎ yúcu, te ñá túú-gǎ yiqui cùñú Jèsús nǔu ní sándáá iní-dé sá ñí ndoto-gá. ⁹ Chi vátá tècú tnùnì-gǎ-güedé nàcuáa càháⁿ-xi núú tütú Yǎ Ndiǒxí núú cǎchí-xi sá Jèsús ndoto-gá. ¹⁰ Te ní xícó ndì ndúú cue téé ní sǎngoto yaú núú ñí chihi-güedé yiqui cùñú Jèsús ní cùu cuánuhú-güedé vehe-güedé.

Jèsús ní naníhí tnáhá-gǎ ndìhi tá Màriá Magdalèná

(Mr. 16:9-11)

¹¹ Te ní sáá tucu tá Màriá yuhu yaú núú ñí chihi-güedé yiqui cùñú Jèsús te ní ngüíta-xi ndàhyú-xi, te ní ngáundeyi-xi xìto nihni-xi xítí yaú-áⁿ. ¹² Te xítí yaú-áⁿ ñí xiní-xi úú espíritú xínú cuèchi núú Yǎ Ndiǒxí xǐxíhnu-xi mee-ni dǒó cuìxíⁿ xǐndecu-xi núú ñí cáa yiqui cùñú-gá. Te ìⁿ-xi nùcúú núú ñí cáa díquí-gǎ, te ìⁿ-xi nùcúú núú ñí cáa sáhá-gǎ. ¹³ Te espíritú-áⁿ ñí xáhaⁿ-xi xì tá Màriá:

—¿Ná cuendá ndàhyú-n? —cǎchí-xi xáhaⁿ-xi.

Te ní xáhaⁿ tǎ Màriá:

—Ndàhyú-í chi nèhe-güedé yiqui cùñú Yaá cúú Xìtohó-í cuáháⁿ, te ñá túú xiní-í ndèé ní taxi ndecu-güedé —cǎchí-xi xáhaⁿ-xi xii cue espíritú-áⁿ.

¹⁴ Te tnúhu-ni-áⁿ ñí cáháⁿ-xi te ní nchócótó-xí ìⁿ xio, te ní xiní-xi Jèsús nútní-gǎ dico ñá túú ní cùtnuní iní-xi sá díú mèe-gá. ¹⁵ Te ní xáhaⁿ Jèsús xii-xi:

—¿Ná cuendá ndàhyú-n? ¿Yoo nànducu-n? —cachí-gá xáhaⁿ-gǎ xii-xi.

Te mee-xi nĩ sani iní-xi sá tẽe xìto lahuertá-án cúú tẽe-án, núu ní xáhaⁿ-xi:

—Tãta, te núu yòhó néhé-n yìqui cuñú Jèsús cuáháⁿ, te cáháⁿ-n ndéé ní taxi ndecu-n chi cuèndá naqueheⁿ-í canehe-í núhú —càchí-xi xáhaⁿ-xi.

¹⁶ Te ní cáháⁿ díú ñàha-gá xii-xi, te xáhaⁿ-gã:

—¡Màriá! —càchí-gá xáhaⁿ-gã xii-xi.

Te ní ndacoto-xi núú-gã, te ní cáháⁿ-xi tnúhu hèbreú, te xáhaⁿ-xi:

—¡Rabòní! —càchí-xi xáhaⁿ-xi. Te tnúhu-án quée-xí Mèstrú.

¹⁷ Te ní xáhaⁿ Jèsús:

—Daña vá ngání ñàha-n chi vátá ndáá-gã-í núú ndécú Tãtà-í. Te núhú-n cũñaha-n xii cue tée ío váha ní tnahá tnúhu ndihí-í sá ndáá-í núú ndécú Tãtà-í Dútú Ndiõxí, te ñu-gá cúú Tãtà-ndó nchàa-ndo, te ñu-ni-gá cúú Ndiõxí-ndó —càchí-gá xáhaⁿ-gã xii-xi.

¹⁸ Te ní natnii tá Màriá Magdalèná ichi cuánuhú-xi cúñaha-xi xii cue tée ní xica cuu ndihí-gá sá ní xiní-xi Jèsús, te ní xáhaⁿ-xi xii-güedé nchaa nàcuáa ní xáhaⁿ-gã xii-xi.

Ní quexìo Jèsús núú xĩndecu cue tée ní xica cuu ndihí-gá

(Mt. 28:16-20; Mr. 16:14-18; Lc. 24:36-49)

¹⁹ Te ñu-ni ndumìngú sandiquiⁿ ní nataká cue tée ní xica cuu ndihí-gá, te xĩndedí nihnu-güedé vehe sá xiyùhú-güedé cue tée cùnuu núú ñãyiú isràél. Te ní quíhu Jèsús ndéé tnuú-güedé ní ngúnutnii-gá, te ní xáhaⁿ-gã:

—Yá Ndiõxí chíndèe ñaha-gá xii-ndo ño váha cùu iní-ndó ndècu-ndo —cachí-gá xáhaⁿ-gã xii-güedé.

20 Te ní dánèhé ñáhá-gă ndaha-gá ndìhi yiqui naha-gă xii-güedé. Te ío ní cudíí ìní-güedé sá díú ndìsa-gá ní xiní ñáhá-güedě. 21 Te ní xáhaⁿ tùcu Jesús xii-güedé:

—Yá Ndiöxí chindèe ñaha-gá xii-ndo ïo váha cùu ìní-ndó ndècu-ndo. Te dàtná ní tendaha ñaha Tátà-í Dútú Ndiöxí xii-í véxi-í ñuyíú-a, te ducaⁿ tëndaha ñaha-í xii-ndo quíhíⁿ-ndó cǎháⁿ-ndó tnùhu-í núú ñǎyiu —càchí-gá xáhaⁿ-gă xii-güedé.

22 Te ní chiyóco-gă núú-güedě, te ní xáhaⁿ-gă:

—Chí ndúú tàhú Espiritú Yă Ndiöxí cundecu ndìhi-ndo. 23 Te nchaa ñáyiu na quíndáá ìní-xi tnúhu-í te cúñaha-ndo xii-yu sá ñí quide càhnu ìní Yă Ndiöxí nchaa cuéchi-yu. Te nchaa ñáyiu vá quíndáá ìní tnúhu-í te cúñaha-ndo xii-yu sá vǎ cáda càhnu ìní-gá cuéchi-yu —càchí-gá xáhaⁿ-gă xii-güedé.

Té Mǎxí cǎháⁿ ndìhi-dé Jèsús

24 Te núú ùxúú cue téé ní xica cuu ndìhi-gá, te ìⁿ-dé nání-dě Mǎxí téé ní xóo danàni-güedé Cuǎchí, te téé-áⁿ ñà túú-dě ndécú ndìhi-güedé òré ní sáháⁿ Jèsús. 25 Te dava-gá cue téé ní xica cuu ndìhi-gá ní xáhaⁿ-güedě xii-dé:

—Ní xiní-ndí Jèsús —càchí-güedé xǎhaⁿ-güedě.

Te ní xáhaⁿ tǎ Mǎxí:

—Te vá quíndáá ìní-í, chi ndéé quíni-í ndaha-gá núú ñí quée nduyú, te dàquíhu-í díquí ndáhà-í núú ñí caáⁿ nduyú-áⁿ, te dàquíhu ndàhá-í yiqui naha-gă núú ñí caáⁿ, ducaⁿ te quíndáá ìní-í —càchí-dé xǎhaⁿ-dě xii-güedé.

²⁶ Te núú ùná tucu nduu ní nataká tucu cue téé ní xica cuu ndihi Jèsús ìⁿ vehe, te nduu-ãⁿ tnàhá té Mǎxí ndécú ndihi-güedé. Te cuëi ndèdí nihnu-güedé vehe-áⁿ, te ní quíhu Jèsús ndéé tnuú-güedé, te ní xáhaⁿ-gǎ:

—Yá Ndiǒxí chíndèe ñaha-gá xii-ndo ïo váha cùu iní-ndó ndècu-ndo —cachí-gá xáhaⁿ-gǎ xii-güedé.

²⁷ Te ní xáhaⁿ-gǎ xii té Mǎxí:

—Cundehe ndàha-í te dàquíhu-n dǐquí ndáhá-n nùú ñǐ quée nduyú, te dàquíhu-n ndàha-n yíqui naha-í-a cuèndá quíndáá iní-n te vá cání ìⁿ caní úú iní-n —càchí-gá xáhaⁿ-gǎ xii-dé.

²⁸ Te ní xáhaⁿ tǎ Mǎxí xii-gá:

—¡Yòhó cúú-n Xǐtohó-í! ¡Yòhó cúú-n Ndiǒxì-í! —càchí-dé xáhaⁿ-dǎ xii-gá.

²⁹ Te ní xáhaⁿ Jèsús:

—Mǎxí, ndéé vitna ní sándáá iní-n chi ndéé ní xiní ñáhá-n xii-í te ní sándáá iní-n, dico cùdí-gǎ iní nchaa ñáyiu ñá túú ní xiní núú ñáhá xii-í, te ní sándáá iní-yu —càchí-gá xáhaⁿ-gǎ xii-dé.

Quíndáá iní-ó tñǎhu yòdo tnuní núú tütú-a

³⁰ Te vai-gá sá vǎ yǒo tnàhí ndàcu cada ñá túú yòdo tnuní núú tütú-a ní quide Jèsús núú cue téé ní xica cuu ndihi-gá. ³¹ Dico dava-gá ní ngódó tnùní núú tütú-a cuèndá sá quíndáá iní-ndó sǎ Jèsús cúú-gǎ Crístú Déhe Dútú Ndiǒxí, te naníhí tàhú-ndó te núu na quíndáá iní-ndó-gǎ.

21

Úsá cue téé ní xica cuu ndihi Jèsús ní xiní ñáhá-güedé xii-gá

¹ Te ingá nduu tucu xĩndecu cue téé ní xica cuu ndihí Jèsús yuhu làgúná ñuú Tìberíás, te ní sáháⁿ-gá núú xĩndecu-güedé-áⁿ. Te duha ní cuu ní xiní ñáhá-güedé xii-gá. ² Te ndècu té Xĩmú, àdi Pelú chí úú dũ-dé, ndihí té Măxí téé ní xóo cúñaha-güedé Cuăchí, ndihí té Natanàél téé ñuú Cànaá, te ñuú-áⁿ yĩndèhu-xi distritú Galileá, te tnàhá ndi nduú déhe té Zebèdeú, ndihí úú-gá tucu cue téé ní xica cuu ndihí-gá. ³ Te ní xáhaⁿ tẽ Pelú xii-güedé:

—Quíhíⁿ-í quítñí-í chácá —càchí-dé xăhaⁿ-dẽ xii-güedé.

Te ní xáhaⁿ-güedé:

—Tnàhá nchúhú canchicúⁿ ñáhá-ndĩ xii-n quĩhíⁿ tucu —càchí-güedé xăhaⁿ-güedé xii-dé.

Te ní xica-güedé cuáháⁿ-güedé ní sáá-güedé núú ndécú bàrcú, te ní quée-güedé xití bàrcú-án cuáháⁿ-güedé. Te niú-áⁿ ñă ní ñihí tnàhí-güedé chácá. ⁴ Te sa ta cùditó-ñă cuáháⁿ ní xiní-güedé Jèsús yuhu làgúná, dico ñá ní cùtnuní iní-güedé sá díú-gă. ⁵ Te ní xáhaⁿ-gă xii-güedé:

—Cue téé cuechi, ¿ní níhí-ndó chăcá caxi-o ñă? —càchí-gá xáhaⁿ-gă xii-güedé.

Te ní xáhaⁿ-güedé:

—Vědana chácá ñà túú ní ñihí-ndĩ —càchí-güedé xăhaⁿ-güedé xii-gá.

⁶ Te ní xáhaⁿ Jèsús:

—Chí dáquée ñunu-ndo ndàa xio cuha barcú chí níhí-ndó-dí —càchí-gá xáhaⁿ-gă xii-güedé.

Te ducaⁿ ñĩ quide-güedé, te òré nátàva-güedé ñunu xití ndute, te ñá cùndèe-gă-güedé natava-güedé cuendá sá ñĩ chítú chăcá xití-xi.

7 Te tée ní xica cuu ndihi-gá tée ío cùu iní-gá ní xáhaⁿ-dě xii té Pèlú:

—¡Diu Xítoho Jesucrístú! —càchí-dé xáhaⁿ-dě xii-dé.

Te sá nǐ tecú dóho té Pèlú sá dúcáⁿ càháⁿ-dé nǔu ní ndíúnuu-dé dóó-dě, chi dóó sǎ yímàa-ni-dé níhnú-dě ní cùu. Ducaⁿ te ní nuu ndava-dé bàrcú ní ngaunihnu-dé ndute, te cuáháⁿ-dé núú ndute-án nǐ quene-dé ndée ñuhu yìchí. 8 Te dava-gá cue tée ndihi té Pèlú diu-ni cue tée ní xica cuu ndihi Jèsús ní quendóo-güedé dàtná ìⁿ cièndú-gá mètrú te quene-güedé yuhu ndùte. Te tǎñuhu-ni-güedé ñunu-güedé chitu chǎcá nǐ quene-güedé ndée yuhu ndùte. 9 Te òré ní quene-güedé ñuhu yìchí, te ní xiní-güedé càyú ñuhú, te núú ñùhú-án ñùhú ìⁿ chácá ndihi ìⁿ pàá. 10 Te ní xáhaⁿ Jèsús xii-güedé:

—Quíhíⁿ gueheⁿ-ndo ìⁿ úú chácá quiti íchí nǐ tnìⁿ-ndo —càchí-gá xáhaⁿ-gǎ xii-güedé.

11 Núu té Pèlú ní sáháⁿ-dé núú ndécú bàrcú, te ní quée-dé xítí-xi ní cándeé-dé ñunu ñùhu chácá tǎñùhu-dé ní quene ndée ñuhu yìchí, te chitu chǎcá náhnú, te ñùhu ìⁿ ciendú údico úxí úní-di xítí ñunu-án, te cuèi ducaⁿ vǎi-di ñuhu dico ñá ní ndǎtá ñunu-án. 12 Te ní xáhaⁿ Jèsús:

—Chí nèhé cadí iní-ndó —càchí-gá xáhaⁿ-gǎ xii-güedé.

Dico ni ìⁿ cue tée ní xica cuu ndihi-gá-án ñǎ ní xicáⁿ tnúhú-güedé núú-gǎ nǔu yoo cùu-gá, chi sa ní cutnùníní iní-güedé sá díú Jèsús cúú-gǎ. 13 Te Jèsús ní sáháⁿ-gá ní queheⁿ-gá pàá ní sǎñaha-gǎ xii-güedé caxi-güedé, te dǎtnùníní ní queheⁿ tucu-gá chácá nǐ sǎñaha-gǎ xii-güedé.

14 Vitna cùu úní xito sá xìní ñáhá cue téé ní xica cuu ndihí-gá sátá ñí ndoto-gá.

Jèsús càháⁿ ndihí-gá té Pèlú

15 Te sátá ñí túhú cóhó-güedě ní sadí iní-güedé te ní xicáⁿ tnúhú Jèsús núú tě Xímú, àdi Pelú chi úú diu-dé, te xáhaⁿ-gă:

—Xímú, déhe té Jònás, ¿cùu iní-gá-n yǔhú dàcúúxí dàva-gá cue téé-a ñă? —càchí-gá xáhaⁿ-gă xii-dé.

Te ní xáhaⁿ tě Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbéé lǐhli-í —càchí-gá xáhaⁿ-gă xii-dé.

Te cue mběé-án cúú-güèdi ñáyiu cùu cuendá-gá.

16 Te ní xáhaⁿ tùcu-gá xii té Pèlú:

—Xímú, déhe té Jònás, ¿cùu iní ñáhá-n xii-í-u? —càchí-gá xáhaⁿ-gă xii-dé.

Te ní xáhaⁿ tùcu té Pèlú:

—Mèstrú, cùu iní ñáhà-í, yòhó sa nàha-n —cachí-dé xáhaⁿ-dě xii-gá.

Te ní xáhaⁿ-gă:

—Te núu ducaⁿ, te coto-n cuè mbéè-í —càchí-gá xáhaⁿ-gă xii-dé.

17 Te xito cùu úní ní xáhaⁿ tùcu-gá xii té Pèlú:

—Xímú, déhe té Jònás, ¿cùu iní ñáhá-n-ăⁿ? —càchí-gá xáhaⁿ-gă xii-dé.

Te té Pèlú ío ní cundìyí-dé sá dúcáⁿ ñí cuu úní xito xicáⁿ tnúhú-gă núú-dě nǔu ndisa sá cúú iní ñáhá-dě xii-gá, te ní xáhaⁿ-dě:

—Mèstrú, yòhó nchaa sa xìní-n, te sa cùtnuní iní-n sǎ cúú iní ñáhà-í xii-n —càchí-dé xáhaⁿ-dě xii-gá.

Te ní xáhaⁿ Jèsús:

—Te núu ducaⁿ, te dacàxi-n cue mbèè-í. ¹⁸ Te na càchí tnúhu ndáá-í xii-n sã cǔtnàhá cuechi-gã-n nĩ xóo ndécũhnu mee-n dǔó-n, te ní xóo quĩhĩⁿ-n nděni ní xóo cachí iní-n, dico na yĩ-n te dacáá-n ndàha-n, te ìngá tée dacũhnu ñaha xii-n dǔó-n te cada yica-dě candeca ñaha-dě xii-n quĩhĩⁿ ìⁿ núú ñà túú tnàhá iní-n —càchí-gá xáhaⁿ-gã xii-dé.

¹⁹ Te sá dúcáⁿ nĩ cáháⁿ Jèsús cúú-xí sã nĩ dátècú tnúhu ñaha-gã xii té Pèlú nàcuáa cada-xi cuú-dé, te ducaⁿ càda cahnu-dé Yă Ndiǒxí, te ní xáhaⁿ-gã xii-dé:

—¡Canchicúⁿ ñáhá-n xii-í! —càchí-gá xáhaⁿ-gã xii-dé.

Tée ío cùu iní-gá

²⁰ Te ní nchócótó tẽ Pèlú ndàa sátá-dě, te ní xiní-dé sá nchìcúⁿ ñáhá ìngá tée xica cuu ndĩhi-gá cuáháⁿ, tée ío cùu iní-gá tée ní xínucóo dĩñi-gá òré ní cudini ndĩhi ñaha-gá xii-güedé, te dĩu-ni tée-áⁿ nĩ xicáⁿ tnúhú-dě núú-gã dāvá-áⁿ nũu nděda càa tée cuáha cuendá ñáhá xii-gá núú cuè tée cùu úhú iní ñáhá. ²¹ Te òré ní xiní té Pèlú sá nchìcúⁿ ñáhá tẽ-áⁿ, te ní xicáⁿ tnúhú-dě núú Jèsús, te xãhaⁿ-dě:

—Mèstrú, te tée-áⁿ, ¿ná cúú sã yãha-dé-i? —càchí-dé xãhaⁿ-dě xii-gá.

²² Te ní xáhaⁿ Jèsús:

—Te núu yúhú cuiní-í sá cùndècu-ni-dé ndéé ná quixi tucu-í ñuyíú-a, ¿te yòhó ná cuendá-n nũu xicáⁿ tnúhú-n? Yòhó canchicúⁿ ñáhá-ni xii-í —càchí-gá xáhaⁿ-gã xii-dé.

²³ Te ní xinu tnúhu núú nchàa ñáyiu sàndáá iní tnúhu-gá sá tẽ-áⁿ vã cùú-dé. Dico Jèsús ñà túú

dùcaⁿ ní xáhaⁿ-gă sá vă cùú-dé, chi ní xáhaⁿ-gă: “Núu yúhú cuìní-í sá tĕe-ăⁿ cundecu-ni-dé ndéé ná quìxi tucu-í ñuyíú-a, ¿te yòhó ná cuendá-n?”, duha ní xáhaⁿ-gă xii té Pèlú.

²⁴ Te diu-ni yúhú té Juàá tée ní sani iní-yu sá vă cùú càháⁿ ndáá-í nchaa nàcuáa ní cuu, te ducaⁿ ñĩ tee-í núú tütú-a, te cùtnuní iní-ndó sã tnũhu ndáá cùú-xí.

²⁵ Te ndècu vai-gá núú sã ñĩ quide Jèsús. Te núu dìcò ní ngũndee nchaandi túhú ñá, te vaa ni te ñihí ñuyíú te vá tnàhá núú-xi cundecu librú, te núu dìcò ní ngũndee nchaa. Te ducaⁿ na cùnduu. Te ío chí cádá ndèe iní-nă vitna.

Tnúhu ní cáháⁿ yă ndiöxí xito cùu uú
New Testament in Mixtec, Peñoles (MX:mil:Mixtec,
Peñoles)

copyright © 2002 Wycliffe Bible Translators, Inc.

Language: Mixtec, Peñoles

Translation by: Wycliffe Bible Translators, Inc.

Mixteco, Peñoles [mil], Mexico

Copyright Information

© 2002, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Peñoles

© 2002, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files
dated 29 Jan 2022

872f7754-0986-5ecd-a059-925a708a6939